



錢塘魏之琇編集

海昌王士雄孟英
定州楊照藜素園 同校

癰疽

李東垣治通父家翟種于尻臀上足太陽經生癰堅硬腫痛

大作左右尺脈俱緊按之無力羌活黃柏各二錢防風藁

本連翹各一錢肉桂七分甘草蒼朮陳皮各五分當歸一

錢黃耆一錢五分酒三大盞水一大盞煎至一盞去渣空

心熱服以來被蓋覆其癰使藥行罷去之一服愈

子族叔父平生多慮質弱神勞年近五十忽右膊外側廉上
生結核身微寒熱而易怒食味頗厚脈之俱弦大浮數而
重按似澁曰此多慮而憂傷血時在初秋勿輕視之宜急
補以防變症以人參一斤作膏下以竹瀝病者吝費招一
外科以十宣五香散閒與服旬日後一日大風拔木病者
發熱神思不佳急召視之核稍高大似有膿于中起一紅
線延過肩後斜走繞背脊過入右脇下不痛覺肩背重而
急迫食有嘔意脈同前但弦多耳作人參膏合芎朮生薑
汁飲之用人參二斤瘡潰膿乾又與四物湯加參朮陳皮
甘草半夏生薑百餘帖而安此等若在春令雖神仙不治

也幸而在秋金之令不幸因時下暴風激起木中相火而致此自非參膏驟補何由得免

朱朗年四十餘惡寒發熱右腿內廉厥陰分生一腫毒此是冷折熱在肺經血分與此方。萹仁黃藥子赤芍歸頭條苓各三錢青皮角刺桂枝各二錢甘草節一錢分四帖煎服一盞入忍冬藤汁二蛤殼食前飲以忍冬藤渣敷腫上。

呂孺人惡寒發熱腹上有小疽此血少有熱與此方。白朮川芎各三錢赤芍連翹各二錢半防風陳皮黃芩各二錢木通錢半甘草五分分五帖煎服

鄭經歷性嗜酒與煎燂年五十餘忽春末夏初患額絲竹空

涌出一角。長短大小如雞距稍堅。求治曰：此非膏梁所致，而何宜斷厚味。先解食毒，針灸以開泄壅滯，未易治也。此少陽經所過，氣多血少者，鄭以憚煩召他醫，以大黃朴硝腦子等涼藥罨之。一夕豁開如醬，蚘徑三寸。一二日後血自蚘中濺出，高數尺而死。此涼藥外逼，熱鬱不得發，宜其發之暴如此也。

陳自明外科精要云：神仙截法治癰疽發背一切惡症。預服則毒氣不入內，真麻油一斤，銀石器內熬十數沸，候冷用酒兩椀入油五盞，通口熱服。一日用盡，緩則數日服之。吳安世云：吾家三世用之，無有不驗。又云：獵者云：凡中藥箭

急飲麻油藥毒卽消鄭學諭德甫屢用之甚驗

薛立齋治一男子患癰腫硬疼痛發熱煩躁飲冷脈沈實大便祕乃邪在臟也用內疏黃連湯疏通之以絕其源先投一劑候行一次勢退一二再進一劑諸症悉退乃用黃連消毒散四劑而消。

一男子患癰膿熟不潰欲針之補以托裏不信乃服攻毒藥及致惡心少食始悟而用針更以六君子湯加藿香當歸四劑少可再以加味十全大補湯數劑而斂凡瘡膿熟不行針刺膿毒侵蝕輕者難療重者不治老弱之人或偏僻之處及緊要之所若一有膿宜急針之更以託裏庶幾無

變

一男子患癰作痛服寒涼藥痛雖止而食愈少瘡亦不潰以六君子湯而食進再以託裏藥潰之而愈大抵瘡疽之症寒熱虛實皆能作痛熱毒之痛者以寒涼之劑折之寒邪之痛者以溫熱之劑散之因風而痛者除其風因溼而痛者導其溼燥而痛者潤之塞而痛者通之虛而痛者補之實而痛者瀉之膿鬱而閉者開之惡肉侵蝕者去之陰陽不和者調之經絡閉澁者利之慎勿概用寒涼之藥况血脈喜溫而惡寒若冷氣入裏血卽凝滯反爲難瘥矣

馮楚瞻治趙翁年七十二右頰腫硬連及顛項耳後一片堅

實不熱不痛已兩月餘。諸治不效。漸至口內出膿。牙際不
開。飲食少進。精神日衰。脈則洪大而空。知爲元氣大虧。陰
寒所聚。所謂石疽是也。不得陽和。何以外解。若內潰日久。
穿喉破頰。不可療矣。乃用豬脂搗爛。入玉桂細末。葱頭食
鹽杵勻。厚敷患處。敷藥以脂膏治血肉。同氣相應也。葱能
透竅。鹽能軟堅。桂能行血。油能浸潤皮膚。內則空心生脈。
飲送八味丸。食遠志。參。著歸。芩。苓。朮。薄。桂。銀。花。角。刺。之。類。
使陽回。則陰寒自解。血氣沖和。自能逐毒。三五日後。冰硬
者熱軟。漫腫者高聳。木者疼痛。紫者紅活。飲食日進。血氣
漸長。毒既外出。久凝久瘀之血肉。消者消膿。著膿。不再旬。

而愈。

張景岳治一儒者年近三旬素病聾耳發必潰膿至是益甚自耳根下連頸項上連頭角耳前後莫不腫痛或與散風降火一月後稠膿鮮血自耳迭出每二三日必出鍾許而腫痛全不消枕不可近察其形色已大不足而腫痛則若有餘脈之或急或緩弱此非實熱可知遂先與六味湯二三劑元氣稍振繼與一陰煎加牛蒡茯苓澤瀉倍加白茯苓為君服五十餘劑外用降癰散晝夜敷治兩月而後愈蓋此症雖似潰瘍有餘而實以肝腎不足上實下虛一奇

症也

何奇之有

張通府耳後髮際患腫一塊無頭肉色不變按之微痛彼以爲痰結核其脈軟而時見數經云脈數不時見則生瘡也非痰結仲景云微弱之脈主血氣俱虛形精不足又云沈遲軟弱皆宜託裏遂以人參白朮黃耆當歸川芎炙草以託裏少加金銀花白芷桔梗以消毒彼謂不然內飲降火化痰外帖涼藥覺寒徹腦患處大熱頭愈重飲食愈少復請治以四君子湯加藿香炮干薑數劑飲食漸進膿成刺之更以十全大補湯去桂及炙草貼以豆豉餅又月餘而愈。

胡生耳後寸餘發一毒名曰銳疽焮痛發熱煩躁喜冷此膽

經蘊熱而發先用神仙活命飲一劑勢減二三時值仲冬彼惑於藥有用寒遠寒之禁故不再服自用十宣散託裏之藥勢漸熾耳內膿潰復請治視其喉腫閉藥不能下而歿

一婦人年逾四十近環跳穴生一毒尺脈沈緊腿不能伸經曰脾寒移于肝癰腫筋攣夫脾主肉肝主筋肉溫則筋舒肉冷則筋急遂與乳香定痛丸治之少愈更以助胃壯氣血藥二十餘劑而消

一婦人倏傷次指成膿不潰焮痛至手誤敷涼藥以致通焮微嘔少食彼以爲毒氣內攻診其脈沈細此痛傷胃氣而

然也遂刺之服六君子湯加藿香當歸食進更服八珍湯
加黃耆白芷桔梗月餘而愈又一後生亦患此色黑不痛
其指已死欲令斬去速服補劑恐黑上臂不治彼不信另
服敗毒藥手竟黑遂不可救又一男子亦傷拇指色紫不
痛服託裏藥及灸五十餘壯作痛潰膿而愈又吳舉人幼
女因凍傷兩足至春發潰指俱壞遂去之服以大補藥而
愈又藍上舍女患嵌甲傷指年餘不愈日出膿數滴謂足
大指乃肝脾二經發源之所宜灸患處使瘀血去陽氣至
瘡口自合否則不治彼忽之不早治後變勞症而歿蓋至
陰之下血氣難到若女人患此又多因禮縛致血脈不通

或被風邪所襲。則無氣血榮養。遂成死肉。惟當壯其脾胃。行其經絡。生其血氣。則愈。其有成破傷風。以致牙關緊急。口眼喎邪者。先以玉真散一二服。然後投以通經生血之劑。

于御郎骸胛患毒痛甚。服消毒藥。其勢未減。卽以槐花酒一服。勢隨大退。再以託裏消毒之藥而愈。

立齋曰。予丙子年。忽惡心。大椎骨甚痒。須臾臂不能舉。神思甚倦。此天疽危病也。急隔蒜灸之。痒甚愈。又明灸五十餘壯。痒遂止。旬日而愈。精要云。灸法有回生之功。信矣。大凡蒸灸若未潰。則拔引鬱毒。已潰。則接補陽氣。祛散寒邪。瘡

口自合。其功甚大。其法用大獨蒜。切片如三錢厚。貼疽頂上。以艾炷安蒜片上。灸之。每三壯一易蒜。若灸時作痛。要灸至不痛。不痛要灸至痛方止。大概以百壯爲度。膿潰則以神異膏貼之。不日而安。一能使瘡不開。大二內肉不壞。三瘡口易合。見效甚神。丹溪云。惟頭爲諸陽所聚。艾壯宜小而宜少。

王大廣年逾六十。素厚味。頰頰患毒。未潰而肉先死。脈數無力。胃經積毒所致。致頰頰正屬胃經。未潰肉死。則胃氣虛極。老人豈宜患此。辭不治。果歿。內經云。膏粱之變。足生大疔。受如持虛。

黃履素曰子座師茅五芝先生長公子子京偶于腎間患一
毒地非要害直易視之子京素知醫恐痛傷元氣輒服人
參其毒愈甚發寒熱乃始延醫又遇粗工潰後胸懣應服
參者又不能多段竟致不能收口而歿蓋癰疽初起先宜
瀉毒而後議補若補之太早遂有此禍可鑒也

邱汝誠面生疽卽買藥舖肆所含神芎散九予之曰以此療
之其人怒不肯服歸而告人人曰未必非良法也服之卽

瘥蓋其人嗜酒此丸實去酒病云

揮塵
新談

彭羨門少宰傳治腫毒初起方用雞子用銀簪插一孔用明
透雄黃二錢研極細未入之仍以簪攪極勻封孔人飯內

蒸熟食之日三枚神效錄

居易

前宦都令李聘說麥粉不拘多少用陳醋熬膏貼無名腫毒

神效雄按此名烏籠膏麥粉乃洗麩造麵筋澄下之粉也

徐靈胎曰瘍科之法全在外治其手法必有傳授凡辨形察色以知吉凶及先後施治皆有成法必讀書臨症二者皆到然後無誤其升降圍點去腐生肌呼膿止血膏塗洗熨等方皆必純正和平屢試屢驗者乃能應手而愈至於內服之方護心託毒化膿長肉亦有真傳非尋常經方所能奏效也惟煎方則必視其人之強弱陰陽而為加減此則必通於內科之理全在學問根柢然又與內科不同蓋煎

方之道相同。而其藥則有某毒主某藥。某症主某方。非此不效。亦另有傳授焉。故外科總以傳授爲主。徒恃學問之宏博無益也。有傳授則較之內科爲尤易。惟外科而兼內科之症。或其人本有宿疾。或患外證之時。復感他氣。或因外症重極。內傷臟腑。則不得不兼內科之法治之。此必平日講於內科之道。而通其理。然後能兩全而無失。若不能治其內症。則并外症亦不可救。此則全在學問深博矣。若爲外科者。不能兼。則另請明理內科。爲之定方。而爲外科者。參議於其間。使其藥與外證無害。而後斟酌施治。則庶幾兩有所益。若其所現內症。本因外證而生。如痛極而昏。

暈膿欲成而生寒熱。毒內陷而脹滿。此則內症皆由外症而生。只治其外症而內症已愈。此又不必商之內科也。但其道甚微。其方甚眾。亦非淺學。者所能知也。故外科之道。淺言之則惟記煎方。斲首合膏圍藥。幾料已可以自名家。若深言之則經絡臟腑氣血骨脈之理。乃奇病怪疾千態萬狀無不盡識。其方亦無病不全。其珍奇貴重難得之藥。亦無所不備。雖遇極奇極險之症。亦了然無疑。此則較之內科爲更難。故外科之等級高下懸殊。而人之能識其高下者亦不易也。

曰外科之法最重外治。而外治之中尤重圍藥。凡毒之所最

忌者散大而頂不高。蓋人之一身。豈能無七情六慾之伏。火風寒暑溼之留邪。飲食痰涎之積毒。身無所病。皆散處。退藏氣血一聚而成癰腫。則諸邪四面皆會。惟圍藥能截之。使之併合。則周身之火毒不至矣。其已聚之毒。不能透。出皮膚勢。必四布爲害。惟圍藥能束之。使不散漫。則氣聚而外洩矣。如此則形小頂高。易膿易潰矣。故外治中之圍藥。較之他藥爲特重。不但初起爲然。卽成膿收口。始終賴之一日不可缺。若世醫之圍藥。不過三黃散之類。每試不效。所以皆云圍藥無用。如有旣破之後。而仍用圍藥者。則羣然笑之。故極輕之毒。往往至於散越。而不可收拾者。皆

不用圍藥之故。至於圍藥之方，亦甚廣博。大段以消痰拔毒，束肌收火為主。而寒熱攻提和平，猛厲則當隨症去取。世人不深求至理，而反輕議圍藥之非，安望其術之能工也。

神授衛生湯。治一切瘡症，能宣熱散風，行瘀活血，解毒消腫。

疏通臟腑。

徐靈胎曰：其法不外此四句。

藥性和平，功效甚速。誠外科首

用方也。羌活八分，搜風發表，勝溼防風，勝溼解表，去風白芷，發表散風，熱活血排膿。穿山甲土炒，研沈香紅花散結消腫。排膿瘡家聖藥。連翹石決明煨各六分。金銀花皂角刺歸尾甘草節生肌止痛花粉太寒不可用。破後口渴者。

可用以上各一錢乳香五分大黃酒浸炒一錢脈虛便利者勿用水二碗煎八分病在上部先服藥隨飲酒一杯病在下部先飲酒一杯隨後服藥以行藥勢徐靈胎曰其方之分量亦最宜斟酌得中除大黃共一兩零五分此外科之主方加減不外乎此又曰外科與內科大不相同內科之病千頭萬緒一病必有一病之主方外科不過託毒清火及生肌長肉等數法耳卽有加減亦惟隨症選擇幾味無多法也學者果能將藥性細細參考自能隨症施治投無不利

繆仲淳治疔疽及一切腫毒方生甘菊連根打碎一兩五錢

紫花地丁五錢。甘草用水炙三錢。鼠粘子炒研一錢五分。括蕁根二錢。貝母三錢。金銀花五錢。白芷一錢五分。生地三錢。白芨三錢。連翹二錢五分。五爪龍卽茜草五錢。先用夏枯草六兩。河水六碗煎三大碗。去渣入煎藥一碗。不拘時服。潰後加鹽水炒黃芪五錢。麥冬五錢。

又圍陰症瘡瘍方。紅藥子四兩。白芨一兩五錢。白欬一兩五錢。乳香六錢。沒藥六錢。硃砂三錢。雄黃三錢。麝香一錢。冰片一錢。黑狗下頰一個。煨存性。豌豆粉一兩。各另研極細末。和勻。以醋蜜調敷四圍。以極滾熱醋蘸潤。亦可服。

腦疽

薛立齋治一男子患腦疽其頭數多痛不可忍先服黃連消
毒散不應更以忍冬酒服之卽酣睡覺而勢去六七再四
劑而消又一男子所患尤甚亦令服之腫痛頓退但不能
平加以黃耆當歸瓜蒌白芷甘草節桔梗數劑而愈

舉人潘光甫年四十患腦疽焮腫診其脈沉靜謂陽症陰脈
斷不起已而果然蓋瘡瘍之症雖屬心火尤當分表裏虛
實果元氣充實內有實火者寒劑或可責效若寒涼過度
使胃寒脾弱陽變陰或結而不潰潰而不斂陰陽乖戾水

火交爭死無日矣。

一老婦患腦疽稟壯實潰而痛不止脈實便秘與清涼飲二劑而痛止更以消毒託裏藥而愈。

一老人患此症色赤腫痛脈數而有力與黃連消毒散二劑少愈更以清心蓮子飲四劑而愈。

一男子患此症腫痛脈數以黃連消毒散二劑少退以仙方活命飲二劑而止更以芎歸白芍銀花知柏而潰又以託裏藥而愈。

一男子頭頂俱腫雖大潰腫痛益甚兼作瀉煩躁不睡飲食少思其勢可畏診其脈毒尚在與仙方活命飲二劑腫痛

退半。與二神丸及六君子湯加五味麥冬棗仁。四劑諸症少退。飲食少進。睡亦少得。又與耆芩白朮散。數服。飲食少進。又與十全大補湯。加銀花白芷桔梗。月餘而瘥。

一老人面赤腫痛。脈數而有力。與黃連消毒散二劑。少退。更與清心蓮子飲。四劑而消。

一婦人患此症。膿熟不潰。脹痛欲嘔。飲食少思。急針之。與託裏藥而愈。又一婦人患之。不甚痛。不作膿。以託裏消毒散。膿成針之。補以託裏藥而愈。

一老人患此症。膿清兼作渴。脈軟而澹。以爲氣血俱虛。用八珍湯加黃耆五味子。彼不信。乃服降火之劑。果反作嘔。少

食始信服香砂六君子湯四劑嘔止食進仍投前湯四劑而愈

一男子患此症膿成未潰兼作渴尺脈大而無力以四物湯加知柏麥冬黃耆四劑而渴減又與加味八味丸渴止瘡潰更用託裏藥兼前丸而愈

一男子患此症腫痛脈數以荆防敗毒散二劑而痛止更以託裏消毒藥而消

一男子患此症焮腫疼痛發熱飲冷脈洪數與涼膈散二劑而止以金銀花四劑散而潰更以託裏藥而愈

一老婦患此症稟實潰而痛不止脈實便秘而清涼飲二劑

而止更以託裏消毒藥而愈

一男子患此症腫硬不作膿惟瘡口出水痛甚以仙方活命飲二劑痛止而膿成針之更以託裏藥而愈常治膿清而補不應及不痛或不悶堅硬者俱不治

一男子患此症膿將成微痛兼渴尺脈大而無力此陰虛火動之症彼謂心經熱毒自服清涼降火藥愈繼復求治乃以四物湯加知柏立味麥冬黃耆及加減八味丸渴止瘡潰更以託裏藥兼前丸而愈中藏經云癰疽瘡腫之作皆五臟六腑畜毒不流非獨榮衛壅塞而發其行也有處其主也有歸假今發于喉舌者心之毒皮毛者肺之毒肌肉

者脾之毒骨髓者腎之毒發于下者陰中之毒發于上者陽中之毒外者六腑之毒內者五臟之毒故內曰壞外曰潰上曰從下曰逆發于上者得之速發于下者得之緩感于六腑者易治感于五臟者則難治也觀此則疽發于腦者乃膀胱腎脈陰氣不足陽火熾盛而出也豈可尚泥于火而不滋益陰氣耶。

一男子耳後漫腫作痛肉色不變脈微數以小紫胡湯加芎歸桔梗四劑腫少起更以託裏消毒散數劑脈滑數此膿已成矣宜針之彼畏而不肯用因痛極始針之出膿碗許以託裏藥兩月餘始愈凡瘡不起者託而起之不成膿者

補而成之使不內攻。膿成而及時針之。不數日即愈矣。當見患者皆畏針痛而不肯用。又有恐傷良肉而不肯用。殊不知瘡雖發于肉薄之所。若膿成。其腫亦高。寸餘瘡皮又厚。分許用針深不過二分。若發于背腫高。必有三四寸入。針止寸許。况患處肉已壞矣。何痛之有何傷之慮。怯弱之人又患附骨疽。待膿自通。以致大潰。不能收斂。氣血漑盡而亡者多矣。用針之法

一男子素不愼起居。飲食腦忽。焮赤腫痛。尺脈洪數。以黃連消毒散二帖。濕熱頓退。惟腫硬作痛。以仙方活命飲二帖。腫痛悉退。但痛頭不消。投十宣去桂。加銀花。藁本。白木。茯苓。

苓陳皮以託裏排膿。彼欲全消。自製黃連消毒散二帖。反
腫硬。不作膿。始悟仍用十宣。加白朮茯苓半夏。腫少退。乃
去桂。又四劑而膿成。膿勢亦退。繼以八珍散。加黃耆五味
麥冬。月餘膿續而愈。夫苦寒之藥。雖治陽症。尤當分表裏。
虛實次第時宜。豈可始末悉用之。然焮腫赤痛。尺脈數。按
之則濡。乃膀胱溼熱壅盛也。故用黃連消毒散。以解毒除
溼。腫硬作痛。乃氣血凝滯不行而作也。遂用仙方活命飲。
以散結消毒。破血。其瘡頭不消。蓋因熱毒薰蒸。氣血凝滯
而然也。宜用甘溫之劑。補益陽氣。託裏以腐之。況此症原
屬督脈經陰虛火盛而出。若不審其因。專用苦寒之劑。使

胃氣弱。何以腐化收斂。幾何不致于敗耶。凡瘡之易消散。易腐潰。易收斂。皆氣血壯盛故也。

汪太常太夫人年逾八十。腦疽已潰。發背繼生。頭如粟許。脈大無力。此膀胱經溼熱所致。夫脈無力。乃血氣衰也。遂以託裏消毒藥數服。稍可。更加參耆之劑。雖起而作渴。此氣血虛甚。以人參黃耆各一兩。當歸熟地各五錢。麥冬五味各一錢。數服渴止。而不潰。以前藥加玉桂十餘劑。膿成針之。瘀肉漸腐。徐徐取去。而膿猶清不斂。投以大劑十全大補湯。加白斂貝母遠志三十餘劑。膿稠而愈。凡患者氣質素實。或有痰。不服補劑。不知膿血出多。氣血並虛。豈不宜

補膏治瘡陰用參者大補之劑。陽用敗毒之名與服之。服不中滿。瘡亦有效。虛甚者尙加薑桂及附子也。

一男子患腦疽腫高作痛。腫處敷藥痛雖止而色變黯。腫外作痛仍敷之。肉色亦黯。喉肉不痛不腫。此爲涼藥所誤。及盡頸敷之。其頸皆潰而死。

朱丹溪治元杜清碧學道武夷至婺源病腦疽自治不愈。朱往視之曰。何不服防風通聖散。清碧曰。服數次矣。朱曰。盍以酒製之。清碧乃悟。服不盡劑而愈。自此心服丹溪。續醫說

寶材治一人病腦疽六日危篤不進飲食。寶曰。年高腎虛邪氣滯經也。令服救生湯。卽刻減半。夜間再進一服。全安。

一老婦腦後作痛筋拘急實曰此欲發腦疽也急服救生湯
三服全愈

鬢疽

薛立齋治一男子患鬢疽焮腫作痛發熱以小柴胡湯加連
翹金銀花桔梗四劑而消

一男子因怒後鬢際腫痛發熱以小柴胡湯加連翹銀花花
粉桔梗四劑根畔俱消惟瘡頭作痛以仙方活命飲二劑
痛止膿成針之更以託裏消毒藥而愈

一男子頭面焮腫作痛時仲冬脈弦緊以託裏溫經湯汗之

而愈。

一男子患此症腫痛寒熱拘急脈浮數以荆防敗毒散二劑表症悉退更以託裏消毒散潰之而安。

一男子患此症膿熟不潰脹痛針之而止更以託裏消毒散而愈凡瘡膿熟不潰屬氣血虛也若不託裏必致難瘥

一男子患此症作膿焮痛發嘔少食以仙方活命飲一劑而止以六君子湯加當歸桔梗角刺潰而愈

一男子患此症膿清不斂以託裏散加乳香麥冬而斂

一老人患此症腫痛發熱膿清作渴脈軟而澀此血氣俱虛也欲補之彼見作渴發熱乃服降火之劑果作嘔少食復

求治。投六君子湯四劑。嘔止食進。仍用補藥。月餘而愈。夫患者。臟腑血氣上下各有虛實。沉陰症似陽。陽症似陰。豈可以發熱止渴而概用寒涼之劑。常治患者。正氣虛邪氣實。以託裏為主。消毒佐之。正氣實邪氣虛。以攻毒為主。託裏佐之。正氣虛邪氣實。而專用攻毒。則先損胃氣。宜先用仙方活命飲。託裏消毒散。或用灸法。俟邪氣退。正氣復。再酌量治之。大抵正氣奪則虛。邪氣勝則實。蓋邪正不並立。一勝則一負。其虛不待損而自虛矣。若發背腦疽。疔毒。及患在四肢。必用灸法。拔引鬱毒。以行瘀滯。尤不可專于攻毒。診其脈而辨之。庶不有誤。

一男子患此症腫焮痛甚發寒熱服十宣散愈熾診之脈數而實此表裏俱有邪也以荆防敗毒散加岑連大黃二劑少愈更以荆防敗毒散四劑而消大抵瘡瘍之症腫焮痛甚寒熱往來或大便秘結小便淋漓心神潰悶恍惚不寤皆邪熱之實也豈可補哉東垣云瘡疽之法其受之有內外之別治之有寒溫之異受之外者法當託裏以溫劑反用寒劑則是皮毛始受之邪引入骨髓受之內者法當疏利以寒劑反用溫劑託裏則是骨髓之病上徹皮毛表裏通潰共爲一瘡助邪爲毒苦楚百倍輕則危殆重則死矣

趙宜人年逾七十患鬚疽已潰焮腫痛甚喜冷脈實大便秘

澁東垣云，煩躁飲冷，身熱脈大，精神昏悶者，皆臟腑之實也。遂以清涼飲一劑，腫痛悉退。更以託裏消毒藥三十餘劑，而平。若謂年高潰後，投以補劑，實實之禍，不免矣。

維陽俞黃門年逾三十，冬月鬢患毒腫，焮煩躁，便秘脈實。此膽經風熱壅上而然也。馬氏云：瘡瘍之症，熱壅而不利者，大黃湯下之。遂以一劑便通，瘡退。更以荆防散敗毒散二劑，再以十宣散去。桂加花粉銀花數劑而愈。大宗伯羅公耳後髮際患此，焮痛脈緊。數以小柴胡湯加桔梗牛蒡銀花四劑而愈。

頤疽

薛立齋治高舉人年逾三十夏月熱病後患頤毒積日不消
氣息奄奄脈診如無飲食少思大便不禁脈經云脈息如
無似有細而微者陽氣衰也齊氏云飲食不入大便滑利
腸胃虛也遂以六君子湯加炮羌肉豆寇破故紙數劑瀉
止食稍進更加以黃耆當歸肉桂潰而稠水清稀就于前
藥每服加熟附子一錢數劑食進膿亦漸稠再以十全大
補湯用酒芍加白斂月餘而痊

項癰

薛立齋治一守施希祿患項毒膿已成因畏針焮延至胸色赤如霞其脈滑數飲食不進月餘不寐肢體甚倦此氣血虛而不能潰也乃針之膿出卽睡覺而思食用託裏藥兩月而愈劉璽素虛患此不針潰透頰頰氣血愈虛竟不救一婦人項患癰焮痛發寒熱以荆防敗毒散二劑少愈以小柴胡湯加連翹牛蒡桔梗四劑而消一男子項患毒潰而作痛以參耆地黃芩歸補之而止更以八珍湯加黃耆桔梗三十餘劑而愈

馬元儀治沈氏婦，頸項間患瘍，痛甚，躁煩發熱，晝夜不眠，多方不愈。診之，兩脈浮大，沈小。此陽明氣血交虧之候也。陽明之氣，一日一夜五十周于身，而血隨之。氣虛血澁，則病生焉。况所現皆血虛氣衰之症，較之熱毒有餘者，殊矣。用黃耆一兩，當歸五錢，人參三錢，炙草七分，紅花五分，調補氣血，四劑而安。

張子和在西華寄食，子夏官人宅，忽項上病，一病狀如白瘡，瘡腫根紅硬，以其微小不慮也。忽故人見邀，以羊羔酒飲，雞魚醢蒜皆在焉。張以故人不能辭，又忘禁忌，是夜瘡大痛不可忍，項腫及頭，開口發狂言，目見鬼神。夏君甚懼，欲

報其家。張笑曰。請無慮。來日當平。乃以酒調通經散六七錢。下舟車丸百餘粒。次以熱麪羹投之。上涌下泄。一時齊作。各去半盞。明日日中瘡腫已平。一二日膿出而愈。

朱丹溪治王姑丈七十餘。患項疽。脈實而稍大。此因憂悶而生太陽經。治之歸頭二錢。黃柏一錢五分。黃耆羌活地黃酒岑桔梗各一錢。酒連連翹防風生甘草人參陳皮防己澤瀉各五分。白水煎服。

柴嶼青治夏同司鑲黃旗覺羅諱瑪德患對口。人皆謂之落頭疽。難治。柴以爲無害。服藥五十日而愈。後某公亦患前症。亦服藥五十日而安。

姚應鳳診一人項生瘡求治應鳳曰是天蛇頭瘡宿因也三
年頭當自落而斃竟如其言仁和縣志

肩癰

薛立齋治一男子肩患毒焮痛飲冷煩躁便秘脈數而實以
清涼飲二劑少愈以金銀花散四帖悉退又以十宣散去
桂加天花粉銀花數帖瘡潰而痊此脈與症皆有餘也

一婦人癸卯冬失物發怒缺盆內微腫甲辰春大如覆碗左
肩胛亦腫肉色如故或針出鮮血三椀許腹痛如錐泄瀉
不止四肢逆冷嘔吐惡寒或時發熱絕食已七日矣其脈

洪大時或微細。此陽氣脫陷也。用六君加炮羌三錢。附子二錢。早服。至午不應。再劑。加附子五錢。熟睡覺來。諸症頓退。六七少進稀粥。再四劑。諸症悉退。飲食如故。缺盆始痛。針出清膿二碗許。諸症復至。此虛極也。以十全大補加羌桂附各一錢。三劑而安。後減羌桂附各五分。與歸脾湯兼服。五十餘劑而愈。

人舍陳履學之內。先從左肩下一點寒。三日後右肩下發一曰瘡。腫如甌。盅紅如酒盞。自用消解涼藥一劑不散。次投十宣散四劑。加痛畧紅。次連投參耆丁桂防芷之劑。膿潰。後惡心嘔吐。頭暈不上。厥逆寒戰。鼓牙虛汗。頂平。膿清。此

投解散涼劑之候。急洗去圍藥。投以參耆歸朮地黃羌附
大劑一服。原從左肩下舊寒一點先熱起。又進一服。遍腫
浮熱。腫高臃稠。兼絛烏金膏數日。出腐筋如脂膜。大小數
片。日進前藥二服。參耆投至八錢。踰兩月始安。愈後時以
勞厥。卽投參耆歸朮羌附大劑。乃甦。

一男子肩患毒炊痛。飲冷煩躁。便秘脈數。而實以清涼飲二
劑。少愈。以金銀花散四劑。悉退。又以十宣去桂。加天花粉
金銀花數劑。瘡頭潰而痊。

一婦人肩下患毒脈弦緊。以白芷升麻湯二劑。表症已退。更
以託裏藥潰之而愈。

一男子素弱肩患腫欲內消服涼藥反致作瀉少食以二神丸及香砂六君子湯加肉豆蔻而瀉止食進又以託裏藥而腫亦消。

一男子肩下患疽已數日漫腫微痛頭甚多皆如粟許色不變不起發此氣血虛也診其脈果然先以仙方活命飲二劑殺其大勢更以託裏藥而起發瘡頭雖潰但流血水氣血尙虛不能爲膿也彼欲服大乙錠子謂此藥止能攻毒不能託裏不信仍服之至四次飲食不進瘡色黑陷吃逆不絕胃氣虛極也不治強投溫中健脾之劑不應而死

一男子肩患毒腫硬作痛惡症迭見用白礬末三錢糊丸以

葱頭七莖煎湯調下。腫痛悉退。再服諸症亦退。更以仙方
活命飲二劑。出水而消。此祕方名千金化毒湯。曰礬末。葱
湯調服。因未難服。故易爲丸。一方土治瘡疽。不問腫潰。先
用此藥三二服。後用消毒藥甚效。常治芻蕘之人。用此卽
退。不用託裏藥亦愈。蓋此熱毒爲患。血氣不虧。故也。若因
金石毒藥發疽者。尤效。蓋礬又能解金石之毒也。一方用
礬末五錢。硃砂五分。熱酒下亦效。此藥託裏固內。止瀉解
毒排膿。不動臟腑。不傷氣血。有益無損。其藥易得。其功甚
大。偏僻之處。不可不知。此方或蟲犬所傷。溶化熱塗患處。
更以熱酒調未服。皆效。

福泉黃吏部肩患毒發熱惡寒大渴煩躁似有餘之症其脈雖大而無力卻屬不足用當歸補血湯治之愈

王喬年逾三十肩患毒以人參敗毒散一劑更以十宣散去參桂加銀花花粉四劑而潰因怒動肝火風熱上壅頭面赤腫焮痛飲冷以荆防敗毒散加芩連薄荷二劑不應急砭患處出黑血蓋許仍以一劑勢退大半再進人參敗毒散四劑而愈夫病有表裏上下之殊治有緩急攻補之異若不砭刺毒氣結于內裏藥不能及焮腫日甚使投峻利之藥則上熱未除中寒已作必傷命矣

一上舍肩患疽脈數以槐花酒一服勢頓退再與金銀花黃

耆甘草十餘劑而平槐花治溼熱之功最爲神速。若虛寒之人不可過劑。

王洪緒治姚氏女年二十九小產月餘左肩手搭處先發一毒周尺有五半月背添一毒上下長一尺三寸上闊下尖皆白陷十日後始延治勢甚篤連服陽和湯三劑能起坐五劑自能便溺十二劑其續發者全消先發之搭手亦消刺瘡頂如碁子大不痛而潰四日收功後云背上如負一版轉舒不快以小金丹十九每日三進全愈。

臂癰

薛立齋治進士申天益臂患癱寒熱頭痛形氣虛弱此手足
陽明經風熱邪之症用桔梗升麻湯二劑外邪頓散用託
裏消毒散二劑腫痛頓退乃用補中益氣散湯調理形氣
漸復而愈

一婦人臂患腫惡寒不作膿以十宣散六劑而潰以託裏散
數劑而瘳

一婦人臂腫未成膿飲食少思遇勞作痛發熱以補中益氣
湯二劑痛少止補氣血健脾胃藥而消

一婦人臂患毒腫硬咽喉壅塞四肢逆冷發寒熱以五香連
翹湯二劑頓愈以瘡科流氣散四劑而消

一男子臂患癰脈弦緊有力以白芷升麻湯二劑頓退又二劑而消。

一男子臂患癰不作膿炙以豆豉餅及飲託裏藥三十餘劑而潰又月餘而瘳。

一婦人患臂癰瘡口紫陷膿清不斂彼以爲毒未盡欲服攻毒之劑謂瘡瘍之症腫起堅硬膿稠者實也腫下軟慢膿稀者虛也遂以附子餅炙之及飲十全大補湯百劑始愈西蜀彭黃門大安人臂痛數年服活絡丹二九而瘳

朱丹溪治從叔平生多慮質弱神勞年近五十忽左膊外側臙上起一小紅腫大約如粟曰慎勿輕視且先與人參大

料作湯。二三斤爲好。彼未之信。慢進小帖。數服未解而止。旬餘。值大風拔木。瘡上起一道紅綫。繞至背腠。直抵右脾肋。曰必大料人參。少加川芎陳皮白朮等補劑。與之後。與此方。兩閱月而安。

東垣曰。尹老家素貧。已酉歲十月初寒。形志皆苦。于手陽明大腸經分出癰。初有癩。疔其臂外皆腫痛。先腫在陽明。左右寸脈皆短。中得之俱弦。按之洪緩有力。此癰得自八風之變。以脈斷之。邪氣在經脈之表。其症大小便如故。飲食如常。腹中和。口知味。知不在裏也。不惡風寒。止熱躁脈不浮。知不在表也。表裏既和。邪氣止在經脈之中。內經曰。凝

于經絡爲瘡癰。其癰出身半已上。風從上受之。故知是八風之變爲瘡者也。宜治其寒邪。調其經絡中血氣。使無凝而已。以白芷升麻湯療之。一服而愈。炙甘草升麻桔梗白芷當歸稍生地黃生黃芩酒黃芩連翹黃芪肉桂紅花。右咬咀水酒各大盞半同煎服愈。

薛治王揮使臂腫一塊不痛不赤。惟脈軟懶食時嘔。以六君子加藿香酒芍。嘔止食進。再以八珍湯二十餘劑。成膿刺之。又以十全大補而愈。次年傷寒。後此臂仍腫微痛。乃傷寒餘毒也。無表症但虛弱。先用十宣散四劑。取參芪芩歸扶助元氣。防風桔梗白芷厚朴行散腫結。玉桂引經破血。

腫退三四。再以八珍湯膿潰而愈。至冬臂復作痛。因復祛風藥。反筋攣痛甚。此血虛不能養筋。筋虛不能束骨。遂以加味十全大補而愈。

一室女臂患腫潰。久不斂。寒熱交作。五心煩熱。飲食少思。月水不通。與逍遙散。八珍湯。經行瘡愈。一婦人月水不行。潮熱咳嗽。肌體日瘦。胸膈不利。頸腫一塊。日久不消。亦服前藥。熱退腫消。經行而愈。

宋琰年逾三十。臂患癰潰。而不痛。膿稀脈弱。丹溪云。疽潰深而不痛者。胃氣大虛。而不知痛也。東垣云。膿水清稀。瘡口不合。氣血俱虛也。當以大補藥治。彼不聽。服消毒藥。氣血

虛甚遂不救。丹溪云：纔見腫痛，參之脈症，虛弱便與滋補氣血無虧，可保終吉。又云：潰瘍內外皆虛，宜接補爲主。王時亨年逾四十，臂患毒，焮痛作嘔，服託裏消毒藥，愈甚，以涼膈散二劑頓退，更以四物湯加芩連，四劑而消。

王文遠臂患毒作痛，服寒涼藥，遂致食少，大便不實，以理中丸二服，更以六君子湯加砂仁、藿香治之，再以託裏藥。膿潰而愈。大凡瘡痛甚者，如稟厚有火，則宜苦寒之劑；若稟薄者，則宜補中益氣湯加芩連之類；在下加黃柏，人肥而瘡作痛者，用荆防羌獨之類，蓋取其風能勝溼也。

方云：起臂生一疽，膿潰百日方愈，中有惡肉突起，如蠶豆大。

月餘不消，醫治不效。因閱本草得劉涓子鬼遺方，用烏梅肉燒存性研敷。試之一日夜去其大半，再上一日而平。乃知世有奇方如此，遂留心搜刻諸方，始基于此方也。
本草綱目

乳癰乳巖

薛立齋治一婦人因怒，兩乳腫兼頭痛寒熱，此肝經氣鬱症也。用人參敗毒散二劑，表症已退，用小柴胡加芎歸枳殼桔梗四劑而愈。

一婦人因怒，左乳作痛，胸膈不利，此屬肝脾氣滯，以方脈流氣飲加木香青皮四劑而安。

一婦人久鬱左乳內結核如杏三月不消心脈澁脾脈大按之無芳此肝脾氣血虧損以八珍加貝母遠志香附柴胡青皮桔梗五十餘劑而消。

一婦人乳內結核年餘晡熱少食此血氣不足欲用益氣養榮湯彼反服行氣之劑潰出清膿而破又一婦乳內結核如粟亦服前藥大如覆碗堅硬如石出血水而破又郭氏妾乃放出宮人乳內結一核如粟亦以前湯彼不信乃服瘡科流氣飲及敗毒散三年後大如覆碗堅硬如石出水不潰亦歿大抵鬱悶則脾氣阻肝氣逆則成隱核不痛不痒人多忽之最難治療若一有此宜戒七情遠厚味解鬱

結更以養氣血之藥治之庶可保全。否則不救。亦有一二載。或五六載方潰。下陷者。皆曰乳巖。以其形巖凸似巖穴也。最毒慎之。可保十中一二也。

一婦人乳腫而不作膿。以益氣養榮湯加香附青皮數劑而膿成。針之旬日而愈。

一婦人右乳腫發熱。怠惰嗜臥。無氣以動。至夜熱亦甚。以補中益氣湯兼逍遙治之而痊。

一男子左乳腫硬痛甚。以仙方活命飲二劑而止。更以十宣散加青皮四劑。膿成針之而愈。若膿成未破。瘡頭有薄皮。剝起者。用代針之。劑點起皮處。以膏藥覆之。膿亦自出不

若及時針之不致大潰。如出不利更純搜膿化毒之藥。若膿血未盡。輒用生肌之劑。反助邪氣。縱早合必再發。不可不慎也。

一男子年踰五十。憂子不成立。左乳腫痛。左脇脹。腫肝脈弦。數而澁。先以龍薈丸二服。諸症皆退。又以小柴胡對四物。加青皮貝母。遠志數劑。而膿成。欲針之。仍以養氣血解鬱結。彼不從。乃雜用流氣敗毒之劑。致便秘發熱作渴。復請治。謂膿成不潰。陽氣虛不能鼓舞也。便秘發熱。陰血竭不能濡潤也。辭不治。果死。

一男子因怒。左乳腫痛。肝脈弦數。以復元通氣散。二服少愈。

以小柴胡湯加青皮芎歸數劑而消。復元通氣散。木香茴
香青皮甲片陳皮白芷甘草漏盧貝母各等分。每服三錢
溫酒調下。

系文垣姪婦。素有痰涎胸膈痞脹。近因乳腫大發。寒熱欲成
癰。以加味神效瓜蒌散。二帖寒熱退。而腫不消。用貝母白
芷爲臣。瓜蒌爲君。赤芍當歸連翹爲佐。青皮甘草柴胡爲
使。痛稍減。腫仍不消。脈之近數。知已成膿。與內託十宣散
加銀花地丁。二帖而膿潰。因腳上生瘡。且有浮氣。前方去
地丁銀花。加苡仁蒼耳子。調理全安。

薛立齋治王汝道室。年踰三十。每怒後乳內作痛。或腫。此肝

火所致。用小柴胡合四物加青皮、桔梗、香附、枳殼而愈。彼欲絕去病根。自服流氣飲。遂致朝寒暮熱。益加腫毒。此血血被損而然。與八珍三十餘劑。喜其年壯元氣易服。愈一婦人乳內腫一塊如雞子。大勞則作痛。久而不消。服託裏藥不應。此乳勞症也。屬肝經血少所致。先與神效瓜蒌散四劑。更隔蒜炙之。腫稍退。再與八珍湯。倍加香附、夏枯草、地丁。仍間服前散。月餘而消。亦有乳疽一症。其狀腫硬木悶。雖破而不潰。腫亦不消。尤當急服此散。及隔蒜炙之。此症氣血爲七情所傷。亦勞症也。宜戒惱怒。節飲食。慎起居。否則不治。

一婦人患乳癰氣血頗實但瘡口不合百治不應與神效瓜
蔓散四劑少可更與數劑及豆豉餅炙之而愈一婦人患
此未潰亦與前藥三劑而消陳良甫曰婦人乳勞便服此
藥可杜絕病根毒已成能化膿爲水未成者則從大小便
散之。

一人抱病小愈左乳復生癰繼又胸膈間結核其堅如石在
茸半載百藥不能施已而牽掣于肩痛特甚禱于張王祠
夢神語曰但用生薑自然汁製香附服之可也比覺簡本
草視之二物治症相符訪醫者張祿亦云有理香附去毛
薑沖浸一宿爲末二錢米飲調纔數服瘡膿流出腫硬漸

消而愈

槎菴
小乘

朱丹溪治一婦人年六十厚味鬱氣而形實多如夏無汗而性急忽左乳結一小核大如棋子不痛自覺神思不佳不知食味經半月以人參湯調青皮甘草末入生薑汁細細呷一日夜五六次至五七日消矣此乃乳巖之始不早治隱至五年十年已後發不痛不痒必于乳下潰一竅如巖穴出膿又或五七年十年雖飲如故食如故洞見五內乃死惟不得于夫者有之婦人以夫爲天失於所天乃能生此謂之巖者以其如穴之歎呀空洞而外無所見故名曰巖患此者必經久淹延惟此婦治之早消患于未形餘者

皆死凡十餘人。又治一初嫁之婦，只以青皮甘草與之安。
一孺人但經將行而乳腫，先兩日發口乾而不渴，食少減脈。
左弦帶數，右却平。治用四物湯加陳皮白木茯苓，帶熱下
與點凡三十粒。

義一孺人平時乳內有結核不痛，忽乳邊又有一腫核，頗覺
有些痛。黃芩川芎木通陳皮各四錢，人參二錢，白芍一錢。
大腹皮三錢，炙甘草生甘草各一錢，當歸頭一錢，分二帖
煎服。

黃孺人乳腫痛，青皮石膏連翹角刺黃藥子當歸頭木通各
一錢，生甘草三分，入好酒些少同煎飲。又別藥洗腫處。

李東垣治一婦人乳間出黑頭瘡瘡頂陷下作黑眼子其脈
弦洪按之細小升麻連翹葛根各一錢半肉桂三分黃芩
歸身甘草炙各一錢牛蒡五分黃柏二錢水煎至一盞二
服愈

立齋治一婦人患乳癰寒熱頭痛與荆防敗毒散一劑更與
蒲公英一握搗爛入酒二三盞再搗取汁熱服渣熱塗患
處而消丹溪云此草散執毒消腫核又散滯氣解金石毒
之聖藥。

陳良甫云開慶間淦川嘉林曾都運恭人年已五十而病癩
癰後果不起又癸亥年僕處五羊趙經畧夫人年七十一

歲隔一二年。前左乳房上有一塊如鷲卵大。今忽然作楚
召子議藥。僕云。據孫真人云。婦人年五十以上。乳房不宜
見癰。見則不可以治矣。幸而未破。恐是氣瘤。漫以五香連
翹湯去大黃煎服。服後稍減。則已。過六七年後。每遇再腫
脹時。再合服。必消滅矣。

立齋曰。一婦人乳內結核。年餘不消。口乾倦怠。脈澁少食。此
肝脾二經血氣虧損之症。宜培養爲主。乃用草藥數帖。遂
不救。

繆仲淳治顧文學。又善內人。患左乳巖。用夏枯草。蒲公英。爲
君。銀花。漏蘆。爲臣。貝母。桑葉。甘菊。雄鼠。糞。連翹。白芷。紫花。

地丁山茨菰炙草瓜蒌茜根陳皮乳香沒藥爲佐使另用
夏枯草煎濃汁丸之服筋許而消三年後右乳復患用舊
存餘藥服之亦消後以方治數人俱效廣筆記

馬銘鞠治沈氏婦患乳癰潰爛經年不見臟腑者一膜耳用

鼠糞土棟樹子經霜者佳川棟不用露蜂房各三錢俱煨存性各取

淨末和勻每服三錢酒下間兩日一服痛即止不數日膿

盡收斂此方傳自江西取糖客因治祝氏喉症得之廣筆記

張王屋錄後江孟修兄驗過乳癖方白芷一錢雄鼠糞一錢

二種晒乾爲末用好酒調服飲取一醺睡而愈雄鼠糞又尖者是

一神驗方用活鯽魚一個山藥一段如魚長同搗汁敷乳

上以紙蓋之立愈

廣筆記

薛治一婦人乳癰愈後發熱服養氣血藥不應與八珍湯加炮薑四劑而止仍以前湯加黃芪香附三十餘劑血氣平復

薛立齋治一婦年逾二十稟弱乳內作痛頭疼脈浮與人參敗毒散倍加人參一劑表症悉退但飲食少思日晡微熱更以小柴胡湯合六君子湯二劑熱退食進方以託裏藥加柴胡十餘劑針出膿而愈又一婦患此症膿成畏針病勢漸盛乃強針之膿出三椀許脈數發渴以大補藥二十餘帖而愈丹溪云乳房爲隕明所經乳頭爲厥陰所屬厥

陰者肝也。乃女子致命之地。宗筋之所。且各有囊橐。其始
焮腫雖盛。患止於一二囊。若膿成。不針攻潰。諸囊矣。壯者
猶可弱者多。致不救。所以必針而後愈也。

錢國賓治一婦人年五十六歲。左乳患癰已七年。爛過半矣。
中間一孔如桃。時流血水。凡貼膏藥。痛反增劇。以布圈繫
護。防其摩擦。夫乳頭屬足厥陰肝。乳房屬足陽明胃。乃肝
胃二經之症。非單方不足以治。其外非峻補不足以養。其
內以形色氣味治之。用陳香櫞一個。其穰之瓣。如乳內之
房。其色先青而後黃。青屬肝。黃屬胃。其味先酸而後甘。酸
屬肝。甘屬胃。其氣香。能通肝胃之氣。煨黑止血。酒服和經。

此治其乳也。制一枚爲末。作二次服。又用酒炒黃芪二兩。益氣實表。土炒白朮二兩。山藥五兩。健脾收溼。芎歸地芍各一錢。養血水六椀。煎三椀。作四次服。調至一月。痊。論藥入微

可爲格物之法。

王洪緒曰。凡乳巖初起。或乳中。或乳旁。生一小塊。不痛不癢。皮色不變。與癰癤惡核相似。是乃陰寒結痰。總因悲哀憂愁。患難驚恐所致。初起以犀黃丸。每服三錢。酒送下。十服卽愈。或以陽和湯加土貝母五錢煎服。數日可消。倘以膏藥敷貼。必至日漸腫大。內作一抽之痛。便覺難治。若遲至皮色變異。尤難挽回。勉以陽和湯與犀黃丸。早晚輪服。服

至白潰而痛者用大蟾多隻每日早晚取蟾破腹連雜以
蟾身刺孔貼患處內服千金託裏散。人參防風黃芪官桂
白芷厚朴川芎桔梗
草三五日後接服犀黃丸可救十中三四潰後不痛而瘥
極者無一挽回大忌開刀開則翻花最慘萬無一生男女
皆有此症。

王洪緒治一婦乳患白疽寒熱痛甚與以陽和丸同二陳湯
煎服得睡痛息三服全愈又一婦患相同服夏枯草花粉
連翹蘇葉等藥五劑號痛不絕王曰向患白色今變紅色
難以全消矣投以前藥痛止能睡根盤收小連進數劑不
痛而潰貼陽和膏收功陽和丸方肉桂一兩麻黃五錢炮

薑炭五錢水泛爲丸。

一婦兩乳皆患乳巖兩載如桂圓大因子死悲哀忽發如杯以五通丸犀黃丸早晚輪服九日全消五通丸方廣大香麻黃沒藥去油乳香去油五靈脂等分研末飯搗爲丸梧子大每服五錢用川芎當歸赤芍連翹甘草煎湯送下凡

大癰生要緊穴道將發大時服此丸甚效與三黃丸間服

尤妙。

三黃丸熟大黃二兩乳香沒藥各一兩麝香一錢五分西牛黃三分雄黃五錢以熟大黃酒浸搗爛將各

末和入搗丸如梧

子大每服五錢

一男子患乳巖貼鯽魚膏兩日發大如拳色紅王令搗去膏藥與陽和湯四劑色仍紅以陽和湯犀黃丸輪服至十六

日四圍皆消。獨患頂潰。用蟾投毒。三日半月收功。

胸癰

薛立齋治一男子胸患癰腫高。焮痛脈浮而緊。以內託散煎服二劑。表症悉滅。以託裏消毒散四劑而消。

一男子素弱胸患癰。飲食少而倦。以六君子湯加芎歸黃芪。膿成針之。更以託裏藥而愈。

薛立齋治一男子胸患癰。焮痛煩躁。發熱作渴。脈數而實。時季冬。此熱毒內畜也。須舍時從症。欲治以內疎黃連湯。彼以時當隆寒。乃雜用敗毒藥。愈熾。仍求治。投前藥二劑。後

去二次諸症悉退。以金銀花散加連翹山梔四劑出水而消。大抵症有主末。治有權宜。治其主則末自退。用其權則不拘于時。泥於守常必致病勢危甚。况慣用攻劑。動損各經。故丹溪云。凡瘡發於一經。只當求責本經。不可干擾餘經。羅謙甫曰。守常者。眾人之見。知變者。智者之事。知常而不知變。細事因而取敗者多矣。

一男子胸患毒。焮痛怕冷。脈洪數。以黃連解毒湯二劑頓退。更以金銀花散六劑而消。

一少婦胸膈間潰一竅。膿血與口中所咳相應而出。以參耆

當歸加退熱排膿等藥而愈。

余按此因肺痿所致原注

張都憲夫人性剛多怒胸前作痛肉色不變脈數惡寒經云
洪數之脈應發熱而反惡寒瘡疽之謂也今脈洪數則膿
已成但體豐厚故色不變似乎無膿以痛極始肯用針入
數寸膿出數椀遂以清熱消毒藥治之而愈設泥其色而
不用針無可救之理矣。

琇按肝脈挾胃貫膈又曰是所生病者爲胸滿故胸之
癰疽本由於肝也

楊百戶胸患毒腫高焮赤發熱脈數大小便澁飲食如常齊
氏曰腫起色赤寒熱疼痛皮膚壯熱頭目昏重氣血之實
也又云大便硬小便澁飲食如故腸滿膨脹胸膈痞悶肢

節疼痛。身熱脈大。精神昏塞。臟腑之實也。遂以黃連內疎湯二劑。諸症漸退。更以荆防敗毒散。加芩連山梔四劑。少愈。再以四物加芩連白芷桔梗甘草銀花數劑而愈。

一男子胸腫一塊。半載不消。令明炙百壯方潰。與大補藥不歛。復炙以附子餅而愈。

張路玉治談仲安。體肥善飲。夏患壯熱嘔逆。胸膈左畔隱痛。手不可拊。便溺澁數。舌上滑胎。食後痛嘔稠痰。漸見血水。脈來澁澁不調。與涼膈散加石斛連翹。下稠膩極多。先是醫作肺癰治。不效。張曰。肺癰必咳嗽吐腥穢痰。此但嘔不嗽。洵爲胃病無疑。下後四五日復嘔如前。再以小劑投之。

三十而勢甫平。後以保元苓橘平調二十日而痊。先時有李姓者患此。專以清熱豁痰解毒爲務。直至膈畔潰腐。膿水淋漓。纏綿匝月而斃。良因見機不早。悔無及矣。

琇按此症最難別白。卽內經所謂內有裹大膿血之症也。吾鄉一名醫自患此。同道診之。不知爲癰也。雜進參附丁桂之劑。久之吐出臭膿。乃省已無及矣。

脇癰

薛立齋治一婦人脇患癰。未成膿。惡寒脈緊。以十宣散加柴胡二劑。表症悉退。更以託裏散數劑。膿清而愈。

一男子近脇患疽腫而不潰投大補之劑潰而已愈後患弱症而沒

薛立齋治一上舍年逾四十因怒脇內作痛不止數日後外結一塊三寸許漫腫色不赤按之微痛此怒氣傷肝致血傷氣鬱爲患以小柴胡湯對四物倍用芎歸黃芩貝母肉桂治之彼謂丹溪云腫瘍內外皆癰宜託裏表散爲主又云凡瘡未破毒攻臟腑一毫熱藥斷不可用况此症爲氣血凝滯乃服流氣飲愈虛始信而復求治視之虛症併臻診之胃氣更虛彼欲服薛前藥曰急者先治遂以四君子湯加酒芍炮薑四劑少得更加當歸又四劑胃氣漸醒乃

去薑又加黃芪芎歸肉桂。數劑瘡色少赤。并微作痛。又二十餘劑。膿成針之。却與十全大補湯。喜其謹疾。又兩月餘而瘳。夫氣血凝滯。多因營衛之氣弱。不能運散。豈可復用流氣飲。以益其虛。況各經氣血多寡不同。心包絡膀胱小腸。肝經多血少氣。三焦膽腎心脾肺。少血多氣。前症正屬膽經少血之臟。人年四十以上。陰血日衰。且肝症俱屬不足。腫瘍內外皆壅。宜託裏表散為主。乃補氣血藥。而加以行散之劑。非專攻之謂也。若腫焮痛甚。煩躁脈大。辛熱之劑。不但腫瘍不可用。雖潰瘍亦不可用也。凡患者須分經絡氣血地步遠近。年歲老幼。稟氣虛實。及七情所感。時令。

所宜而治之常見以流氣十宣二散。概治結腫之症。以致

取敗者多矣。此案與舊案東侍御一則正同而此之發明最為緊要而舊案節之故重錄於此

馬元儀治沈氏婦左脇患腫瘍長五寸許。治已兩月發表託

裏劑多功少。診其兩脈弦數兼澁。腫處低陷作痛。寒熱經

行不止。口燥艱食。此症頗危。必得之勞鬱且怒。邪熱結聚

厥陰之位。榮衛不行。周身火邪。獨徹上下。表歛俱所不宜。

用生首烏一兩。滋其內燥。柴胡一錢。疎其氣。忽。枳壳。桔梗

各一錢。舒通肺氣。以制肝木。杏仁。蘇子各二錢。調氣化痰。

以清上焦。丹皮一錢。清其血。半夏。麴一錢。和其中。兩劑寒

熱減而經止。患處焮腫潰稠膿。飲食少進。瘍醫以潰後當

行大補。投耆朮之屬。復致瘡口內陷。食少。曰癰疽已潰。當補。此其常耳。今兩脈遲澁。遲則氣滯。澁則血滯。鬱而得補。其鬱彌甚。始猶肝木自傷。既乃轉戕脾胃。以不循常度。分肉不溫。經隧不行。而欲瘡之斂也。其可得乎。夫榮不通。須以血藥和之。當歸。桃仁。紅花。延胡索是也。白朮。枳殼。一補一瀉。所以推陳氣。以致新氣。乾薑。煖胃而和血。查肉。消滯而和中。服二劑。復大潰。出稠膿。碗許。食進。神旺而安。名三言至理

須細參之

朱丹溪診李兄年四十餘。而面稍白。神氣勞甚。忽脇下生

癰腫如桃。一人教用補劑。懷笑阻之。於是流氣。飲十宣散。

襍而進之。旬餘召視之曰。非惟不與補藥。抑且多得解利。血氣俱憊。不可爲矣。已而果然。

立齋曰。一男子因怒。左脇腫一塊。不作痛。脈澁而浮。此肝經邪火熾甚。而真氣不足爲患。宜培養氣血爲主。乃用草藥數帖。遂致不救。

一男子因勞發熱。脇下腫痛。脈雖大而按之無力。此氣血虛。腠理不密。邪氣襲於肉裏而然也。河間云。若人飲食疎精。神衰氣血弱。肌肉消導。榮衛之氣短促而澁滯。故寒薄腠理而癰腫也。當補之以接虛怯之氣。遂以補中益氣湯加羌活四劑。少可去羌活。又十餘劑而愈。又一男子年二十

遍身微痛。腰間作腫痛甚。以前藥加茯苓半夏並愈。

一朝士腹脇間病疽。經歲或以地骨皮煎湯淋洗。出血一二升。家人懼欲止之。病者曰。疽似快。更淋之。有五升許。血漸淡。乃止。以細穰貼之。次日結痂而愈。全上

張子和治襄陵馬國卿左乳二肋間。期門穴中發痛硬而不潰。痛不可忍。瘍醫皆曰。乳癰。或曰。紅絲漏。或曰。鬩心瘡。使服內託數百日。又服五香連翹湯數月。皆無驗。張曰。此馬刀也。足少陽膽經之病。出靈樞十二經以示之。其狀如馬刀。故曰馬刀。堅而不潰。乃遷之於食肆中。使食浸湯餅。稍覺緩。次日先以滄鹽上涌。又以涼劑滌去熱勢。約十數行。

腫已散矣

朱葛黃家妾左脇病馬刀憎寒發痛已四五日矣張曰此足陽少陽膽經病也少血多氣堅而不潰不可急攻當以苦劑涌之以五香連翹湯託之既而痛止然瘡根未散有一道人過見之曰我有妙藥可潰而爲膿不如此何時而愈既經毒藥痛不可忍外寒內嘔血不止大便黑色飲食不下號呼悶亂幾于死再求治張曰脇間皮薄肉淺豈可輕用毒藥復令洗去以涼劑下之痛立止腫亦消

腋癰

薛立齋治一童子腋下患癰久不斂膿清脈大倦怠懶食少寐自汗口乾以內補黃芪湯及豆豉餅炙之兩月而愈凡瘡膿潰而清或瘡口不合或聚腫不赤肌肉寒冷自汗色脫者皆氣血俱虛也非補不可

一男子腋下患毒欬逆不食腸鳴切痛四肢厥冷脈細以託裏溫中湯二劑頓愈更以香砂六君子湯三神丸而飲食頓進以十全大補湯二十劑而斂

里中有周七者少年曾患毒左腋下得一異方用糯米炊飯乘熱入鹽塊夾葱管少許搗極爛如膏貼患處輒消至中年腰間忽生一毒熱如火板硬痛不可忍偃僕跣躄自分

必死。屢藥不效。急思前方。如法貼之。未幾大便去糞如宿垢甚多。硬者漸軟。數日而起。

薛立齋心法治河南張承祖年逾二十腋下患毒十餘日腫硬不潰脈弱時嘔謂腫硬不潰脈弱乃陽氣虛嘔吐少食乃胃氣弱先以六君子湯加藿香砂仁治之彼謂腫瘍時嘔當作毒氣攻心治之潰瘍時嘔當作陰虛補之曰此丹溪大概之言也。卽諸痛痒瘡皆屬心火之意。假如赤腫痛甚煩躁脈實而嘔。爲有餘法當下。不腫硬不痛不潰脈弱而嘔。爲不足法當補之。亦有痛傷胃氣或感寒邪穢氣而作嘔者。雖腫瘍尤當助胃壯氣。彼執不用信用攻伐之藥。

病愈甚復請診。其脈微細而發熱。謂熱而脈靜脫血脈實。汗後煩躁者皆難治。後果然。夫腫瘍毒氣內侵作嘔。十有二潰瘍濕氣內侵作嘔。十有八九。豈可混爲一途。

朱文鼎母因忿鬱腋下結一核。二十餘年。因怒加腫痛完穀不化。飲食少思。東垣云瀉利不止。飲食不入。此腸胃虛也。遂以六君子湯加砂仁肉桂乾薑肉豆蔻瀉雖止而膿清。瘡口不合。氣血虛也。以十全大補湯月餘而愈。

一男子年逾五十。腋下患毒瘡口不合。右關脈數而渴。此胃火所致。用竹葉黃耆湯遂止。再用補氣藥而愈。嘗治午後發渴。或發熱。用地骨皮散亦效。

胃腕癰

張隱菴曰順治辛卯歲予年四十有二八月中生一胃腕癰在鳩尾斜下右寸許微腫不紅按之不痛隱隱然如一雞卵在內姚繼元視之曰此胃腕癰也一名捧心癰速宜解散否則有性命之憂與一大膏藥上加未藥二三錢中間烘貼至暮手足蘇軟漸至身不能轉側仰臥于書齋心煩意亂屏去家人至初更時癰上起一毒氣從左乳下至肋下脇入于左腎入時如燒錐刺入眼中一陣火光如車輪神氣昏暈痛楚難言火光漸搖漾而散神昏始蘇過半

時許其氣復起。其行如舊痛楚如前。如此者三四次。予思此戊與癸合也。腑邪入臟。自分必死。忘想此毒氣不從脇下入腎。得從中而入於腸胃。則生矣。如此靜而行之。初次不從二次。卽隨想而仍從左乳下。入于腸中。腹中大鳴。無復前痛楚矣。隨起隨想。因悟修養之道。氣隨想而運用者也。至天明大泄數次。胸膈寬舒。繼元先生視之曰。毒已散解。無妨事矣。予問曰。膏藥乃毒藥耶。曰。上撒之末藥。名端午藥。純用砒霜巴豆。于端午日配制。無此毒藥。焉能透入皮肉之內。予曰。何不早言。昨晚以爲必死於毒。今早始悟膏藥中必有毒藥。而得生於毒矣。毒藥攻疾。有如此之妙。

也。至次年中秋復發。仍用膏藥末藥。毫無前番之狀。腫亦不消。予因想運氣之妙。經行坐臥。以手按摩。意想此毒仍歸腸胃而出。如此十餘日而散。至次年中秋又發。予謂繼元先生曰。去歲膏藥不應。今須合法治之。姚曰。部院劉公之夫人。生此疾。曾另置末藥。比前更毒。貼之要起大泡。此藥用之。無有不驗。貼之數日。並不起泡。腫亦不消。予想此症已頑。不受毒藥之制。卽搗去膏藥。用大艾圓迎頭灸。壯其毒。隨火氣四散。嗣後永不發矣。予想陽明之毒。准在中秋金旺之時。而發。初從毒攻。而解。次隨氣運而散。後因勝制而消。因悟氣運制化之道。有如此之妙。用五行合化。

之理人與天地相參卽以此理推治百病。奇妙異常。王紹隆先生曰。業醫人須病病經過始得之矣。

王洪緒曰。井泉疽生於心口。又名慢心銳毒。初起若心口內有塊漸大。心口發高。毒陷卽死。此醫家縮手之症。諸書亦無治法。惟余家秘集載以本人兩手十指。以線量以長短。共積其線。在喉管正中處。雙環至背脊之中。看兩線頭盡處爲中穴。又以本人之中指中一節用柴心量准。作一寸。中穴之左右各遠一寸。各以墨記。分立三穴。如品字狀。每穴用艾灸三大壯。齊火灸。灸則全愈。

凡以久入三大...

...

...

...

...

...

...

...

續名醫類案卷三十一終

1664

續名醫類聚卷三十二

錢塘魏之琇編集

海昌王士雄孟英
定州楊照藜素園 同校

發背

精要論背疽其源有五
一怒氣四腎氣虛五飲冷酒食氣滯
腫母藥

元末嘉興桐鄉縣後朱村徐通判素慕洞賓朝夕供禮一日
疽發於背勢垂危猶扶起禮之如昔偶見淨水盂下白紙
視之有詩云紛紛墓土黃金屑片片花飛白玉芝君主一
斤臣四兩調和服下即平夷意其仙方然不知何物為黃
金白玉乃召仙以大黃白芷為問仙曰然服之果驗後以

之醫人無不效。徐無子方竟傳婿沈氏。至今沈以此治生。數百里來貨藥者無虛日。族大而分數十家。惟嫡枝居大椿樹下者。藥乃驗。沈子嘗從吾友俞院判學。嘗聞其藥。今加川山甲當歸鬚金銀花矣。然大黃既多。以下爲主。不問陰陽之毒而投之。恐亦有害者。然源源往醫。又獨於椿樹下者。驗豈非天固與之乎。

七修類編

京師萬勝門生員王超。忽覺背上如有瘡隱。倩人看之。已如盞大。其頭無數。或教往梁門裏外科金龜兒張家買藥。張視頰眉曰。此瘡甚惡。非藥所能治。只有灼艾一法。庶可冀望。萬分然恐費力。乃撮艾與之曰。且歸試灸瘡上。只怕不

疼直待灸疼方可療耳。灼火十餘殊不知痛。妻守之而哭。至第十三壯始大痛。四旁惡肉捲爛。隨手墮地。卽以稍愈。再詣張謝。張付藥數貼。日安。則知癰疽發於背脇。其捷法

莫如灸也。

類編

王敏診一人發背不起。醫言起則治矣。敏曰是擊指脈。卽起

亦不治。眾劫以艾。疽起如粟。眾曰無傷矣。竟三日死。

姑蘇志

治發背腦疽。一切惡瘡。初覺時。採獨科蒼耳一根。連葉帶子。

細剉。不犯鐵器。用砂鍋熬水。二大碗。熬及一半。瘡在上。徐

徐飯後服之。吐出。候吐定。再服。以盡爲度。瘡在下。空心服。

瘡自破出膿。更不潰爛。瘡上別以膏藥傅之。此方京兆張

伯王家勝示傳人。後昆仲皆登第。人謂善報。

元遺山續
夷堅志

大凡石類。多主癰疽。世傳麥飯石膏。治發背瘡甚效。乃中岳山人呂子華秘方。裴員外啖之以名第。河南尹齋之以重刑。呂寧絕榮望。守死不傳其方。取此石碎如碁子。炭火燒赤。投米醋中浸之。如此十次。研末篩細。入乳鉢內。用數人更碾五七日。要細膩如麵。四兩鹿角一具。要生取連腦骨者。其自脫者不堪用。每二三寸截之。炭火燒令煙盡。卽止。爲末研細。二兩白斂生研末二兩。用三年米醋入銀石器內煎令魚目沸。旋旋入藥。在內竹杖子不住攪。熬一二時久。稀稠得所。傾在盆內待冷。以紙蓋收。勿令塵入。用時以

鷺翎拂膏於腫上四圍赤處盡塗之中留錢大洩氣如未
有膿卽內消。已作頭卽撮小。已潰卽排膿如湍水如病久
肌肉爛落。見出筋骨者卽塗細布上貼之。乾卽易逐日瘡
口收斂。但中隔不穴者卽無不瘥。已潰者用藥時先以猪
蹄湯洗去膿血。用帛搥乾乃用藥。其瘡切忌手觸動嫩肉
仍不可以口氣吹風。及腋氣月經有孕人見之合藥亦忌
此等初時一日一洗一換。十日後二日一換此藥極細。方
有效。若不細塗之卽極痛也。此方千金月令已有之。但不

及此詳細耳。

本草綱目

馮楚瞻治。蔣司農向來脈氣寸強尺弱。故服八味丸已有年

矣。此等脈多陰虛火上炎之候。凡久服八味丸者多貽後患。然過勞藥力不能勝其妄

動之火鼻衄大作。調理雖愈而口渴殊甚。飲湯水如甘露

然。即數十杯不足滿其欲也。此即消渴久成癰疽。勸服大劑壯水佐

以引火歸原之餌。則水升火降。消渴自除。變症可弭。乃忽

之。雖服數劑。渴畧減。藥即停。至初夏背上忽隱隱痛癢。漸

甚而肉硬。半月餘痛極重。及診之。當脊少偏半寸外不腫

肉分堅實如椀大矣。日久渴不治。陰水日虧。陰火日熾。書

所以有腦疽背疽之兆也。亟為托出陽分。使毒氣勿致逗

遛內陷為要。乃外用大黃二兩。芙蓉葉赤芍各一兩。白欬

白芨各五錢為末。雞子清調敷毒四圍。內則重滋陰水加

熟地山藥土貝角刺天蟲甲片生甘草連翹金銀花之類。及腫既成。乃早吞八味丸五六錢。以培先天之水火。食遠服參耆歸芍朮草銀花甲片天蟲角刺白芷之類。以助後天之氣血。外以太乙膏。加男髮草麻子乳香沒藥煎膏貼之。以呼毒氣外出。不旬日紅腫消痛重減。瘡已熈高。已有膿勢。乃一外科改絃易轍。幾至內潰。再亟治。仍用前法煎藥加肉桂錢許。仍高腫紅活。竟如些小之毒。潰膿而愈。

高鼓峰治一鄉人患發背。上距風府。下連腎俞。通塊腫起。肌肉青冷。堅硬如鐵。飲食俱廢。不省人事。醫猶用解毒藥。脈之六部細數。氣血大虧。毒將內陷矣。急用養榮湯加附子

炮薑三大帖而胃氣開。十劑而堅硬者散去十之八九。只左邊如茶鍾大焮紅作腫。戒之曰：切莫箍藥及刀針。氣血溫和毒當自出。箍則反遲。非時而刺收口難矣。彼以不任痛竟受刺出血。曰：當倍前藥急服。以收口爲度。仍戒以節嗜慾慎飲食。兼服還少丹八味丸而愈。

朱丹溪曰：子見吳兄厚味氣鬱而形實性重。年近六十患背疽醫與他藥皆不行。惟香附末飲之甚快。始終只此一味。腫潰恃此以安。此等體實千百而一見者也。

名獨勝散惟氣滯血凝實

症宜之。

樓氏婦早寡善飲啖形肥偉性沈毒年六十六七月間生背

疽近正脊醫遂橫直裂開取血雜以五香十宣散與酒飲之月餘未嘗議其寡居之鬱酒肉之毒執著之滯時令之熱迨至於平陷淹延兩三月而不救。

江陵府紫極觀掘得石碑載此凡人發背欲結未結赤紅腫痛先以濕紙覆其上立視候其紙先乾處則是結癰頭也。取大蒜切成片如當三錢厚安頭上用大艾炷灸之三壯即換一蒜片痛者灸至不痛時住不痛者灸至痛時方住。早覺早灸爲上。如有頭似麻豆大者不須用濕紙覆法。若有十數頭聚而在一處生者即用大蒜頭搗膏作薄餅鋪頭上聚艾於餅上

燒之。

一二日十灸十活三四日六七活五六日三四活。

王遠發背方序云元祐三年夏四月官京師疽發於背召國
 醫治之逾日勢益甚得徐州蕭縣人張生以艾火加瘡上
 自旦及暮凡一百五十壯知痛方已明日鐫去黑痴膿盡
 潰肉裏皆紅亦不復痛始別以膏藥貼之日一易焉易時
 旋翦去黑爛肉許瘡乃平是歲秋夏間京師士大夫病疽
 者七人余獨生此雖司命自然固有定數不知其方遂至
 不幸者以人意論之可為慨然于是撰次前後所得方模
 板以施庶幾古人濟眾之意

此即當頭灸法
 但不用蒜耳

史源母氏背胛間微痒視之有赤半寸許方有白粒如粟黍
 乃急著艾炙其赤隨消二七壯而止信宿復覺微痛視之

有赤下流長二寸。濶如蕤葉。舉家皆以前灸爲悔。或云等
慈寺尼智全者。前病瘡甚大。得灸而愈。奔問之。全曰。劇時
昏不知。但小師輩言。范八奉議守定灸八百餘壯。方甦。約
艾一篩耳。亟歸白之。見從。始以艾作炷。如銀否大。灸其上
十數。殊不知痛。乃截四旁赤引。其炷減四之三。皆覺痛。七
壯後覺痒。每一壯燼。則赤隨縮入。灸至二十餘壯。赤暈收
退。病者不憚。遂以艾作團。大炙其上。漸加至雞黃大。約四
十團。方覺痛。視火焦處已寸餘。蓋灸之遲。而初發處肉已
壞。壞肉成隔。直至好肉。方痛。四旁知痛。肉未壞也。病者六
夜不寐。至是食粥安寢。至晚視之。瘡如覆一甌。突高三四

寸上有百數小竅。色正黑。突然高者。毒氣出外而聚也。百數小竅。毒未聚而浮攻肌膚也。色正黑者。皮與肉俱壞也。非灸火出其毒于壞肉之裏。則五臟逼矣。

薛立齋治王通府。患背發十餘日。勢危。脈大。先與槐花酒二服。殺退其勢。更以敗毒散二劑。再以托裏藥數劑。漸潰。又用桑柴燃灸患處。每日灸良久。仍以膏藥貼之。灸至數次。膿潰腐脫。以托裏藥加白朮陳皮。月餘而愈。

劉大尹發背六七日。滿背腫痛。勢甚危。與隔蒜灸百壯。飲槐花酒二碗。卽睡覺。與托裏消毒藥十去五六。令以桑枝灸患處而潰。數日愈。凡灸及飲槐花酒。則托裏之效甚速。

一園丁患發背甚危。令取金銀藤五六兩搗爛入熱酒一鍾。絞取酒汁溫服。渣罨患處。四五服而平。彼用此藥治瘡。足以養家棄園業。諸書云。金銀花治瘡瘍未成者。卽散。已成者。卽潰。有回生之功。

大監劉關患發背。腫痛色紫。診其脈息沈數。陳良甫云。脈數發熱而痛者。發于陽也。且瘡瘍赤甚則紫。卽火極似水也。詢之。嘗服丹藥半載。乃積溫成熱所致耳。遂以內疏黃連湯再服。消平。更用排膿消毒藥及猪蹄湯太乙膏而愈。經曰。色與脈當相參。應治之者在明。亢害承制之理。陰陽變化之機焉耳。

一男子年逾五十患發背色紫腫痛外皮將潰寢食不安神思甚疲用桑柴灸患處出黑血卽甦睡覺而諸症如決服仙方活命飲二帖又灸一次膿血皆出更進二劑腫痛大退又服托裏消毒散數帖而斂夫瘡毒熾甚未宜峻劑攻之但年老血氣衰弱况又發在肌表若專于攻毒則胃氣先損必反誤事

吳江申僉憲患背疽堅硬脈沈實乃毒在內用宣毒散大黃五錢煨白芷五錢水煎食前服一劑大小便下污物再服而消此方乃宣通攻毒之劑脈沈實便秘者其功甚大

琇按卽首條黃金白玉方薛用之而不詳其出處

大尹陳國信素陰虛患背疽用參芪大補而不斂內熱發熱
舌燥唇裂小便少頻數口乾飲湯嘔吐瀉利耳閉目盲仰
首眩暈脈浮大而數薛曰瘡口不斂脾土敗也舌燥唇裂
腎水枯也小便頻數肺氣衰也內熱發熱虛火上炎也口
乾飲湯真寒之象也嘔吐瀉利真火衰敗也耳閉目盲肝
木枯散也仰首眩暈腎氣絕也辭不治後果歿。

琇按不拘內外病凡陰虛者服參耆諸氣分藥非惟無
益而反害之據此症純屬三陰虧竭若初時解用二地
一二冬杞子歸芍之輩猶可挽也。

吳庠史邦直之內仲夏患背疽死肉不潰發熱痛甚作嘔少

食口乾飲湯脈洪大按之如無此內真寒而外假熱當捨
時從症先用六君加炮薑肉桂四劑飲食頓進復用十全
大補湯仍加薑桂之類五十餘帖而吃肉潰又五十餘劑
而新肉生斯人血氣充盛而瘡易起易斂使醫者逆知預
爲托裏必無此患

雄按十全大補必毒
火盡除而後可用

南儀部賀朝卿陞山西少參別時見其唇鼻青黑且時搔背
問其故曰有小瘡耳與視之果疽也此脾胃敗壞爲不治
之症薛素與善悲其途次不便殞殮遂托其僚友張東沙
輩強留之勉與大補但出紫血虛極也或謂毒熾不能爲
膿乃服攻毒藥一鍾以致嘔逆脈脫果卒於南都

京兆柴繡菴仲夏背發色黯微腫發熱煩躁痰涎自出小腹陰實手足逆冷右關浮澁兩尺微細曰此虛寒之症也。王太僕云大熱而不熱是無火也。決不能起。懇求治之用大溫補藥一帖。流涎雖止。患處不起。終不能效。

憲副屠九峰孟春患此色黯漫腫作渴便數尺脈洪數此腎水乾涸當歿於火旺之際不信。更用苦寒之藥。復傷元氣。以促其歿。

一男子不慎房勞背脾腫高三寸許。澗經尺餘自汗盜汗內熱發熱口乾飲湯脈浮大。按之弱澁。此陰虛氣節爲患。用十全大補。加五味麥冬山萸山藥。四劑諸症悉退。後乃別

用流氣飲一帖。虛症悉具。腫硬如石。仍以前藥六劑。始得愈。

一儒者背腫一塊。按之則軟。肉色如故。飲食如常。勞則吐痰。體倦。此脾氣虛而痰滯。用補中益氣。加茯苓半夏。少加羌活。外用陰陽散。以薑汁調搽而消。後因勞頭暈作嘔。仍以
前藥去羌活。加生薑蔓荊子而愈。

節推王器之背患疽。瘡頭如黍。焮痛背重。脈沈而實。此毒在內。服黃連內疏湯二劑。少退。更與仙方活命飲而愈。

舉人劉華甫。焮腫作痛。脈浮而數。此毒蓄於經絡。用內托復煎散二劑。而焮腫作痛。用仙方活命飲四劑。而腫痛止。更

用托裏藥而愈。

一儒者患背疽腫焮痛甚。此熱毒蘊結而熾盛。用隔蒜灸而痛止。服仙方活命飲而腫消。更與托裏藥而潰愈。

一男子患背疽腐肉雖潰而新肉不生。此毒氣解而脾胃之氣虛也。用六君子加芎歸五味黃芪漸愈。用十全大補湯全愈。

一男子背患疽腫痛赤暈尺餘。背如負石其勢當峻攻其脈。又不宜遂用針砭。赤處出紫血碗許。腫痛頓退。更用神功散。及仙方活命飲二劑。瘡口及砭處出血水而消。

一男子背患疽肉腐膿清。肌肉不生。此邪去而氣血俱虛也。

用十全大補湯。月餘而斂。

通府張廷儀背患疽。作嘔。嗽痛。大便秘結。口乾作渴。此內蘊熱毒。用竹葉石膏湯二劑。諸症頓退。用托裏消毒散。四疔腫消。用仙方活命飲。瘡亦尋愈。

一男子背瘡潰而瘀血不散。此陽氣虛弱也。用參耆歸朮峻補。更以桑枝炙。又用托裏散加肉桂。瘡口自斂。補接陽氣之法也。

一男子背瘡漫腫微痛。食少體倦。此症屬形病俱虛。法當補元氣爲主。彼不信。乃用攻毒之劑。中央肉黯五寸許。惡症悉具。復求治。曰此胃氣虛寒而變症作矣。當急溫補脾胃。

則惡症自退。黯肉自生。仍不信。乃割死肉。祛惡症。遂至不起。

水部曹文兆背胛患之。半月餘。瘡頭如粟。且多內痛。如刺。其脈歇止。此元氣虛而疽蓄於內。非灸不可。遂灼二三十壯。飲以六君加藿香。服數劑。瘡勢漸退。內痛頓去。胃脈漸至。但瘡色紫。瘀肉不潰。此陽氣虛也。燃桑枝灸患處。以解散其毒。補接陽氣。仍以前藥加參耆歸桂。色赤膿稠。瘀肉漸腐。兩月而愈。夫邪氣沈伏。真氣怯弱。不能起發。須灸而兼大補。若投以常藥。待其自潰。鮮有不誤者。

黃汝耘患發背。用生肌散太早。益潰大便泄瀉。其脈微緩。此

脾胃虛也。用二神丸以止其瀉。次用大補藥以固其本。更用猪蹄湯洗患處。用黃芪末以塗其外。喜其初起曾用艾炙毒不內攻兩月而愈。

許鴻臚發背十餘日。腫硬木悶。肉色不變。脈沈而實。此毒在內。先以黃連內疏湯。更以消毒托裏藥。其毒始發。奈欲速愈。急用生肌藥。患處如負石。身如火熾。遂致不起。

李氏云。龍游有患背疽者。大潰五臟。僅隔膜耳。自謂必死。用鯽魚去腸實。以羯羊糞烘焦為末。乾糝之。瘡口自收。此出洪氏方。屢用有效。故附于此。復候膿少。欲生肌肉。時用之。

耳。陳自明外
科精要

江陰舉人陳鳴岐寓京患背疽用大補之劑而愈翌日欲回

先期設席作謝對談如常是晚得家信大拂其意惱怒發

熱作渴食梨子少許至夜半連瀉數次早促薛視脈已脫

矣竟至不起夫梨者利也疏利下行之物凡脾胃虛寒產

婦金瘡者皆當忌之所云大補之劑必參者也大瘡之後

然致變乃歸咎於食梨何其善於諉罪耶

琇按其人瘍初愈元氣未復因怒而動厥陽之火致發

熱作渴其肝木之蹶張不待言矣木盛尅土非嘔即瀉

少許梨子何遽云爾

陳自明治一男子患發背瘡頭如粟重如負石以神仙太乙

丹內服外塗。後去三四次。每去肛門如炙。不日而瘳。

一婦人患此症。腫痛發熱。睡語脈大。用清心湯一劑而安。以

金銀花甘草天花粉當歸瓜萸黃芪數劑漸潰。更以托裏

藥而愈。

方最平穩

一男子患此症已愈。惟一眼翻出。努肉如血。卽名翻花瘡三月不

愈。乃傷風寒也。以生豬脂調藜蘆末塗之。卽愈。亦有努出

五寸許者。尤宜用此藥也。烏梅塗之亦效。但緩。硫黃亦可。

一男子背患毒。焮痛。飲冷發熱。多汗便秘。譫語。以破棺丹二

九而寧。以金銀花散四劑。膿成開之。更用托裏藥而愈。

一婦人患此症。膿成。脹痛不安。針之投托裏消毒藥。卽愈。大

抵發背之症。雖發熱癢痛形勢高大。煩渴不寧。脈若有力。飲食頗進。可保無虞。其膿一潰。諸症悉退。多有因膿不得外泄。以致疼痛。若用敗毒寒涼攻之。反致誤事。若有膿卽針之。膿一出。苦楚卽止。膿未成而熱毒作痛者。用解毒之藥。亦有腐潰尺餘者。若無惡症。投以大補之劑。肉最易生。亦無所妨。惟忌腫不高。色不赤。不焮痛。脈無力。不飲食。腫不潰。腐不爛。膿水清。或多而不止。肌肉不生。屬元氣虛也。皆難治。宜峻補之。其或膿血旣泄。腫痛尤甚。膿水腥臭。煩躁時嗽。腹痛渴甚。瀉利無度。小便如淋。乃惡症也。皆不治。

徐靈胎曰。峻補必兼托毒。亦不全在參附。

一弱婦患此症，外皮雖腐，內膿不潰，脹痛煩熱不安，謂宜急開之。膿一出，毒即解，痛即止。諸症自退，待其自潰，不惟疼痛潰爛愈深，彼不從，待將旬日，膿尚未出，人已痛疲矣。雖針之，終不能收斂，竟至不起。

一男子患此症，潰而瘀肉不腐，欲取之，更以峻補，一婦皆弱未成膿，大痛發熱，謂須隔蒜灸，以拔其毒，令自消，皆不從，俱致不救。常治不問日期，陰陽腫痛或不痛，或痛甚，但不潰者，即與灸之。隨手取消，勢未定者，先用菴藥圍之。若臣烏金膏，或援生膏貼患處數點，尤好。若頭痛拘急，乃表痛先服人參敗毒散一二帖。如焮痛發熱脈數者，用金銀花

散。或槐花酒。神效。托裏散。如疼痛腫硬脈實者。以清涼飲。仙方活命飲。苦參丸。腫硬木悶。疼痛發熱。煩躁。飲冷便秘。脈沈實者。內疏黃連湯。或清涼飲。大便以利。欲其作膿。用仙方活命飲。托裏散。蠟礬丸。外用神異膏。如飲食少思。或不甘美。用六君子湯加藿香。連進三五劑。更用雄黃解毒散洗患處。每日用烏金膏塗瘡口處。俟有瘡口。卽用紙作燃蘸烏金膏。絛入瘡內。若有膿爲脂膜。間隔不出。或作脹痛者。宜用針引之。腐肉堵塞者去之。若瘀肉腐動。用猪蹄湯洗。如膿稠或痛。飲食如常。瘀肉自腐。用消毒與托裏藥相兼服之。仍用前一膏塗貼。若腐肉已離好肉。宜速去之。

如膿不稠不稀。微有疼痛。飲食不甘。瘀肉腐遲。更用桑柴
灸之。亦用托裏藥。若瘀肉不腐。或膿清稀。不焮痛者。卽服
大補之劑。亦用桑木灸之。以補接陽氣。解散鬱毒。常觀患
疽稍重。未成膿者。不用蒜灸之法。及毒熟不開。或待腐肉
自去。多致不救。大抵氣血壯實。或毒少輕者。可假藥力。或
自腐潰。怯弱之人。熱毒中隔。內外不通。不行針灸。藥無全
功矣。然此症若膿已成。宜急開之。否則重者潰通臟腑。腐
爛筋骨。輕者延潰良肉。難于收功。因而不斂者多矣。

一男子年逾五十。患此症。已五日。焮腫大痛。赤暈尺餘。重如
負石。勢熾甚。當峻攻。察其脈。又不宜。遂先砭。赤處出黑血。

碗許。腫痛頓退。背重頓去。更敷神功散。及服仙方活命飲。二劑。瘡口及砭處出血水而消。大抵瘡毒勢甚。若用攻劑。怯弱之人。必損元氣。因而變症者衆矣。

一婦人患此症。半月餘。尙不起發。不作膿。痛甚脈弱。隔蒜灸二十餘壯而止。更服托裏藥。漸潰膿清。而瘀肉不腐。以大補藥及桑柴灸之。漸腐。取之。尋愈。常治一日至四五日。未成膿而痛者。灸之不痛。不痛者。灸之至痛。若灸而不痛。或麻木者。明灸之。毒氣自然隨火而散。腫硬不作膿。焮痛。或不痛。或微痛。瘡頭如黍者。灸之尤效。亦有數日。色尙未赤。腫尙不起。痛不甚。膿不作者。尤宜多灸。勿拘日期。更服甘

溫托裏藥。切忌寒涼之劑。或瘀肉不腐。亦用桑木炙之。若脈數發熱而痛者。發于陽也。可治。脈不數不發痛者。發于陰也。難治。不痛最惡。不可視爲常疾。此症不可不痛。不可大痛。煩悶者不治。大抵發背腦疽大疔懸癰脫疽腳發之類。皆由膏粱厚味。盡力房勞。七情六慾。或丹石補藥精虛氣鬱所致。非獨因榮衛凝滯而生也。必灸之以拔其毒。更辨其因。及察邪在臟腑之異。虛實之殊。而治庶無誤也。

一男子患此症。初生如粟。悶痛煩渴便秘。脈數實。此毒在臟也。謂宜急疏去之。以絕其源。使毒不致外侵。彼以爲小恙。乃服尋常之藥。後大潰而歿。

一老婦患此症。初生三日。頭皆如粟。腫硬木悶煩躁。至六日。其頭甚多。脈大按之沈細。爲隔蒜灸。及托裏漸起。發尙不潰。又數劑內外雖腐。惟筋所隔。膿不得出。致脹痛不安。謂須開之。彼不從。後雖自穿。毒已攻深矣。亦歿。大抵發背之患。其名雖多。惟陰陽二症爲要。若發一頭。或二頭。焮赤腫高頭起。疼痛發熱。爲癰。屬陽。易治。若初起一頭如黍。不腫不赤。悶痛煩躁。大渴便秘。睡語咬牙。四五日間。其頭不計數。其瘡口各含一粟形。似蓮蓬。故名蓮蓬發。積日不潰。按之流血。至八九日。或數日。其頭成片。所含之物俱出。通結一衣揭去。又結。其口共爛爲一瘡。其膿內攻。色紫黯。爲疽。

屬陰難治。脈洪滑者。尚可。沈細尤難。如此惡症。惟隔蒜灸。及塗烏金膏有效。凡人背近脊并脾。皮裏有筋一層。患此處者。外皮雖破。其筋難潰。以致內膿不出。令人脹痛苦楚。氣血轉虛。變症百出。若待自潰。多致不救。必須開之。兼以托裏。常治此症。以利刀剪之。尚不能去。似此堅物。待其自潰。不亦反傷。非血氣壯實者。未見其能自潰也。

一男子年逾五十。患此。色紫腫痛。外皮將潰。寢食不安。神思甚疲。用桑柴灸。患處出黑血。卽劇睡覺。而諸症如失。服仙方活命飲二劑。又灸一次。膿血皆出。更二劑。腫痛大退。又服托裏消毒散數劑而斂。夫瘡勢熾甚。宜用峻劑攻之。但

年老血氣衰弱。况又發在肌表。若專於攻毒。則胃氣先損。反致誤事。

一婦人患此症。發熱作痛。專服降火敗毒藥。潰後尤甚。煩躁時嗽。小便如淋。皆惡症。辭不治。果死。大抵瘡瘍之症。五善之中。見一二善症。可治。七惡之內。見一二惡症。者難治。若虛中見惡症者不救。實中無惡症者自愈。此症雖云屬火。未有不因陰虛而致者。故經云。督脈經虛。從腦而出。膀胱經虛。從背而出。豈可尚泥干火。

趙太守患此腫。堅不澤。瘡頭如粟。脈洪大。按之則涇。經云。骨髓不枯。臟腑不敗者可治。然腫硬色天。堅如牛領之皮。脈

更澁。此精氣已絕矣。不治亦死。

圖經云。薜荔治背癩。頃年。寓宜興。懸張鎮。有一老舉人。教村學。年七十餘。忽一日。患發背。村中無醫藥。急取薜荔。研爛。絞汁和蜜。飲數升。以其渣傅瘡上。後以他藥傅貼。遂愈。醫者云。其本蓋得薜荔之力。乃知圖經所載不妄。本草

郭戶爲予言。鄉里有善治發背癩疽者。干瘡上灸之。多至二三百壯。無有不愈。但作艾炷小。則人人不畏灸。灸多則效矣。蓋得此法也。然亦不必泥此。近有一醫。以治外科得名。有人發背。瘡大如碗。有數孔。醫亦無藥可治。只此艾遍敷。在瘡上灸之。久而方痛。以瘡上皆死肉。故不覺疼也。旋以

藥調治之愈。蓋出於意表也。

百乙方

治發背初作。取水蛭置腫上。飲血腹脹自落。別換新者。脹蛭以新水養之。卽活矣。吳內翰備急方云。其姪祖仁。一日忽覺背瘡赤腫如椀大。急用此治之。至晚遂安。

百乙方

昔嚴州一通判忘其名。母病發背。祈禱備至。夜夢呂真人服青衣告之曰。公極孝。故來相告。以方。更遲一日。不可療矣。通判公急市藥治之。卽愈。用瓜萸五個。取子細研。乳香五塊。如棗子大。亦細研。加白沙蜜一觔。同煎成膏。每服二三錢。溫酒化下。大治發背諸惡瘡。日進二服。無不立效。楊王得此方。家人凡百瘡毒。依此治之。立效。遂合以施人。無不

驗者。漏瘡惡核。並皆治之。此卽鄭府朱保義所說神妙方

是也。

醫說續編

立齋治張錦衣。年逾四十。患發背。心脈洪數。勢危劇。經云。心脈洪數。乃心火熾甚。諸症痒瘡瘍。皆屬心火。心主血。心氣滯則血不行。故生癰也。騎竹馬灸穴。是心脈所由之地。急灸之。以瀉心火。隔蒜灸以拔其毒。再以托裏消毒果愈。

鄭大理伯興。脾骨患疽。背左右各一。竟背重如負石。兩臂如墜。瘡頭皆大如荳許。其隱於皮膚如粟者。不計其數。瘡色黯而不起。已七十口。乾作渴。診之。脾胃脈甚虛。彼云。昨日所進粥食。今尙不消。作酸。意此難治之症。因與素善者。籌

其治法以隔蒜灸二十餘壯其背與臂動覺少便隨用六君子湯加薑汁炒山梔及吳茱萸連服數劑吞酸遂止飲食少進但口乾瘡仍不起色亦不赤亦無膿復如法灸二十餘壯背臂頓便瘡遂發其時適秋又投大補之劑及生脈散以代茶飲。

留都鄭中翰仲夏患發背已半月瘡頭十餘枚皆如粟許漫腫堅硬根如大盤背重如負石卽隔蒜灸五十餘壯其背頓輕彼因輕愈不守禁忌三日後大作瘡不起發毒得痛用活命散四劑勢少退用香砂六君子湯四劑飲食少進彼恃知醫自用敗毒藥數劑飲食益少口流涎沫若不自

知此脾虛之甚也。每用托裏藥內參芪各三錢。彼密自揀去大半。後雖用大補藥加薑桂亦不應遂令其子以參耆各一觔。歸朮各半觔。乾薑桂附各一兩。煎膏一罐。三日飲盡。涎頓止。腐頓潰。食頓進。再用托裏健脾藥。腐肉自脫而愈。徐靈胎曰。大症潰後精血大虧。自宜溫補。但瘡口未全愈。愈必有兼外科之症。或膿清不厚。或寒熱未止。或火毒未清。或胃口未和。或新肉未生。或毒瘀內積。種種病症。若一味峻補。與外症不相照顧。則餘毒未清。反能增病。必須審度其虛實。或全屬虛寒。然後擇取對症之藥。幾味成方。如不問外症之有無。而一概以內科溫補之全方治之。則其中必有不對症之藥。反能有害。不但不知內科并外科之理。亦不知也。薛立齋之用內科方盡如此。不值一笑也。

張侍御背患瘡三枚。皆如粟。彼以爲小毒。服清熱化痰之藥。外用涼藥敷貼。數日尙不起色。黯不熈。腹中氣不得出入。

其勢甚可畏。連用活命飲二劑。氣雖利。膿清稀。瘡不起。欲用補劑。彼泥于素有痰火。不受參朮之補。因其固執。陽以敗毒之劑。與視之。而陰以參芪歸朮各五錢。薑桂各二錢。服二劑。背覺熱。腫起。腐肉得真。方信余言。始明用大補藥。乃愈。

南都聘士葉公玉表兄聶姓者。患發背。時六月。腐肉已去。瘡口尺餘。色赤而焮。發熱不食。欲嘔不嘔。服十宣散等藥。自謂不起。請決之。其脈輕診則浮而數。重診則弱而澁。此潰後之正脈。然瘡口開張。血氣虛也。欲嘔而不嘔。脾胃虛也。色赤焮腫。虛火之象也。尚可治。遂與十全大補湯。加酒炒

知柏五味麥冬。及飲童便。飲食頓進。肌肉頓生。服至八劑。瘡口收如粟許。又惑於人言。又服消毒藥二劑。以爲消餘毒。反發熱昏憤急。進前藥。又二十餘劑。乃愈。後兩月。因作善事。一晝夜不睡。至勞發熱。似睡不睡。與前藥二劑。愈加發熱。飲食不進。惟飲熱湯。後以前藥加附子一錢二劑。愈。五味能收斂毒氣。不可輕用。

石武選廉伯患發背。內服防風通聖散。外敷涼藥。汗出不止。飲食不進。且不寐。瘡盈尺。色黯而堅硬。按之不痛。氣息奄奄。此陽氣已脫。脈息如無。急隔蒜灸時許。背頓輕。四圍高。不知痛。中央肉六寸許。一塊已死。服香砂六君子湯二劑。

翌日復灸一次。痛處死肉得解。令砭去。薛歸後又爲他醫所惑。未砭其血。復凝。又敷辛溫活血藥。翌日依言砭之。出黑血二盞許。背強頓去。以前藥加薑桂服一鍾。卽躬睡覺。來。肢體少健。但飲食仍不思。吞酸仍有。瘡仍不痛。彼以爲陰毒。乃如此。赤曰。此血氣虛極寒邪淫于內。無陽營于患處。故肌肉死也。非陰毒。若陽氣一回。胃氣卽省。死肉卽潰。可保無虞矣。以前藥二劑。各加薑桂附子二錢服之。略進米飲。精神復舊。患處覺熱。脈略有力。此陽氣略回矣。是日他醫謂瘡瘍屬火症。况今暑令。乃敷芙蓉根等涼藥。卽進粥二碗。服消毒藥。死肉卽潰。意芙蓉乃寒涼之藥。與脾胃

何蓋飲食卽時而進。消毒乃卒散之劑。與陽氣何補。死肉卽時而潰。此蓋前桂附之功。至而脾胃之氣省。故飲食陽氣旺。死肉腐也。苟虛寒之人。若內無辛熱回陽之藥。輒用寒涼攻毒之劑。豈可得而生耶。若以爲火合屬陽之症。內有熱而用辛溫大補之劑。豈不致死而反生耶。殊不知此乃捨時從症之治法也。吞酸乃伏邪未出之故

一男子患發背膿始潰。腫未消。已十七日。脈微而靜。曰膿毒未盡。脈先弱。此元氣虛宜補之。否則後必生變。彼惑于人言。乃服敗毒藥。腐肉雖潰。瘡口不完。忽腹中似痛。後去白垢。肛門裏急。復求治。曰此裏虛。然非痢非毒。當溫補脾胃。

爲善。因諸瘍醫皆以爲毒未盡。仍服敗毒藥而死。

賀少參朝儀背胛患疽大如豆粒根畔木悶不腫肉色如常。曰氣虛毒甚之症。雖用大補劑亦不能收斂。先用活命飲二劑。背強少和。又二劑疽少赤。用大補劑瘡出黑血杯許。繼有鮮血。微有清膿。曰可見氣血虛極矣。他醫以爲屬氣血有餘之症。密用攻毒一鍾。卽嘔逆腹內陰冷而死。

少司寇周玉岩背患疽在胛已四日。瘡頭如粟重如負石堅硬不起。自以爲小恙。外敷涼藥。內服連翹消毒散。去後四次。形體倦怠自汗盜汗。口乾無寐。曰瘡不宜硬。色不宜黯。周曰初起時赤而軟。自前二藥以致如此。曰凡瘡外如麻。

三內如瓜。毒結於內。非小患也。脈輕診如數。按之則微。未潰。脈先弱。王後難斂。因與卿雅不能辭。遂隔蒜灸二十餘壯。乃知痛。又十餘壯。背覺少和。服六君子湯。加黃芪。藿香。當歸。麻黃。根。浮。麥。二劑。渴止。汗少。斂。瘡色仍黯。堅硬。又服辛溫活血之藥。瘡起至。渴止。汗斂。所結死血得散。良久汗復出口。復乾。又復數劑。外皮雖潰。清膿尙未潰。通于內。膿欲走別處。彼用藥圍之。曰裏虛而膿不能潰于外。圍藥逼毒入內。至十二日。脈浮。按之無如。再用前藥一劑。加薑桂服之。卽安寐。又二日。脈忽脫。再于前藥加附子七分。服二劑。乃曰。背今日始屬吾也。形體亦健。頗有生意。因先日有言。

難以收斂。屢更醫雜用清熱解毒及敷涼藥。遂至裏虛元

氣下陷去後如痢。用治痢消毒藥而死。初起不宜用涼藥以遏抑邪氣令不

得出今犯此禁。明是陰血大虧津液耗竭乃不救其陰

故其病益加。專補其陽以致生變尚不悟而巧為卸

過如此為醫安。雄按凡遇重證醫者不知竭力圖維輒

有長進之日。出危言以致病家張皇屢更醫而竟

無成功。此症隔蒜艾炙用六君子湯以救外敷內服

者多矣。苦寒之失至過熱之品圍藥之法均宜詳參

姜舉人患發背十日正腐潰作渴喜熱湯飲此中氣虛不能

充津液而口乾宜預補之。否則不能收斂後瘡口故不收。

猶以毒為未盡。用敗毒藥兩月瘡口不完。清利腹痛又服

清涼之藥而死。

王序班患發背元氣虛弱用托裏藥而始起。用大補藥而始

潰。彼惑他議。敷涼藥。致腹內不和。裏急後重。去後如痢。大孔作痛。曰。此裏虛非痢。仍用敗毒治痢藥而死。

一男子四十餘歲。患發背未潰。卽作渴。脈數腫高。色紫面赤。小便如膏。以加減八味丸料。加酒炒加柏爲丸。每日空心並食前。以童便送下百丸。用八珍湯加五味麥冬黃芪酒炒知母赤小豆。食遠煎服。逐日又以章便代茶飲之。渴止。

瘡潰而愈。吾治得生者。此人耳。

五味不可妄用

汪夫人患發背。用敷藥冷屑。胃內欲嘔。急令洗去。用托裏藥尋愈。又劉太宰紫岩太夫人患發背。元氣不足。用托裏藥而起。王安人發背正潰時。欲速效。俱敷草藥。卽日而死。

劉大尹年將五十。陸路赴京。兼喪其妻。發背盈尺。中六寸許。不痛。發熱口乾。惡寒自汗。少食大便不禁。且氣促脈浮大。按之空虛。用補中益氣湯。加半夏茯苓四劑。又隔蒜灸之。彼云背重已去。形氣少健。但吞酸。前日所進飲食。覺仍在。腹又以前藥加薑桂服二帖。飲食少進。吞酸已止。始得睡。瘡且不痛。不潰。疑爲陰症。曰。此陽氣虛不能營於患處。故所患肉死而不痛不潰也。若胃氣回。飲食進。死肉卽潰矣。仍服前藥六劑。飲食漸進。患處漸潰。脈有力。曰。此陽氣回矣。後惑于他醫云。必服飛龍奪命丹。出汗爲善。遂進一服。汗大出。三日不止。復請治。曰。汗多亡陽。無能爲也。強曰。諸

書云汗之則瘡已。豈遂爲患。後果死。東垣曰。瘡瘍因風熱鬱於下。其人多怒。其瘡色赤。腫高結硬而痛。左關脈洪緩而強。是邪客于血脈之上。皮膚之間。故發其汗。而通其榮衛。則邪氣去矣。謙甫治瘡瘍。冬月脈浮緊。按之洪緩。乃寒覆皮毛。鬱遏經絡。熱不得升。聚而赤腫。蓋冬月乃曰寒氣收斂。皮膚緻密。腠理汗不得出而設也。况發汗乃陰盛。陽虛邪不能自出。必得陽氣泄汗乃出。是助陽退陰之意也。且前症未潰。其氣血既虛。潰後氣血愈虛。凡瘡雖宜汗。然元氣虛者不宜。况所見之症俱屬不足。豈可汗耶。口乾者。渴之漸。

也何以用
半夏茯苓

晉都機房紀姓者背瘡胃氣虛用溫補藥而飲食進。大補藥而瘡腐愈。後患腿痛用養血化痰之劑少止。彼嫌功緩。他醫以爲溼熱服麻黃左經湯一劑。汗出不止。曰必發瘧而死。已而果然。

王德之患發背。脈浮數。按之則澁。大便五六日不行。腹不加脹。曰邪在表不在裏。但因氣血虛。飲食少。故大便不行。非熱結也。宜生氣血爲主。彼泥積毒在內。用大黃之藥下之。遂連瀉三四次。更加發熱。來日又服一劑。瀉遂不止。飲食不化。吃逆不絕。手足皆冷。診之脈已脫。辭不治。其子曰瀉之能爲害乎。曰服利藥而利不止者死。不當瀉而瀉。令人

開腸洞泄不禁者死。下多亡陰者死。曰瘡瘍乃積毒在臟。若不驅逐其毒。何以得解。曰瘡瘍雖積毒在臟腑。治法當先助胃氣。使根本堅固。參以行經活血時宜之藥。非專用大黃也。今病在表。而反以峻利之劑。重奪其陰。可乎哉。故曰表病裏和。而反下之。則中氣虛。表邪乘虛而入。由是變症百出。雖云脈浮數。邪在表。屬外。因當用內托。復煎散其中。黃芩蒼朮。亦不敢用。脈沈實。邪在內。屬內。因當用內疏。黃連湯。其中大黃。檳榔。亦不敢用。况浮數澁三脈。皆主氣血俱虛。邪既在表。而反用峻利之劑。重寫其裏。誅伐無故。不死何俟。

一縣尹背瘡竟背腐潰。白黯重若負石危甚。飲食頗進。用紅桃散。色漸赤。負漸輕。再用而肌生。更服托裏藥而愈。蓋此大毒症。非峻藥莫能治。內用砒。故用攻毒有效。

平氏室患發背。以托裏消毒藥二十餘劑而潰。因怒頓吐血五六椀。許氣弱脈細。此氣血虛極也。遂令服獨參膏。勛許稍緩。更以參耆歸朮陳皮炙草三十餘劑。瘡口漸合。設投以犀角地黃湯。沈寒之藥。鮮有不誤。

徐符卿年逾四十。患發背五日不起。肉色不變。脈弱少食。大便不實。但以疽未潰。脈先弱。難于收斂。用托裏消毒二劑。方起發。彼惑一嫗言。貼膏藥。服攻毒劑。反甚。背如負石。復

請治。遂以隔蒜灸三十餘壯。云背不覺重。但痒痛。未知更以托裏藥。知痒痛膿清。仍以前藥倍加。參耆佐以薑桂。膿稍稠。又爲人惑。外用豬腰子貼抽膿。血內服硝黃劑。遂流血五六碗許。連瀉十行。腹內如冰。飲食不進。不得已。連診之。脈遽脫。已不可爲矣。蓋其症屬大虛不足之甚。雖一于溫補。猶恐不救。况用攻伐之劑。不死何俟。

顧浩室年逾四十。患發背。治以托裏藥。而潰忽。嘔而瘡痛。胃脈弦緊。彼以爲餘毒內攻。東垣云。嘔吐無時。手足厥冷。臍之虛也。丹溪云。潰後發嘔不食者。溼氣侵於內也。又云。膿出而反痛者。虛也。今胃脈弦緊。木乘土位。是虛明矣。欲

以大君子湯加酒芍砂仁藿香治之。彼自服護心散嘔愈甚。仍用前藥。更以補氣血藥。兩月而愈。大抵溼氣內侵。或感穢氣而作嘔。必喜溫而脈弱。熱毒內攻而作嘔者。必喜涼而脈數。必須辨認明白。

鄭揮使年逾五十。患發背形症俱虛。用托裏藥而潰。但有腐肉當去。彼懼不肯。延至旬日。則好肉皆敗矣。雖投大劑毒甚。竟不救。古人謂壞肉惡于狼虎。毒于蜂螫。緩去之則戕賊性命。信哉。

張宜人年逾六十。患發背三日。肉色不變。頭如粟。許肩背加重。寒熱飲冷。脈洪數。陳良甫云。外如麻。裏如瓜。齊氏云。憎

寒壯熱所患必深。又曰肉色不變發于內也。以人參敗毒散二劑。乃隔蒜灸五十餘壯。毒始發背始輕。再用托裏藥。漸潰。氣血虛甚而作渴。參芪歸地等藥。渴亦止。彼欲速自。用草藥。罨患處。毒氣復入。遂不救。嘗見老弱者患此瘡。頭不起。或堅如牛領之皮。多不待潰而死。有潰後氣血不能培養者亦死。凡瘡初潰。毒正發越。宜用膏藥吸之。參耆等藥托之。若反以藥遏之。使毒氣內攻者。必不救。

王太守宜人患發背。膿熟不開。昏悶不食。此毒入內也。斷不治。強之針膿。碗許稍蘇。須臾竟亡。大抵血氣壯實。膿自涌出。老弱之人。血氣枯槁。必須迎而奪之。順而取之。若毒結

四肢砭刺少緩。腐潰深大亦難收斂。痛結於頰項。胃腹緊要之地。不問壯弱。急宜針刺。否則難治。

郭職方名璉。患背瘡。潰陷色紫。舌卷。謂下陷色紫。主陽氣脫。舌卷囊縮。肝氣絕。遂辭之。經曰。舌卷囊縮。此筋先死。庚日篤。辛日死。果至立秋日而歿。

姚應鳳治撫軍喻思恂。駐師溫州。拒海賊劉香。受降有日。毒發背間。劇甚。應鳳至。剖腐肉。二大器。洞見五臟。隨敷以丹藥。越二日癰平。開轅門坐受降。撫喻喜深德之。仁和縣志

王洪緒治木瀆譚姓婦。患背瘡如碗。初起色白。近已轉紅。痛甚。時值三伏。與陽和湯。或曰。暑天何用。麻桂熱劑。曰。此陰

症也。又云患色轉紅。陰已回陽。乃立令煎服。不一時痛止。連進四服。症減其七。餘三分有膿。不痛而潰。五日收功。

錢國賓治湖州三官廟僧大乘發背。長二尺。濶八寸。深寸許。中間如蜂窩。二百餘頭。流膿痛極欲死。乃半身發也。此僧素喜燻灸。多動肝氣。其脈浮洪可救。以新槐子一合。生白礬一錢。盛錫壺內。沖滾水二三椀。再以壺炖水內煮十數滾。令味盡出。陸續飲之。至五七壺痛止。外用綠膏藥。取松香一觔五兩。燒酒五觔。微火熬乾爲度。傾冷水內。以手捻成松子。百次去水。酒溼氣。用全蝎二十一箇。蜈蚣二十條。真蟾酥五錢。乳香沒藥各三錢。銅綠八錢。各另研。方以松

香化開。入香油少許。試老嫩成膏。待松香冷定。方入總藥攪勻。盛磁罐內。隔水炖攤。一日一換。每次下腐肉一層。生肌如石榴子。二十日收口。此膏妙在一長齊平。不比別膏自周圍長至豆大。難收口也。凡冤業大毒。一切通治。內外治法

俱有巧思

治發背膏藥方。滴乳香。若包燒紅磚壓去油四兩。淨沒藥四兩。製同上。白色兒茶。上好銀硃。鮮紅血竭。杭州定粉。上好黃丹各四兩。上好銅綠三錢。以上俱各碾至無渣爲度。篩極細末。和勻。磁瓶密貯。臨用照患之大小。用夾連四油紙一塊。以鍼多刺小孔。每張以藥末五錢。麻油調攤紙上。再

用油紙一塊蓋上。周圍用線將二紙合縫一處貼患上。卽止痛化腐生新。過三日將膏揭開煎葱湯將患洗淨。軟絹拭乾將膏藥翻過。用鍼照前刺小孔貼之。無火之人內服十全大補湯。有火者減去肉桂薑棗。兼以飲食滋補。無不取效。

治發背初起方。遠志肉甘草汁煮去骨五錢。甘草一錢五分。鮮甘菊花葉一兩。貝母三錢。鮮忍冬藤五錢。紫花地丁五錢。連翹一錢。白芨三錢。

又托裏敗毒散。棉黃芪鹽水炒三錢。或五錢。或八錢。一兩水。炙甘草節二錢。可加至四五錢。赤芍二錢。金銀花三錢。茜

草江西出細如燈心者三錢。何首烏五錢。白殭蠶炙研六分。白芨二

錢五分。皂角刺一錢。貝母二錢。天花粉三錢。穿山甲土炒研一錢。鼠粘子炒研一錢。蟬退去翼足一錢。先用夏枯草五兩。河水五大碗。煎三碗。入前藥同煎至一碗。不拘時服。陰症去後五味。加人參三錢。麥冬五錢。

又潰後服方。人參三錢。麥冬五錢。綿黃芪蜜炒五錢。或一兩。炙甘草二錢。五味子蜜拌蒸一錢。白芍酒炒三錢。金銀花三錢。山藥炒三錢。水煎服。潰瘍忌朮。腫瘍忌當歸。廣筆記

肺癰肺痿

薛立齋治一婦人素血虛發熱咳嗽服痰火之劑後吐膿血
面赤脈數其熱甚危此膿成而氣血虛也用八珍湯補元
氣桔梗湯治之而愈

一婦人感冒風寒或用發表之劑反咳嗽喘急飲食少思胸
膈不利大便不通右寸關浮數欲用疏通之劑薛曰此因
脾土虧損不能生肺金若更利之復耗津液必患肺癰矣
不信仍利之虛症悉至後果吐膿乃朝用補中益氣湯夕
用桔梗湯各數劑吐膿漸止又朝仍用前湯夕用十全大
補湯各五十劑喜其善調理獲愈

一婦人咳嗽吐痰胸膈作痛右寸關浮滑項下牽強此脾胃

積熱之痰非癰患也。以二陳山梔白朮桔梗治之而安。

一婦人素血虛內熱時咳。用辰孟冬兩尺浮洪以脾不健請治。曰防患肺症。丙午孟春果咳嗽。左右寸脈洪數。肺癰也。膿已成。右寸脈仍洪數。乃心火尅肺金。夏令可憂。用壯水健脾之劑稍愈。彼遽自忽。不自調攝。果歿于夏令。

喻嘉言治施眉蒼肺痿喘嗽吐清痰肢體軟痿不能舉動脈來虛數以蛤蚧二十枚酒浸酥炙人參黑參各十兩蜜丸時時噙化不終劑而痊。出張氏醫通

張路玉治陸去非肺痿聲颯吐痰午後發熱自汗左脈弦細右脈虛濡平昔勞心耽色所致先與生脈散合保元湯次

與異功散加黃芪並薑棗與都氣丸晨夕閒進調補半月
熱除痰止月餘方得聲清

孫起伯肺脹服耗氣藥過多脈浮大而重按豁然飲食不入

幸得溺清便堅

金土未億

與局方七氣丸每劑用人參三錢肉

桂半夏麩炙甘草各一錢生薑四片四劑霍然蓋脹肺實
症居多此脈虛大當不以尋常論也

一尼患肺脹喘鳴肩息服下氣止嗽藥不應漸至胸腹脹滿
脈得氣口弦細而瀉此必勞力氣上悞飲冷水傷肺肺氣
不能收斂所致也遂與越脾湯減麻黃加細辛葶藶大瀉
肺氣而安

一酒客嚴冬醉臥渴飲冷茶肺脹喘咳脈得氣口沈斃搏指
與小青龍去白芍加葶藶半夏一劑而痊則知肺脹喘滿
當以葶藶爲向導也非實症未可輕投

孫文垣治初陽姪婦先時咳嗽諸治無功嗽急則吐用碧玉
散二錢白湯調下立止半年復咳嗽胸背隱隱疼痛常內
熱吐出桃紅膿甚多且腥穢右脇並乳脹痛診之脈洪數
大便燥肌骨瘦立此肺癰症也用貝母茜根白芍各一錢
知母麥冬山梔紫苑各八分桑皮當歸丹皮杏仁各七分
苡仁一錢五分甘草葶藶各五分服之甚安但稍停卽發
或云肺竅中痰積瘀血尙多未能卽去宜緩圖之候膿盡

當愈。孫謂丹溪雖有此言，亦不可執。設不以藥消化之，必俟其自己，恐歲月深而有他變。且中年之人，何能當此。莫若清熱潤肺，消痰化癥。久服或早愈也。或又謂久嗽傷肺，宜補。每補必增熱加痛加咳，而膿轉多。仍依法治之，二年良愈。

喻嘉言治陸合儀母，平日持齋，腸胃素槁，天癸已絕，復淋瀝不止。治之久，痊值秋月，燥金太過，溼蟲不生，人多病咳，而血虛津槁之軀，受傷獨猛，胸脇緊脹，上氣喘急，臥寐不寧，咳動則大痛，痰中帶血，而腥食不易入，聲不易出，寒熱交作，申酉二時燥金用事，諸苦倍增。脈時大時小，時牢伏時

弦緊服清肺藥無進退告以肺癰將成高年難任以葶藶
大棗瀉肺湯先通肺氣之壅卽覺氣稍平食少入痰稍易
出身稍可側大有生機喻曰未也因見來勢太急不得已
取快一時暫開者易至復閉迨復閉則前法不可再用矣
今乘其暫開多方以圖必在六十日後交立冬節方是愈
期蓋身中之燥與時令之燥膠結不解必俟燥金退氣肺
金乃寧後六十日閒屢危屢安大率皆用活法斡旋緣病
不可補而脾虛又不能生肺肺燥喜潤而脾滯又難于運
食今日脾虛不思飲食則于清肺中少加參朮以補脾明
日肺燥熱盛咳嗽則于清肺中少加阿膠以潤燥日復一

日扶至立冬之午刻。病者忽自云。內中光景。大覺清爽。可得生矣。奇哉。天時之燥去。而肺金之燥。遂下傳大腸。五六日。不一大便。略一潤腸。旋即解散。正以客邪易去耳。至小雪節。康健加餐。倍于曩昔。蓋胃中空虛已久。勢必復其容受之常。方爲全愈也。

薛立齋治一男子。神勞冬月。患咳嗽。服解毒之藥。自以爲便。曰。此因肺氣虛弱。腠理不密。而外邪所感也。當急補其母。是治本也。始服六君子湯。內去參朮。反加紫蘇枳殼之類。以致元氣亦虛。生肺癰而歿。

一武職因飲食起居失宜。咳嗽吐痰。用化痰止咳之藥。時仲

夏左尺洪數而無力胸滿面赤吐痰腥臭自汗曰腎虛水
泛爲痰而反重亡津液得非肺癰乎不信仍服前藥翌日
吐膿脈數右寸爲甚用桔梗湯一劑脈數與膿頓減又二
劑將愈佐以六味而痊

一男子咳嗽喘急發熱煩燥面赤咽痛脈洪大用黃連解毒

湯二劑少退更以梔子湯四劑而安此肺癰將成未成之候

薛立齋治一男子患肺痿咳嗽喘急吐痰腥臭胸滿咽乾脈
洪數用人參平肺散六劑及飲童便諸症悉退更以紫苑
茸湯而愈童便雖云治虛火常治瘡瘍炊腫疼痛發熱作
渴及肺痿肺癰發熱口渴者尤效

一僕年逾三十、嗽久不愈。病久故可用齋氣壅不利、睡臥不安、咯吐

膿血甚覺、可畏其主已棄之矣。與寧肺散一服、少愈。又服

而止大半。乃以寧肺散湯數劑而痊。所以有是病、必用是

藥。若以前散性瀉而不用、何以得愈。

上舍毛體仁素陰虛、春初咳嗽、胸中隱痛、腎脈洪數、肺脈數

而時不見、曰內當結癰。先用六味地黃丸料。一劑服之、翌

日來謂曰、昨得良劑、嗽愈六七。務求一方、到監調理。曰陰

虛火炎、患癰之症。第因元氣虛弱、未能發出。因其易忽、薛

不能治。乃別用降火化痰等劑、愈甚。月餘復請診之。脈洪

滑而數。曰膿已成矣。當請常治之者、同論針之。且免內潰。

之患仍不決。又月餘請視。他醫已先開瘡孔偏上。堯膿不出。仍內潰。脈愈洪大。曰脈洪滑而數。其舌青黯。內臟已壞。無能為矣。後果然。

一男子咳嗽。兩脇脹滿。咽乾日燥。咳唾腥臭。以桔梗湯四劑。而唾膿以排膿散數服而止。乃以補陰排膿之劑而瘳。

一男子咳而膿不止。脈不退。諸藥不應。甚危。用柘黃丸一服。少愈。再服。即退。數服而痊。柘黃一兩為末。百齒霜即梳二

錢。用糊為丸。如梧桐子大。每服三五丸。米飲下。柘黃乃柘樹所生者。其色黃。狀似靈芝。江南最多。北方鮮有。

一婦人吐膿。五心煩熱。口渴胸悶。以四順散三劑。少止。以排

一男子因勞咳嗽不止。項強而痛。脈微緊而數。此肺癰也。尙未成膿。欲用托裏益氣藥。彼不信。仍服發表散藥。致血氣愈虛。吐膿不止。竟不救。經曰：肺內主氣。外司皮毛。若肺氣虛。則腠理不密。皮毛不澤。而受傷。則皮毛錯縱。故患癰痿腸癰者。必致皮毛如此。以其氣不榮養而然也。亦有服表藥見邪不解。而仍用發表。殊不知邪不解者。非邪不能解。多因腠理不密。而邪復入也。專用發表。則腠理愈虛。邪愈易入。反爲敗症矣。宜診其脈。邪在表者。止當和解。而實腠理。

乘虛復人者亦當和解兼實腠理。故用托裏益氣之藥。若小便赤色爲肺熱所傳。短少爲肺氣虛。蓋肺爲母。腎爲子。母虛不能生子。故也。亦有小便頻者亦爲肺虛不能約制耳。

一男子面白神勞咳嗽胸臆隱痛其脈滑數以爲肺癰欲用桔梗湯不信服敗毒散致咳嗽愈甚吐痰腥臭始悟仍服前湯四劑咳嗽少定又以四順散四劑而脈靜更以托裏藥數劑而愈。大抵勞傷血氣則腠理不密風邪乘肺風熱相搏蘊結不散必致喘咳。又因汗下過度則津液重亡遂成斯症。若寸脈數而虛者爲肺癰。數而實者爲肺疽。脈微

緊而數者未有膿也。緊甚而數者已有膿也。唾膿而止脈短而面白者易治。膿不止脈洪大而面赤者不治。使其治早可救。膿成則無及矣。金匱方論熱在上焦者因咳爲肺痿。得之或從汗出。或從嘔吐。或從消渴。小便利數。或從便難人。被下藥快利。重亡津液。故寸口脈數。其人燥咳。胸中隱隱時痛。脈反滑數。此爲肺癰。咳吐膿血。脈數虛者爲肺痿。數實者爲肺癰。

一童子氣稟不足。患肺癰。吐膿腥臭。皮毛枯槁。脈浮。按之澹更無力。用鍾乳粉湯治之。

一男子患之。形症皆同。唯咽喉時或作痒。痰多脇痛。難于睡。

臥用紫苑茸湯治之而病愈。

一弱人咳膿日晡發熱夜間盜汗脈浮數而緊用人參五味子湯數劑而愈。以苑茸湯月餘而痊。

一男子患肺痿咳嗽喘急吐痰腥臭胸滿咽乾脈洪數用人參平肺散六劑。及飲童便諸症悉退。更以紫苑茸湯而愈。童便雖云專治虛火常治瘡瘍腫焮疼痛發熱作渴。及肺痿肺癰發熱口渴者尤效。

一婦人患肺痿咳嗽吐痰腥臭日晡發熱脈數無力用地骨皮治之熱止更用人參養肺湯月餘而安。

一男子前病肺癰後又患咳嗽頭眩吐沫飲食少思小便頻

數服解毒散化痰藥不應診之脾肺二脈虛甚。謂暈眩唾涎屬脾氣不能上升小便無度。乃肺氣不得下降。尙未成膿耳。投以加味理中湯四劑。諸症已退大半。更用鍾乳粉湯而安。河間曰。金匱云肺痿屬熱。如咳嗽肺癰聲啞聲嘶咯血。此屬陰虛熱甚然也。本論治肺痿吐涎沫而不咳者。其人不渴。必遺尿。小便數。以上虛不能制下故也。此爲肺中冷。必眩多涎唾。用甘草乾薑。此屬寒也。脈痿涎唾多。心中溫溫液液者。用炙甘草湯。此補虛勞也。亦與補陰虛火熱不同。是皆宜分治。故肺痿又有寒熱之異也。

趙以德治一婦人年二十餘患肺癰胸膈間患一竅口中所

咳膿血與竅相應而出以人參黃芪當歸補氣血劑加退
熱排膿等藥服之。不一月而安。藥要或問

治肺癰目擊神效其法用百年芥菜鹵久窖地中者數匙立
起此鹵嘉興府城中大家多藏之。

廣筆記魚腥草不住口食之治肺癰吐膿血神方也正名蕺

草兼治魚口。

雄按此方可治鴉片烟癮

薛立齋治陸司廳子仁春間咳嗽吐痰腥穢胸滿氣促皮膚

項強脈數此肺疽也蓋肺系在項肺傷則系傷故牽引不

能轉側肺者氣之本其華在毛其充在皮肺傷不能攝氣

故脇脹氣促而皮膚縱東垣云肺瘡之脈微緊而數者未

有膿也。緊甚而數者，已有膿也。其脈來緊數，則膿已成。遂
以人參、黃芪、當歸、川芎、白芷、貝母、知母、麥冬、葶仁、桔梗、防
風、甘草、兼以蠟、礬、九及太乙膏治之。膿盡脈濇而愈。至冬
脈復數，經云飲食勞倦則傷脾，脾傷不能生肺金，形寒飲
冷則傷肺，肺傷不能生腎水，腎水不足則心火熾盛，故脈
來洪數。經云冬見心脈而不治，果及于火旺之月。凡肺疽
愈而復
作多不治，余常治三人，一聞
三年兩間，一年皆復作而歿。

周國用年逾三十，患咳嗽，項強氣促，右寸脈數，此肺疽也。東
垣云：風中於胃，呼氣不入，熱攻于榮，吸氣不出，風傷皮毛，
熱傷血脈，風熱相搏，血氣稽留于肺，變成瘡疽。診其脈數

而虛者肺痿也。數而實者肺疽也。今診脈滑。此疽膿已成。以排膿托裏之藥。及蠟礬丸治之。脈漸瀦而愈。錦衣李大器亦患此。吐膿面赤脈大。謂肺病脈宜瀦。面宜白。今脈大面赤。火尅金也。不可治。果歿。

一男子年逾四十。喘咳脇痛。胸滿氣促。右寸脈大。此風熱蘊於肺也。尙未成瘡。屬有餘之症。意欲以瀉白散治之。彼謂

肺氣素怯。不然之。乃服補藥。喘咳愈甚。兩月後復請視之。

二語贅

汗出如油。喘而不休。此肺氣已絕。不治。果歿。夫肺氣充實。邪何從襲。邪氣既入。則宜去之。故用瀉白散。所以瀉肺氣之邪也。邪氣既去。則真自實矣。

姚應鳳治某叟患脹滿諸醫多云隔症應鳳曰此肺癰耳令病者閉目取一大盤水向病者頂上傾之病者陡大驚亟舉刀直刺心坎瀉膿血數碗而愈人問之應鳳曰心尖下

垂水潑而驚驚則心系提吾刀可入也

仁和縣志

沈夫人患嗽血晝夜不休應鳳曰肺慮痿不慮潰今潰至第三葉尙可生也先投洗肺湯已令食猪肺數十斤遂愈

王洪緒曰諸患易識獨肺中患毒難覺凡兩脚骨疼痛者或脚骨不痛而舌下生如細豆一粒者再心口直上內作微疼及咳嗽口乾咽燥皆肺中生毒之候也卽用甘草桔梗各三錢煎服服後如覺少安肺之患毒無疑矣以犀黃丸

十服服完全愈。此是預識先治百無一死者。余每見此症吐膿膿色皆白。故稱肺疽。用犀黃丸治無不效。或用陳年鹽菜滷。每早取半杯。滾豆漿沖服。服後胸中一塊塞上塞下。數次方能吐出。連吐惡膿。日服至愈。患此症者。終身戒食鴨蛋白。鰲紅蘿蔔。著甲魚石首魚。食則復發不救。

千金葦莖湯。葦莖二斤。薏苡仁半斤。桃仁五十枚。瓜瓣半斤。以水五斗。先煮葦莖得五升。去渣。內諸藥。煮取二升。服一升。再服當吐如膿。王晉三曰。是方也。推作者之意。病在膈上。越之使吐也。蓋肺癰由于氣血混一。營衛不分。以二味涼其氣。二味行其血。分清營衛之氣。因勢湧越。誠為先著。

其瓜瓣當用絲瓜者良。時珍曰：絲瓜經絡貫串，房隔聯屬，能通人脈絡臟腑，消腫化痰，治諸血病，與桃仁有相須之理。苡仁下氣，葶莖上升，一升一降，激而行其氣血，則肉之未敗者不致成膿，癰之已潰者能令吐出矣。今時用嫩葶根性寒滌熱，冬瓜瓣性急趨下，合之二仁，變成潤下之方，借以治肺癰，其義頗善。徐靈胎曰：此治肺癰之主方也。

徐靈胎曰：古之醫者無分內外，又學有根柢，故能無病不識。後世內外科既分，則顯然爲內症者，內科治之；顯然爲外症者，外科治之。其有病在腹中，內外未顯然者，則各執一說，各擬一方，曆試諸藥，皆無效驗。輕者變重，重者卽殞矣。

此等症不特外科當知之卽內科亦不可不辨分真確。知非已責。卽勿施治。毋致臨危束手而後委他人也。腹內之癰有數症。有肺癰。有肝癰。有胃脘癰。有小腸癰。有大腸癰。有膀胱癰。惟肺癰。咳吐腥痰。人猶易辨。餘者或以爲痞結。或以爲瘀血。或以爲寒痰。或以爲食積。醫藥雜投。及至成膿。治已無及。並有不及成膿而死者。病者醫者。始終不知。何以致死。比比然也。今先辨明痞結。瘀血。寒痰。食積之狀。凡痞結。瘀血。必有所因。且由漸而成。寒痰則痛止無定。又必另現痰症。食積則必有受傷之日。且三五日後。大便通卽散。惟外症則痛有常所。而遷延益甚。金匱云。諸脈浮數。

應當發熱而反漸漸惡寒。若有痛處。當發其癰。以手按腫
上熱者。有膿。不熱者。無膿。此數句。乃內癰真諦也。又云。腸
癰之爲病。身甲錯。腹皮急。按之濡。如腫狀。腹無積聚。身無
熱是也。若肝癰。則脇內隱隱痛。日久亦吐膿血。小腸癰。與
大腸癰相似。而位略高。膀胱癰。則痛在少腹之下。近毛際
著皮卽痛。小便亦艱而痛。胃腕癰。則有虛實二種。其實者
易消。若成膿。必大吐膿血而愈。惟虛症。則多不治。先胃中
痛。脹久而心下漸高。其堅如石。或有寒熱。飲食不進。按之
尤痛。形體枯瘦。此乃思慮傷脾之症。不待癰成卽死。故凡
腹中有一定痛處。惡寒倦臥不能食者。皆當審察。防成內

癰。慎毋因循求治于不明之人以致久而膿潰自傷其生也。

腹癰

薛立齋治上舍周一元腹患癰三月不愈膿水清稀朝寒暮熱服四物知柏之類食少作瀉痰涎上湧服二陳枳實之類痰涎愈甚胸膈痞悶問故曰朝寒暮熱血氣虛也食少作瀉脾腎虛也悉因真氣虛而邪氣實也當先壯其胃氣使諸臟有所稟而邪自退矣乃遂用六君子黃芪當歸數劑諸症漸退又用十全大補湯肌肉漸斂更用補中益氣

調理而愈。

從姪孫年十四而畢姻乙巳春年二十四腹中作痛用大黃
等藥二劑下血甚多胸腹脹滿痰喘發熱又服破氣降火
藥一劑汗出如水手足如冰薛歸診之左關洪數右關尤
甚乃腹癰也。雖能收斂。至夏必變而成瘰症。用參芪各一
兩。歸朮各五錢。陳皮茯苓各三錢。炙草炮薑各一錢。二劑
諸症稍退。腹始微赤。按之覺痛。又二劑作痛。又二劑腫痛
脈滑數。針出膿瘀。更用大補湯。精神飲食如故。因遺精患
處色黯。用前藥加五味山萸山藥骨脂吳萸等劑。瘡口漸
斂。瘰症悉具。其脈非洪大而數。卽微細如無。惟專服獨參

湯人乳汁。少復良久仍脫。曰當備後事。以俟火旺。乃禱鬼神巫者。曆言往事如見。更示以方藥。皆峻利之劑。且言保其必生。敬信服之。後果歿。經曰拘于鬼神者。不可與言至德。而況又輕信方藥于邪妄之人耶。書此以警後患。

薛立齋治一男子腹患癰腫硬不潰。乃陽氣虛弱。嘔吐少食。乃胃氣虛寒。法當溫補脾胃。假如腫赤痛甚。煩燥脈實而嘔。爲有餘當下之。腫硬不潰。脈弱而嘔。爲不足當補之。若痛傷胃氣。或感寒邪穢氣而嘔者。雖腫瘍猶當助胃壯氣。彼信不真。仍服攻伐藥。而嘔甚。復請治。脈微弱而發熱。曰熱而脈反靜。脫血脈反實。汗後脈反躁者。皆爲逆也。辭不

治果殛。

秋官錢可容腹患癰。焮腫煩渴作痛。飲冷大便不通。脈沈數實。此熱毒蘊于內。清熱用消毒散。加大黃二錢。一劑諸症悉退。但形氣頓虛。用托裏消毒散。去銀花白芷。倍加參芪歸朮而安。

毛礪安側室。肚患癰月餘矣。色黯不腫。內痛作嘔。飲食不入。四肢逆冷。其脈或脫絕或浮大。雜用定痛敗毒之藥。曰此氣血俱虛而作痛。內決無膿。不治之症也。強用大溫補之藥。二劑痛止色赤。飲食少進。謂但可延日而已。人皆以爲有膿。復強針之。又用大補之劑。始生清膿少許。衆仍以爲

毒結于內。用攻膿保其必生。殊不知乃速其死耳。惜哉。

一男腹患癰腫硬木悶煩熱便秘脈數而實。以黃連內疎湯一劑少愈。以黃連解毒散二劑頓退。更以金銀花散四劑。瘡頭出水而消。

一男年逾三十患腹癰腫脈數喜冷齊氏云瘡瘍腫起堅硬瘡疽之實也。河間云腫硬木悶喜飲冷邪氣在內也。遂用清涼飲倍用大黃三劑稍緩。次以四物湯加芩連山梔木通四劑而遂潰。更以十宣散去參芪肉桂加金銀花天花粉漸愈。彼欲速效自服溫補之劑致腹俱腫小便不利。仍以清涼飲治之膿潰數椀。再以托裏藥治之愈。東垣云瘡

疽之發其受有內外之別。治之有寒溫之異。受之外者。法當托裏以溫劑。反用寒藥。則是皮毛始受之邪。引入骨髓。受之內者。法當疎利以寒劑。反用溫補托裏。則是骨髓之病。上徹毛皮表裏通潰。共爲一瘡。助邪爲毒。苦楚百倍。輕則幾殆。重則死矣。

一男子素好酒色。小腹患毒脈弱微痛。欲求內消。謂當助胃壯氣。兼行經活血藥佐之。可消。不宜用敗毒等藥。彼欲速效。乃自用之。病熱果盛。瘡亦不潰。飲食少思。迨兩月餘。復請治。診其脈愈弱。盜汗不止。聚腫不潰。肌寒肉冷。自汗色脫。此氣血俱虛也。故不能發腫。成膿。以十全大補湯三十

餘服。遂成膿。刺之反加煩躁。脈此亡陽也。以聖愈湯服二劑。仍用前藥百貼愈。

劉貴患腹癰。焮痛煩躁。作嘔。脈實。河閒云瘡瘍者。火之屬。須分內外。以治其本。若脈沈實者。先當疎其內。以絕其源。又曰嘔噦以煩。脈沈而實。腫硬木悶。或皮肉不變。邪氣在內。宜內疎黃連湯治之。今作嘔。脈實。毒在內也。遂用前湯通利二三行。諸症悉退。更以連翹消毒散而愈。

一人患腹癰。膿熟開遲。脈微細。膿出後。瘡口微膿。如蟹吐沫。此內潰透膜也。凡瘡瘍透膜。十無一生。雖以大補藥治之。亦不能救。此可爲待膿自出之戒也。

黃師文云。男子服建中湯。婦人服四物湯。往往十七八得。但時爲之損益耳。有男病小腹一大癰。其諸弟侮之曰。今日用建中湯否。師文曰。服建中湯。俄而癰潰。蓋小腹癰本虛。其熱毒乘虛而入。建中湯既補虛。而黃芪且潰膿也。北窗灸輒

腰疽

薛立齋治府庠彭碧溪。患腰疽。服寒涼敗毒之藥。色黯不痛。瘡頭如鋪黍。背重不能安寢。耳曠目白。面赤無神。小便頻澀。作渴迷悶。氣粗短促。脈浮數。重按如無。先用滋水之藥一劑。少傾。便利。渴止。背卽輕爽。乃砭出瘀血。以艾半斤許。

明灸患處。外敷烏金膏。內服參芪歸朮肉桂等藥。至數劑。元氣稍復。自疑肉桂辛熱。一日不用。手足並冷。大便不禁。仍用肉桂及補骨脂二錢。肉豆蔻一錢。大便復常。其肉漸潰。更用當歸膏以生肌肉。八珍湯以補氣血而愈。

錦衣傅允承母年逾七十。腰生一癩。作痒異常。脈浮數。反惡寒。曰此瘡瘍症也。未潰而先弱。何以收斂。况大便不通。則真氣已竭。治之無功。因懇請不得已。用六君加藿香神麩。數劑。飲食漸進。大便始通。更用峻補之劑。潰而膿清。作渴。再用參芪歸地麥冬五味。渴止。彼喜曰。可無虞矣。曰。尙難收斂。先日之言也。彼疑遂速他醫。卒致不起。

舉人顧東溪久作渴。六月初腰患疽。不慎起居。瘡潰尺許。色黯敗臭。小便如淋。唇裂口刺。七月終。請治左尺洪數。左關浮濇。謂先渴而患疽者。乃腎水乾涸。虛火上炎多。致不起。今膿水敗臭。色黯不痛。瘡口張大。乃脾氣敗而肌肉死也。小便如淋。痰壅喘促。口乾舌裂。乃脾肺敗而腎水絕也。左尺洪數。腎無所生也。左關浮濇。肺尅肝也。况當金旺之際。危殆速矣。二日後果歿。蓋此症發于兩月方歿者。乃元氣虛不能收斂也。若預爲調補。使氣血無虧。亦有得生者。

一男子腰患毒。膿熟不潰。針之膿大泄。反加煩躁。以聖愈散湯四劑而寧。更以人參養榮湯加麥冬五味。兩月而愈。此

人後患溼氣。遂爲痼疾。凡瘡膿血去多。瘡口難合。尤當補益。務使氣血平復。否則更患他症。必難治療。慎之。

一男子腰中患疽。發而不潰。其氣血止。能發起。不能培養。爲膿也。投大補藥數劑。而潰。又數劑。膿出尙清。乃服參芪歸朮膏。斤餘。膿少稠。數斤。膿漸稠。肌肉頓生。大凡癰疽。藉血氣爲主。若患而不起。或潰而不腐。或不收斂。及膿少或清。皆氣血之虛也。宜大補之。最忌攻伐之劑。亦有膿反多者。乃氣血不能禁止。故也。若潰後發熱作渴。脈大而膿愈多。屬真氣虛。而邪氣實也。俱不治。常見血氣充實之人。患瘡皆腫高色赤。易腐潰。而膿且稠。又易干收斂。怯弱之人。多

不起發不腐潰。又難干收斂。若不審察而妄投攻劑。虛虛之禍不免矣。若患後當調養。若癩瘡流注之症。尤當補益也。否則更患他症。必難干措治。慎之。

有人腰間生一毒癰。紅腫未破。皮痛不可忍。俯躬而行。一人取新殺牡猪肝切片如瘡貼上。外以布纏定。一對晝。其病良已。肝色變黑。臭不可近。棄之地。犬不食。下有小指大一點。尚硬。乃肝少未貼滿所致。竟亦無他。

薛立齋治崑山張舉人元忠。孟秋患腰疽。瘡頭如大豆粒。根大三寸許。微腫。畧赤。虛症悉具。用桑枝炙患處。服活命飲一劑。腫起色赤。飲食仍少。用香砂六君子湯四劑。食漸進。

後用大補藥。膿雖成而不潰。乃每劑加附子一片。二劑後膿自湧。出旬日而愈。

陸氏女初嫁患腰痛不腫脈沈滑神思倦怠此爲內發七情之火。飲食之毒所致。以托裏藥一劑。下瘀膿升許。陳良甫曰。瘡未潰內陷面青唇黑者不治果歿。

王洪緒治一人患腰疽根盤圍濶二尺餘前連腹後接背不紅不腫不痛不軟按之如木王舉方用炮薑肉桂他醫以爲暑月安可用此熱劑。改服攻托清涼。閱五日病者神昏無主復延診患仍不痛色如隔宿猪肝。言語不清飲食不進。王曰過今晚商治。是夜卽斃。

續名醫類案卷三十二
又一人患此服以陽和湯次日覺鬆又一帖疽消小半。趕合犀黃丸與陽和湯輪轉間服五日而愈。陽和湯方。熟地一兩。麻黃五分。鹿角膠三錢。白芥子二錢。肉桂一錢。甘草二錢。炮薑炭五分。此方麻黃得熟地不發表。熟地有麻黃不凝隔。神用在斯。主治骨槽風流注。陰疽脫骨疽。鶴膝風乳岩。結核石疽。附骨疽。及漫腫無頭平塌白陷。一切陰凝等證。犀黃丸方。乳香一兩。沒藥一兩。麝香一錢。五分。牛黃三分。共爲末。用飯搗丸。每服三錢。陳酒送上部。臨臥服下部。空心服。主治一切陰疽大毒。

66

續名醫類案卷三十三

錢塘魏之琇編集

海昌王士雄孟英
定州楊照藜素園
同校

腸癰

華陀傳軍吏李成苦咳嗽晝夜不寤時吐膿血以問陀陀言君病腸癰咳之所吐非從肺來也與君散兩錢當吐二升餘膿血吐訖自養一月可小起好自將愛一年便健十八歲當一小發服此散亦行復差若不得此藥故當死復與兩錢散成得藥去五六歲親中人有疾如成者謂成曰卿今

強健我欲死何忍無急弄藥

松之按古語以待不詳先持以藏為弄

以待不詳先持

貸我我差為卿從華陀更索成與之已故致譙道陀見收

忽忽不忍從求後閱十八年成病竟發無藥可服以至於

死三國志

薛立齋治金臺院僉憲年逾五十腹內隱痛小便如淋皮膚

錯縱而脉滑數此腸癰也脉滑數則膿已成遂以廣東牛

皮膠溶化送太乙膏下膿升許更以排膿托裏藥及蠟礬

丸而愈

孫文垣治染匠婦腹痛兩年或以為寒為熱為氣為血為蟲

為積治不效或與膏藥大如斗貼之痛益劇欲去搨之牢

粘不可揭卧舟中數人扶之不起往診見其面色蒼黑兩

手枯燥如柴六脉皆洪數腹痛脉洪數內癰可知其得生亦賴此問其痛之

所在解衣指示痛有定處始知膏藥牢粘叩其不能起步之由

乃左脚不可動動則痛應于心察其色脉皆非死候此必

腸癰左脚不能舉動是其徵也俗名縮脚腸癰與營衛反魂湯加

金銀花為君四帖酒水各半煎服一帖痛稍減二貼下臭

膿半桶病全減膏藥亦不揭自落四貼完其婦與匠來謝

并求善後之方

龔子才治一婦人腹痛如錐每痛欲死不可著手六脉洪數

此腸癰也用穿山甲炒白芷貝母殭蠶大黃合一大劑水

煎服膿血從小便處出而愈

李士材治吳光祿夫人患腹滿而痛喘急異常飲食不進或用理氣利水之劑二十日不效診之脉大而數右尺爲甚令人按腹手不可近曰此大腸癰也脈數爲膿已成用黃芩角刺白芷之類加葵根一兩煎一碗頓服之未申痛甚至夜半膿血大下昏暈不支卽與獨參湯稍安更與十全大補兩月而愈

周漢卿治義烏陳氏子腹有塊捫之如罍漢卿曰此腸癰也用大針灼而刺之入三寸許膿隨針迸出有聲愈

明史

薛立齋診秀水卜封君善飲腹痛便瀉服分利化痰等劑不

應其脉滑數。膚皮甲錯。謂此酒毒。致腸癰而潰敗也。辭不治。仍服煎劑。果便膿而歿。

孫某治一女子腹痛百方不效。脉滑數時作熱。腹微急。孫曰痛病脉當沉細。今滑數。腸癰也。以雲母膏一兩為丸如梧子大。以牛皮膠溶入酒中。并水吞之。餉時服盡。下膿血愈。

外科
心法

薛立齋治通府張廷用患腸癰。兩月餘矣。時出白膿。體倦惡寒。此邪氣去而中氣虛也。用托裏散兼益氣湯。徐徐呷之。又令以猪肚肺煮爛。取其湯調米粉煮。時呷半盞。後漸調理而痊。

一男子小腹痛而堅硬小便數汗時出脉遲緊以大黃湯一

劑下瘀合許以薏苡仁湯四劑而安。
苡仁瓜蒌各三錢
丹皮桃仁各二錢

一男子患腸癰膿已成用雲母膏一服下膿升許更以排膿

托裏藥而愈後因不守禁忌以致不救。

一人患腸癰偃僂痛不能伸有道人教以飲純黃犬血二椀

和白酒服其人遂飲至四椀次日下膿血盡而瘳。
廣筆記

腸風臑毒

孫文垣治潘大司馬常有腸風之症八月丁祭學博餽鹿血

食之血暴下用槐角子五錢黃連枳壳地榆貫衆各三錢。

一服而止。潘善其方。書之粘壁間。遇有便血者。依方服之。無不立效。

陳鹿塘原有腸風臟毒之症。大便燥結。數日不能一行。痛苦殊甚。此胃寒腸熱也。其脈兩寸皆數。兩關弦而無力。兩尺洪滑。而左尤甚。久治不效。因憶東垣有云。大腸喜清而惡熱。脾胃喜溫而惡寒。以胃屬土。腸屬金也。乃制一方。專以揚風臟毒藥爲主。外以養血之藥裹之。使不傷胃氣。蓋藥先入胃。後入大腸。入胃時裹藥未化。及入大腸。則裹藥化而君藥始見。庶幾兩不相妨。因以九製大黃二兩。槐花三兩。木耳二兩。郁李仁皂角子象牙屑條芩各一兩。血餘升

麻荆芥穗各五錢。共爲末。煉蜜爲丸。赤豆大。外以四物加
蒲黃各一兩爲衣。米飲送下。空心及下午各二錢。血果止。
大便不燥。飲食日加而愈。

王祖泉大便裏急後重。腹痛。日夜下紫稠粘。三四十度作痢。
治。三月不效。肌瘦。懶食。眼合。懶開。悉以爲不治。脉之六部
濡弱。所下之色甚晦。狀如芋苗汁。曰。此非痢。乃臟毒下血
也。醫說中人參。樗皮散。正與此對。卽製與之。其夜果減半。
終劑全愈。方以人參。樗根。白皮各二兩爲末。空心米飲調
二錢。忌肉汁。生菜。魚腥。

湯封君簡庵血分熱甚。以善飲致腸風。且心腎不交。以四物

湯加棗仁側柏葉槐花連翹蜜爲丸服之卽愈。

吳孚先治張東銘素患痔疾兼後重之症似痢非痢登園窘迫行步如跨馬狀坐亦作楚六脈偏盛稍覺無神知爲氣血虛而挾濕熱用芎歸苓連生地槐角查肉升麻加入參二兩爲丸彼去參服之不效復入參服半料已全愈。

張子和曰一男子臟毒下血當六月熱不可堪自分必死忽思蜜水猛舍性命飲一大盞痛止血住。

汝南節度副使完顏君寶病臟毒下血發渴寒熱往來延及六載日漸瘦弱無力面黃如染張診其兩手脉沉而身涼內經寒以爲營氣在故生可治先以七宣丸下五七行。

次以黃連解毒湯加當歸赤芍地榆散同煎服之。一月而愈。

方勺泊宅編云外兄劉掾病臟毒下血凡半月自分必死得一方只以乾柿燒灰飯服二錢遂愈。又王璆百一方云曾通判子病下血十年亦用此方。一服而愈。爲丸爲散皆可。

本草

綱目

薛立齋治一男子臟毒下血服涼血敗毒藥不惟血不能止且飲食少思肢體愈倦脉數按之則瀉先以補中益氣湯數劑少止更以六君子湯加升麻炮羌四劑而止乃去炮薑加芎歸月餘脾胃亦愈常治積熱或風熱下血者先以

敗毒散散之胃寒氣弱者用四君子湯或參苓白朮散補之并効

一男子臟毒下血脾氣素弱用六君子湯加芎歸枳壳地榆槐花治之而愈後因謀事血復下諸藥不應意思慮傷脾所致投歸脾湯四劑而痊大抵此症所致之由不一當究其因而治之丹溪云芎歸湯一劑又調血之上品熱加茯苓槐花冷加茯苓木香此則自根自本之論也雖然精氣血出于穀氣惟大腸下血以胃藥收功以四君子湯參芪白朮散以枳壳散小烏沉湯和之胃氣一回血自循經絡矣腸風者邪氣外入隨感隨見臟毒者蘊積毒久而始見

又云人惟坐臥風溫。醉飽房勞。生冷停寒。酒麪積熱。以致榮血失道。滲入大腸。此腸風臟毒之所作也。挾熱下血。清而色鮮。腹中有痛。挾冷下血。濁而色黯。腹內畧痛。清則爲腸風。濁則爲臟毒。有先便而後血者。其來也遠。有先血而後便者。其來也近。世俗尿前屎後之說。非也。治法大要。先當解散腸胃風邪。熱則敗毒散。冷則換金正氣散。加芎歸。後隨其冷熱治之。劉河間云。起居不節。用力過度。則絡脉傷。陽絡傷則血外溢。血外溢則衄血。陰絡傷則血內溢。血內溢則便血。腸胃之絡傷則溢血。腸外有寒汁沫。與血相搏。則併合凝聚。不得散。而成積矣。又內經云。腸癖下膿血。

脉弦絕者死。滑大者生。血溢身熱者死。身涼者生。諸方皆謂風熱侵于大腸而然。若飲食有節起居有時。腸胃不虛。邪氣從何而入。

王執中云。何教授湯簿有腸風疾積年不愈。取脊端窮骨名龜尾。當中一灸除根。湯簿因傳此方。後觀灸經。此穴療小兒脫肛瀉血。蓋岐伯灸小兒法也。後人因之以灸大人腸風瀉血耳。蓋大人小兒之病。初不異故也。五痔便血失屎。廻氣灸百壯。在脊窮骨上赤下白處。

痔

附脫
肛

孫文垣治周文川。肛上生一腫毒。月餘膿潰矣。但少動則出鮮血不止。大便結燥。胸膈飽悶。飲食不思。脈之兩寸短弱。關弦尺洪滑。此氣虛血熱。陷于下部。宜補而升提。不然痔癩將作。可慮也。黃芪二錢。歸身地榆槐花枳壳各一錢。升麻秦艽各七分。荆芥穗五分。甘草三分。服後胸膈寬。惟口苦甚。前方加酒連連翹各五分而愈。

高仰山內人痔血裏急。後重飲食入腹。大便卽行。晝夜五六度。五更咳嗽痰。肌肉脫口作渴。由服涼血之劑過多。致脾氣虛不能統血也。脈之六部皆軟弱無力。以六君子湯加荆芥穗秦艽陳皮炮薑四帖而飲食進。血全止。嗽亦定。

減炮羌倍加何首烏又四帖。遂數年不發。

徐檢老發寒熱。臀近肛硬處生一毒。紅腫而痛。坐卧爲難。外科以鑷針點開。插藥綫于內。塗以爛藥。使膿血急潰。又與敷生肌藥。使易收口。受謝而去。未半月硬處之旁。又紅腫痛。寒熱交作。名前醫治法如前。受謝以去。遞醫遞患。幾半年矣。診之面色青慘。脈皆濡弱。手足如冰。飲食減半。究所服。則槐角生地黃柏之屬。曰。此痔癰。非痔漏也。痔漏當用挂綫。以五灰膏點之。可愈。今腫硬無定處。離肛門且遠。其初只可大補氣血。卽有毒亦宜託出。一膿而愈。此王道之治。不勝于針刀萬萬哉。乃內用寒涼。外用收口。動輒挂綫。

致凝滯流注。愈而屢發。非稟厚氣強。六旬餘人。安能當此。與十全大補四帖。飲食加。手足煖。大便艱澀。向潤之而不行者。今亦通利。再以首烏四兩。人參枸杞當歸黃芪熟地各二兩。槐角秦芫各一兩。蜜丸服之。腫處出少膿。全瘳。徐喜而謔曰。子非孫君。諸外科視此。譬爲金穴矣。呵呵。

醫學博士齊德之云。予讀養生必效方。見乾義傳僧覺海。少年患痔疾。其行業比冰霜。此緣飽食久坐。知痔疾者。不必酒色過度矣。故素問云。因而飽食。筋脉橫解。腸癖爲痔。治之故不同也。三神丸。枳壳皂角五倍。蜜丸。每服二三十丸。

黃履素曰。子中年患痔。點洗都不效。惟白蘿蔔煎湯。頻洗。差佳。近讀環中集。載冬瓜皮同朴硝煎洗。翻花痔立愈。又曰。以蘿蔔代冬瓜亦效。冬瓜未之試。蘿蔔已驗矣。

薛立齋治儒者楊舉元。素陰虛。勞則體肢倦怠。兩足發熱。服清熱等藥。熱至腰膝。大便滯滯。飲食過多。則瀉。至年餘。作渴吐痰。患痔出膿。仍不節勞。則忽惡寒發熱。後患癰膿。水不止。氣血虛甚。乃用六味丸。補中益氣湯。滋養化源。喜其慎疾。年餘而痊。

陳自明治一男子。患痔未成膿。若痛大便難。與神仙太乙丹

一錠。去後二次。痛即止。不日而消。見蠱門

薛立齋治一男子患痔大便燥結。焮痛作渴。脈數按之則熱。以秦艽蒼朮湯二帖少愈。更以四物湯加芩連槐花枳壳。四劑而愈。

一男子素不慎酒色。患痔焮腫肛門墜痛。兼下血。大便乾燥。脈洪大。按之則瀉。以當歸郁李仁湯加桃仁。四劑少愈。更以四物湯加紅花桃仁條芩槐花。數帖而愈。大抵醉飽入房。則筋脈橫解。或精氣脫滯。脈絡一虛。酒食之毒。乘虛流注。或淫極強固。精氣遂傳大腸。以致木乘火熱而毀金。或食厚味過多。必成斯疾。夫受病者。燥氣也。爲病者。濕熱也。宜以瀉火和血潤燥。疎風之劑治之。若破而不愈。卽成漏。

矣。有串臀者。有串陰者。有穿腸者。有穢從瘡口而出者。形雖不同。治法頗似。其腸頭腫成塊者。濕熱也。作痛者。風也。大便燥結者。火也。潰而爲膿者。熱勝血也。當各推其所因而治之。

一男子患痔成漏。每登廁則痛。以秦艽防風湯加條芩。芎歸一帖。卽痊。如肛門下脫作痛。良久。加以大黃汁。枳殼四劑而愈。以四物加升麻。芩連。荆防。不復作。

一男子患痔漏。每登廁則肛門下脫作痛。良久。方此。以秦艽防風湯。數劑少愈。乃去大黃。加黃芩。川芎。白芍。而痛止。更以補中益氣湯。二十餘帖。再不脫。

婦人患痔腫焮痛甚。以四物湯加芩連桃仁紅花丹皮。四帖少止。又數帖而愈。

一婦人素患痔漏。每因熱則下血數滴。以四物湯加黃連治之。卽愈。後爲大勞瘡腫痛。經水不止。脉洪大。按之無力。此勞傷血氣。血動而然也。用八珍湯加芩連蒲黃二劑而止。後去蒲黃芩連。加地骨皮。數劑而安。丹溪云。婦人崩中者。由臟腑傷損。衝任二脉。血氣俱虛故也。二脉爲脉經之海。血氣之行。外循經絡。內經臟腑。若血氣調適。經下依時。若勞動過極。臟腑俱傷。衝任之氣虛。不能約制其經血。故忽然而下。謂之崩中。暴下。治宜大補氣血之藥。舉養脾胃。微

加鎖墜心火之藥。治其心。補陰瀉陽。經自正矣。

一男子有痔漏。每發如廁。肛脫良久。方上診其脈。細而微。用補中益氣湯三十餘劑。遂不再作。丹溪曰。脫肛屬氣熱。氣虛血虛。血熱氣虛者。補氣。參。芪。芎。歸。升。麻。血虛者。四物湯。血熱者。涼血。四物湯加黃柏。肺與大腸為表裏。故肺臟蘊熱。則肛門閉結。肺臟虛寒。則肛門脫出。故婦人產育用力。小兒久痢。均致此病。治之必須溫補肺臟腸胃。久則自然收矣。雄按此症必見此脈始可用此藥

臨安曹五方黃院薦引為高宗取痔得效後。封曹官至察使。用好信石色黃明者三錢。打如豆大。明礬一兩為末。好黃

丹水飛炒紫色五錢。蝎稍七個。淨水瓦上焙乾研末。草烏
緊實光滑者。去皮生研末一錢。右用紫泥罐。先將炭火煨
放冷拭淨。先下明礬燒令沸。次下信入礬內拌勻。文武火
煨候沸再攪勻。看罐通紅。烟起爲度。將罐掇下待冷取研
末。方入草烏黃丹蝎稍三味。再同研極細末。磁罐內收貯。
如欲敷藥。先以甘草煎湯。或葱椒煎湯。洗淨患處。然後用
生麻油調前藥。以鷲毛掃藥痔上。每日敷藥三次。必去黃
水如膠汁然。痔頭漸消。看痔病年深淺。年遠者不出十日
可取盡。日近者俱化黃水。連根去盡。更搽生好肉藥。

各如
神于

季防禦方。五痔者。貧富男女皆有之。富者酒色財氣。貧者擔
輕負重。飢露早行。皆在心肝二經。喜則傷心。怒則傷肝。喜
怒無常。風血浸于大腸。到穀道無出路。結積成塊。出血生
乳。各有形相。婦人因經後傷冷。月事傷風。餘血在心經。血
流于大腸。小兒因利後。或母腹中受熱也。先用水澄膏護
其內。鬱金白芨各一兩。或加黃連。右二味爲末。如內痔候
登廁翻出在外。用溫湯洗淨。不須坐。側卧于牀。卽出用蜜
水調令得中。篋挑塗穀道四邊好肉上。留痔在外。以紙蓋
藥上。良久方用枯藥擦痔上。用筆蘸溫水于紙上不令藥
乾。及四散枯藥。用好白礬四兩。生信石二錢半。硃砂一錢。

生研極細。右各研爲細末。先用砒入紫泥罐。次用白礬末蓋之。用火煨令烟斷。其砒盡隨烟去。止借砒氣于礬中耳。用礬爲細末。看痔頭大小。取礬末在掌中。更入硃砂少許。以唾調稀。用篋頭塗痔上周遍。一日三上。候看痔頭顏色焦黑爲度。至夜有黃水出。切勿他疑。水盡爲妙。至中夜上藥一遍。來日依然藥三次。有小痛不妨換藥。時以碗盛新水或溫湯。在邊用筆輕洗痔上舊藥。更上新藥。仍用護肉藥。次用荆芥湯洗之。三兩日後黃水出將盡。却于藥中增硃砂。減白礬。則藥力卽緩。三兩日方可增減漸漸取之。庶不驚人。全在用藥人看痔頭轉色。增減厚薄傳藥。方是活。

法此藥只是借砒信耳。又有硃砂解之。一方士將此二方。在京治人多效致富。一富商因驗以百金求得之。錄于子。子雖未用。傳人無不言效。但枯藥趙宜真煉師以刊于青囊襍纂。如神千金方未見刊傳。大抵今人言能取痔者。皆此方也。恐氣血虛。或內邪者。還當兼治其內。庶不有失。二條

皆外科
發揮

薛立齋治一男子痔瘡腫痛。便血尤甚。脈洪且瀦。經云。因而飽食筋脈橫解。腸澀爲痔。蓋風氣通于肝。肝生風。風生熱。風客則淫氣傷精。而成斯疾。遂與黃連當歸黃芪生地防風枳壳白芷柴胡槐花地榆甘草。治之漸愈。次以黃連丸。

而瘡。

一男子患痔，脈浮鼓，午後發熱作痛，以八珍湯加黃芪柴胡地骨皮治之，稍可。彼欲速效，用劫藥蝕之，痛甚絕食而歿。凡用枯藥者宜先治其內，內愈而後可治其外也。夫瘡之潰斂，氣血使然也。脈浮鼓日晡痛，此氣血虛也。丹溪云：瘡口不合，大劑參芪朮歸芎補之。外以附子餅灸之，更以補藥作膏貼之。

一男子年踰四十有痔漏，大便不實，服五苓散愈，加泄瀉，飲食少思，此非濕毒，乃腸脾胃虛也。當以理中湯治之，不信，乃服五苓散愈甚，乃以理中湯及二神丸，月餘而平。

李遠因痔瘡怯弱，以補中益氣湯少加苓連枳壳治之，稍愈。

後因怒加甚時仲冬脈得洪大謂脈不應病此乃腎水不足火來乘之藥不能治果歿于火旺之月常見患痔者腎脈不足俱難治

劉商有痔肛門脫出此濕熱下注真氣不能升舉診其脈果虛遂以四君子湯加黃芩芍歸蒼朮黃柏升麻柴胡服之更以五倍子煎湯熏洗彼以爲緩乃用砒霜等毒藥蝕之而歿劫藥特治其末且能伐真元鮮不害人慎之

徐生因痔氣血愈虛飲食不甘小便不禁夜或遺精此氣虛兼濕熱而然非瘡故也以補中益氣湯加茱萸山藥五味兼還少丹治之而愈

一男子患痔漏膿出大便諸藥不應診其脉頗實令用豬腰
一個切開入黑牽牛末五分線扎以荷葉包煨熟空心細
嚼温鹽酒送下數服頓退更以托裏藥而愈。即煨
腎散

朱丹溪治一人肛門生癰後不收口鍼窮三孔穴邊血膿用

黃芪條芩連翹秦芫右末之神曲丸服。治法

予庚子除夕痔作時官舍合肥難得醫者取官局釣腸丸一
百二十粒分爲二服熱酒併服之中夜腹間微痛下少結
屎旦起已安治証具載本方所以作効速者以服多故耳。

百乙
方

葱青內刮取涎對停入蜜調勻先以木鱉子煎湯熏洗然後

傳藥其冷如冰。唐仲舉云。常有一吏人苦此。渠族弟親合與之。早飯前敷。午後以榜紙來謝。拜于庭下。疾已安矣。

鄭器先用之。親會得效。其法鳩尾骨尖少偃處。卽是穴。麥粒大艾炷灸七壯。或十四壯。甚者二十一壯。上瘡發卽安。可

除根本

並百乙方

薛立齋治一人痔漏口乾胃脈弱。此中氣不足。津液短少。不能上潤而然。以黃芪六一湯。七味白朮散治之。或曰諸痛痒瘡。皆屬心火。遂服苦寒之藥。大便不禁而歿。夫諸痛痒皆屬心火。言其常也。始熱終寒。則反常矣。可泥此而不察

乎。

許叔微治一人腸風脫肛不收有血下用皂角三莖槌碎水
一碗揉令皂角消盡用絹二重濾去清汁數分將脫肛腸
浸在藥中其腸自收不用手托如大腸收了更用湯盪其
脫肛上令皂角氣行則不再作三次盪愈

龔之才治小兒脫肛因久患瀉利所致宜用葱湯熏洗令軟
送上或以五倍子末敷而托入又以五倍子煎湯洗亦可
又以驚頭燒存性香油調敷一云此物烟熏之久自收又
以東壁土泡湯先熏後洗亦效

蘇東坡與程正甫書云凡痔疾宜斷酒肉與鹽酪醬菜厚味
及粳米飯唯宜食淡麵一味及以九蒸胡麻卽黑芝麻同

煎去皮挾茶少入白蜜爲麵食之日久氣力不衰百病自去而痔漸退此乃長生要訣但易知而難行耳

江夏鐵佛寺蔡和尚病肛門痔痛不可忍有人教用木鱉仁帶潤者雌雄各五個乳細作七丸盥覆溫處勿令乾每以一丸唾化開貼痔上其痛卽止一夜一丸自消也後用治

數人皆效

瀕湖集酒方

張子和治趙君玉常病痔鳳眼草刺蝟皮槐根狸首之類皆用之或以乾薑作末塗猪肉炙食之大便燥結不利且瘤疑痿後數日因病黃大涌瀉數次不言痔作矣

徐靈胎曰脫肛多由濁氣下降溼痰毒火合併爲害故腫痛

異常。此實症也。必清其大腸之火。而用外治之藥以收之。無不立愈。其有虛人病後。清氣下陷。則用補中益氣以提之。乃十不得一者也。若不論何因。俱用升提收斂之法。肛門之痰火濁氣。將升提而置之何地耶。且脫肛之疾。屬實者多。又用溫燥。更非所宜。

漏瘡

薛立齋治一男子。臂患漏口。乾發熱。喜膿。不清稀。脈來遲緩。以豆豉餅炙。及服八珍湯。加麥冬。五味子。軟柴。胡地。骨皮。三月餘而愈。後因不慎房勞。復潰膿。清脈大。辭不治。果歿。

一男子臀癰作膿而痛。以仙方活命飲二劑痛止。更以托裏消毒散。膿潰而瘥。

一男子臀癰不作膿。飲食少思。先用六君子湯加芎歸黃芪。飲食漸進。更以托裏消毒散。膿潰而愈。

一男子臀癰潰而膿清不斂。以豆豉餅炙之。更飲十全大補湯。兩月餘而痊。凡瘡不作膿。或不潰。或潰而不斂。皆氣血之虛也。若膿清稀。尤其虛甚也。

一男子臀癰。膿水不止。肌肉漸瘦。飲食少思。胃脈見弦。以六君子湯加霍香當歸。數劑飲食漸進。以十全大補湯及豆豉餅炙之。兩月餘而斂。

薛立齋治一病人。臀漫腫。色不變。脈滑數而無力。此臀癰也。膿將成。尚在內。欲治以托裏藥。待發出而用針。彼欲內消。服攻伐藥。愈虛。復求治。仍投前藥。托出針之。以大補藥而愈。凡瘡毒氣已結不起者。但可補其血氣。使膿速成而針去。不可論內消之法。膿成又當辨其生熟淺深而針之。若大按之乃痛者。膿深也。小按之便痛者。膿淺也。按之不甚痛者。未成膿也。按之即復起者。有膿也。按之不復起者。無膿也。若腫高而軟者。發于血脉。腫下而堅者。發于筋骨。色相不變。發于骨髓也。此條舊案已收。因無後段發明。故錄之。

一男子臀癰腐潰。肌肉不生。用藥敷之。四沿反硬。診之脈滑。

而弱。此氣血不能營于患處。故敷涼藥反硬。乃氣血受寒凝結而非毒也。用大補藥愈矣。

一人患腎癰。用五爪龍。連枝搗汁酒澆服。日進四五次。膿從大便出。未成膿者內消。如有頭以渣敷上立散。治魚口極

效。廣筆記

曹文部文兆。年逾四十。髀胛患毒。已半月餘。頭甚多。狀如粟許。內痛如癩。飲食不思。怯甚。脉歇上。此元氣虛。疽畜于內也。非灸不可。遂灸二十五壯。以六君子湯加藿香。當歸數劑。瘡勢漸起。內痛頓去。胃脉漸至。但色尚紫。瘀肉不潰。此陽氣尚虛也。燃桑柴灸之。以補接陽氣。解散其毒。仍以前

續名醫類案卷三十三
藥加參芪歸桂。色赤膿稠。瘀肉漸腐。取去。兩月餘而愈。夫
邪氣沉伏。真氣怯弱。不能起發。須火灸而兼大補。投以常
藥。待其自潰。鮮有不誤者。

沈侍御患腎腫痛。小便不利。彼謂關格症。以艾蒸臍。大便赤
不利。以降火分利之藥。治之不應。診其脉數。膿成。此癰患
也。遂針之。出膿數椀許。大便卽利。五日陰囊腫脹。小便不
行。仍針之。參連歸朮之藥。猶緩。俾服獨參湯。至二筋。氣稍
復。又服獨參湯。兼以托裏藥。兩月餘而平。大抵瘡瘍膿血
之泄。先補氣血爲主。雖他病。當從未治。

滕千兵年踰五十。腎患癰膿。熟不開。攻通大肛。膿從大便而

出辭不能治果斃丹溪云。腎居小腹之後。陰中之陰也。道遠位僻。血亦罕周。中年後尤慮患此。況膿成不刺。欲不亡得乎。

囊癰

薛立齋治一男子囊癰未作膿而腫痛。以加味龍胆瀉肝湯。一二劑少愈。更以四物湯加木通。知母。黃栢而愈。

一男子囊癰。焮腫痛甚。小便濇發熱。脉數。以龍胆瀉肝湯。倍用車前子。木通。茯苓。四劑勢去其半。仍以前湯止。加黃栢。金銀花。四劑又減二三。便利如常。惟一處不消。此欲成膿。

也。再用前湯加金銀花白芷角刺。六帖微腫痛。脉滑數。乃
膿已成。令針之。腫痛悉退。投滋陰托裏藥。及紫蘇末敷之
愈。

一膏梁之客。陰囊腫脹。小便不利。此中焦積熱。乘虛下注。先
用龍胆瀉肝湯加黃栢牛膝。四劑漸愈。後用補陰八珍湯。
加柴胡山梔而愈。後不守禁忌。前症復作。仍用補陰八珍
湯。補中益氣湯。六味丸而痊。又因勞倦發熱。自用四物湯。
知栢之類。虛症悉具。瘡口大開。五臟氣血俱虛也。朝用補
中益氣。夕用六君加當歸。各五十餘帖。瘡口始斂。又用六
味丸調理而愈。

知州黃汝道先晡熱發熱肢體倦怠入房則腿足痠軟足心
熱至腿膝六脈洪數兩尺爲甚此足三陰虛欲滋補化源
彼反服苦寒降火之劑後陰囊腫脹以疝治之腫脹益甚
形氣愈虛服溫補之劑腫痛上攻小便不利兩尺脈洪按
之虛甚曰此囊癰也因氣血虛而不能潰先用補中益氣
湯加山藥山萸車前柴胡山梔一劑腫脹頓消隨用六味
丸料加車前牛膝柴胡山梔一帖小便漸通乃用活命飲
與前二藥消息間用至二十餘劑囊裂出穢膿甚多乃用
托裏消毒散六劑膿穢清又用托裏散數劑膿水漸少更
用補陰托裏散及十全大補五十餘劑而痊

府庠李達卿素腎虛發熱久服知柏之類形體漸瘦遺精白濁。晡熱吐痰。此腎水虧損虛火內熾。用補中益氣之類。加五味麥冬。前症將愈。又別用清熱涼血之劑。飲食少思。唾痰不止。此脾虛復損。不能攝涎歸源。仍用前湯加茯苓半夏而愈。後入房頭暈吐痰腰骨作痛。大小便道牽痛。此精已耗而復竭所致。危殆之症也。遂朝用前湯加麥冬五味。夕用六昧丸料加五味葶藶。五十餘帖。諸症頓退。后又入房陰囊陰莖作痛。別用淡滲之劑。陰囊內潰。乃用補陰托裏之劑。出膿甚多。喜腫消痛止。竟不善調養。致大便不通。小便如淋。痰涎上涌。此腎虛之症復作矣。誠爲可慮。有保

其可生者用礞石滾痰丸。牛黃清心丸之類。吐痰愈加。曰非惟無益。保其生而反促其危矣。辭不治果歿。

一男子患囊癰。腫痛發熱。以小柴胡湯加黃連青皮四劑少愈。更以加減龍胆瀉肝湯而愈。

一男子囊癰。膿熱作脹。致小便不利。令急針之。以小柴胡湯加黃柏白芷銀花。四劑少愈。更以托裏消毒散數劑而痊。

一男子囊腫。狀如水晶。時痛時痒。出水。小腹按之作水聲。小便頻數。脉遲緩。此醉後飲水入房。汗出遇風寒。溼毒氣聚于囊爲患。各水疝也。先以導水丸二服。腹水已去。小便如常。再飲胃苓散。倍苓朮。更用針引去聚水而痊。

一男子患囊癰，久而不斂，以十全大補湯，加五味子、麥冬，炙以豆豉餅，月餘而平。

一弱人囊癰腫痛，未成膿，小便赤澀，以炙甘草、青皮、木通、黃柏、當歸、麥冬，四劑少愈，以清心蓮子飲而消。

一男子患囊癰，病勢已甚，脈洪大，可畏，用前湯二劑，腫少退，以仙方活命飲二劑，痛少止，脈之滑數，乃膿已成，須針之。否則囊皆潰，不信，遂更他醫，果大潰，罌丸懸掛，復求治，診之，脈將靜，以八珍湯加黃芪、知栢、山梔，更敷紫蘇末，數日而痊。此症勢雖可畏，多得保全，患者勿懼。

一弱人患囊癰，膿熟脹痛，大小便秘結，針之膿出三椀許，卽

鼯睡覺而神思少健。但針後雖敷解毒藥。亦潰盡矣。故用托裏藥三十餘劑始痊。大抵此症屬陰道虧。濕熱不利所致。故滋陰除溼爲要。常治腫痛小便秘濇者。用除溼爲主。滋陰佐之。腫痛退便利和者。除溼滋陰相兼治之。欲其成膿。用托裏爲主。滋陰佐之。膿成卽針之。仍用托裏滋陰。溼毒已盡。專用托裏。如膿清。或多或歛遲者。用大補之劑。及豆豉餅或附子餅灸之。如盧武選封君。年逾五十患此瘡。口年餘不斂。診之微有溼熱。以龍胆瀉肝湯治之。溼熱悉退。乃以托裏藥及豆豉餅灸之而愈。次年復患。溼熱頗盛。仍用前湯四劑而退。又以滋陰藥而消。若潰後虛而不補。

少壯者成漏。老弱者不治。膿清作渴脉大者亦不治。

朱丹溪曰。癰疽入囊者。予嘗治數人。悉以溼熱入肝經施治。

而用補陰佐之。雖膿潰皮脫。畢丸懸掛皆不死。外科心法

薛立齋治胡同知。年踰五十。陰囊腫痛。得熱愈甚。服蟠葱散。

等藥不應。肝脉數。此囊癰也。乃肝經溼熱所致。膿已成。急

針之。以龍胆瀉肝湯。脉症悉退。更以托裏滋陰藥。外搽杉

木灰紫蘇末。月餘而愈。此症雖潰盡無害。患者審之。

柏道官六十餘。陰囊已潰痛不可忍。腎丸露出。與以龍胆瀉

肝湯服之。及敷前末不應。竟此溼氣熾甚。先以槐花酒一

椀仍投前藥少愈。更以托裏加滋陰藥。月餘而平。設以前

藥不應加之峻利。未有不損中氣以致敗者也。聘士陳時
用沈汝和患此。悉用前藥而愈。

竇材治一人忽遍身拘急。來日陰囊連莖大腫如斗。六脉沉
緊。此陰疽也。幸未服解毒涼藥。若服之則莖與睪丸必皆
爛去而死。急令服救生湯五錢。又一服全安。

懸癰

薛立齋治一弱人。穀道前結核如大豆許。勞則腫痛。先以十
全大補湯。去桂枝加車前麥冬酒炒黃栢知母少愈。更服
製甘草漸愈。即國老膏仍以四物車前之類而消。

一男子患懸癰。焮腫發熱。以龍胆瀉肝湯二劑。及製甘草四劑而潰。再用滋陰之劑而愈。若膿未成。以葱炒熟敷上。冷則易之。隔蒜灸之亦可。數日不消。或不潰。或潰而不斂。以十全大補湯加柴胡稍爲主。間服製甘草並效。若不保守。必成漏矣。

一男子患懸癰。服坎離丸及四物知栢之類。不應。脈浮洪。按之微細。以爲足三陰之虛。用托裏散及補陰八珍湯愈。又用六味丸補中益氣湯。調補化源。半年而痊。大凡瘡瘍等症。若腎經火氣亢盛。致陰水不能生化。而患陰虛發熱者。宜用坎離丸。取其苦寒。能化水中之火。令火氣衰而水自

生若陽氣衰弱。致陰水不能生化。而患陰虛發熱者。宜用六味丸。取其酸溫能生火中之水。使陽氣旺而陰自生。況此症屬腎經精氣虧損者。十有八九。屬腎經陽氣亢盛者。十無一二。然江南之人。患此者多。屬脾經陰血虧損。元氣下陷。須用補中益氣湯。升補陽氣。使陽生而陰長。若嗜慾過多。虧損真陰者。宜用六味丸。補腎經元氣。以生精血。仍用補中益氣湯。以培脾肺之生氣。而滋腎水。經云陰虛者脾虛也。但多認爲腎經火症。用黃柏。知母之類。復傷脾肺。絕其化源。反致不起。惜哉。

通府張敬之患懸癰。久不愈。日晡熱甚。作煩渴而喘。或用四

物湯知柏之類。病益甚。肢體倦少食。大便不實。小便頻數。問何故。曰。此肺虛之症。前藥復傷而然。遂用補中益氣加茯苓半夏數劑。飲食漸進。症漸減。更加麥冬五味。調理乃痊。經曰。脾屬太陰。爲陰土。而主生血。故東垣云。脾虛元氣下陷。發熱煩渴。肢體倦怠等症。用補中益氣湯。以升補氣。而生陰血。若誤認爲腎虛火盛。而用四物知柏之類。反傷脾胃生氣。是虛其虛矣。況知栢乃瀉陽損陰之劑。若非膀胱陽火盛而不能生陰水。以致發熱者。不可用也。

魏玉橫治江云溪兄。初春患痔。卽令服一炁湯。加減不信。致臥月餘。後遂成管。冬月復患懸癰。初時如大豆。半月來大。

如雞卵按之甚痛，行動有妨，幸未服藥，脈之惟左關尺畧大而微，此膿尙未成也。仍與一炆湯加減，大生地、麥冬、北沙參、甘杞子、生米仁、萸仁、丹皮、地丁等，令服八劑。二劑知四劑消其半，八劑完而全愈。

薛立齋治尙寶鮑希，傳足發熱，服四物、知母、黃柏之類，年餘患懸癰，唾痰作渴，飲湯其熱至膝，更加芩連二陳，熱痰益甚。問故曰：此足三陰虧損，水泛爲痰，寒涼之劑傷胃而甚耳。遂先用補中益氣，夕用六味丸，間佐以當歸補血湯半載乃愈。

上舍劉克新，懸癰潰後作痛，發熱口乾，小便赤色，自用清熱

消毒之藥不應。左尺洪數。此陽氣盛而陰氣虛也。先用四物湯加知母等諸劑。瀉其陽氣。使陰自生。數劑諸症漸愈。後用益氣湯地黃丸。補脾肺滋腎水而愈。

一儒者患懸癰。小便赤澀。勞則足軟腫痛。發熱口乾舌燥。體倦日晡益盛。此氣血虛而未能潰也。遂用八珍加麥冬山藥。倍用製甘草。數劑諸症悉退。但患處腫痛。此膿內炊也。又五劑膿自涌出。又五十餘劑而瘡口將完。又因勞役且停藥。寒熱作渴。膿多腫痛。用補中益氣湯加炒梔。二劑少愈。又以八珍湯加麥冬五味。百餘劑腫痛悉去。喜其慎起居節飲食。常服補劑而安。但勞則膿出一二滴。後惑於他

言內用降火。外用追蝕。必其收斂。致患處大潰。幾至不起。仍補而愈。

一男子懸癰腫痛。小便赤澀。以加減龍胆瀉肝湯。加製甘草。二劑少愈。以參芪歸朮知柏製甘草。四劑而潰。更以四物湯。加知柏參芪製甘草而愈。

一男子患懸癰。膿清不斂。內有一核。以十全大補湯。加青皮柴胡製甘草。更以豆豉餅炙之。核消而斂。

一男子患懸癰。久而不斂。脉大而無力。以十全大補湯。加五味麥冬。炙以豆豉餅。月餘而愈。

一老人患懸癰。年餘不斂。診其脉尚有溼熱。以龍胆瀉肝湯。

經名醫類卷三三
一劑濕退乃以托裏藥及豆豉餅炙之而愈

一男子患此症腫痛發熱以小柴胡湯加黃連青皮四劑少愈更以加減龍胆瀉肝湯而消

一男子患懸癰膿不潰脹痛小便不利急針之尿膿皆利更以小柴胡湯加黃柏白芷金銀花四劑痛止以托裏消毒四劑而愈常見患者多不肯用針待其自破殊不知緊要之地若一有膿宜灸針之使毒外發不致內潰故前人云凡瘡若不針烙毒結無從而解膿瘀無從而泄又云宜開戶以逐之今之患者反謂地部緊要而不用針何其悖哉

一男子懸癰膿熟不潰脉數無力此氣血俱虛也欲治以滋

陰益血之劑。更針之。使膿外泄。彼不從。仍用降火散毒藥。致元氣愈虛。瘡勢益甚。後潰不斂。竟至不救。夫懸癰之症。原係肝腎二經。陰虛雖一于補。尤多不治。況膿成而又尅伐。不死何俟。常治初起腫痛。或小便赤澀。先以製甘草一二劑。及隔蒜灸。更飲龍胆瀉肝湯。若發熱腫痛者。以小柴胡湯。加車前黃柏芎歸濃。已成卽針之。已潰者。用八珍湯。加製甘草柴胡稍酒炒知柏。小便澀而脈有力者。仍用龍胆瀉肝湯。加製甘草。小便澀而無力者。用清心蓮子飲。加製甘草。膿清不斂者。用大補之劑。間以豆豉餅灸之。久而不斂者。用附子餅灸之。並効。

薛立齋治一男子患懸癰。焮痛發寒熱。以小柴胡湯。加製甘草二劑。少退。又用製甘草四劑。而消。大抵此症屬陰虛。故不足之人多患之。寒涼之藥不可過用。恐傷胃氣。惟製甘草一藥。不損氣血。不動臟腑。其功甚捷。最宜用之。不可忽也。

馬銘鞠治談公武患跨馬癰。外勢不腫。毒內攻。膿多瘡口甚小。突出如指。大一塊。觸之痛不可忍。多飲寒劑。敷涼藥。毒內攻。胃氣俱損。令盡去圍藥。洗淨瘡口。但用一膏藥以護其風。用大劑黃芪。山藥。生地。白芷。牛膝。米仁。銀花。襍以健脾藥十餘劑。膿盡。再數劑。肉長。突者平矣。後服六味丸。斤

許精神始復。廣筆記

薛立齋治黃吏部穀道前患毒。焮痛寒熱。此肝經血虛溼熱所致。名曰懸癰。屬陰虛症。先以製甘草。二服頓退。用以四物加車前子。青皮。甘草。節。酒製。知柏。數服而消。

一男子。歲逾五十。患懸癰。膿清。肝腎脈弱。此不慎酒色。溼熱壅滯也。然膿清。脈弱。老年值此。甚難收斂。況穀道前爲任脈發源之地。肝經宗筋之所。辭不治。後果死。嘗治此癰。惟澗水製甘草有效。已破者。兼十全大補湯爲要法。

柴嶼青以省覲舟行。舟人患騎馬癰。哀號痛楚。憐而治之。先用大歸湯。十餘劑。外貼回生膏。日令其以藥水勤洗。繼惟

十全大補湯。因貧人苦無力。購參携有扁黨參。給以半斤。始備藥。又用玉蟾生肌散。人參末敷患處。調理月餘而愈。

疔 疔

一名便癰。一名便毒。一名痞子。一名血疔。又俗名石米瘡。左為魚口。右為便毒。生於兩膀合縫之間。結腫名曰橫疔。又名外疔。

薛立齋治一婦人。拘中赤腫脹痛。此膿內作。用托裏消毒散。

加柴胡數劑。潰而膿清。寒熱乃氣血復虛。用托裏散而寒熱止。用十全大補百餘劑而痊。

一婦人腹拘腫痛。小水不利。或時胸乳作痛。脇腹作脹。此肝火氣滯。四物加柴胡青皮。元胡索木香而愈。

一婦人拘中作痛。小腹痞悶。小便不利。內熱體倦。飲食少思。

此肝火內動脾胃受傷也。用加味歸脾湯。柴胡清肝散而安。

一婦人拘中腫脹。小腹作痛。服下血之劑。其痛益甚。更吐瀉少食。此肝脾復傷。用六君子湯。加升麻柴胡而愈。

薛立齋治一婦人兩拘腫痛。腹內一塊。不時上攻。月經不調。大便不利。此肝脾氣滯而血傷。以四君加芎歸柴胡山梔而愈。後因鬱怒。前症復作。兼胸滿腹脹盜汗。此肝木甚而傷脾土也。用加味歸脾湯。下蘆薈丸而痊。

一婦人小腹內作痛。或痞悶。兩拘腫痛。內熱寒熱。胸膈不利。飲食不甘。形體日瘦。此肝氣滯而氣傷也。朝用補中益氣

湯。夕用蘆薈丸漸愈。更用六味丸全愈。

一婦人兩拗腫痛。小腹痞脹。白帶時下。寒熱往來。小水淋瀝。此肝氣滯而血病。用龍胆瀉肝湯漸愈。又用加味逍遙散。六味地黃丸全愈。

一婦人患前症。胸脇脹悶。或小水不利。或時腹痛。此肝火氣病。先用龍胆瀉肝湯。以清肝熱。又用加味逍遙散。以生肝血。六味地黃丸。以滋腎水而愈。

一婦人患前症。內熱作渴。飲食不甘。肢體倦怠。陰中作梗。小便赤澀。此脾經鬱結。肝經溼熱。用加味歸脾湯而愈。後因怒氣復作。小腹脹痛。用小柴胡加山梔芍歸痛止。又用加

味道遙散而愈。

一婦人小腹痞悶溺瀆內熱體倦懶食此肝火動而脾血傷也。用八珍加柴胡山梔胆草而安。

一婦人陰中如梗兩拘腫痛寒熱不食小便頻數小腹重墜此肝脾鬱怒所致。先以補中益氣加茯苓山梔車前子青皮以清肝火升脾氣。更以加味歸脾湯調理脾鬱而愈。

一婦人小腹內如有所結兩拘並玉門俱腫小便淋漓經候不調內熱作渴飲食少思腹內如鷄卵而漸大脉洪數而虛左關尤甚屬肝胆鬱結之症也。用加味歸脾湯肝火退而脾土健。間以逍遙散下蘆薈丸而愈。

一男子患便毒。焮腫作痛。大小便秘。脈有力。以玉燭散二劑。頓退。更以龍胆瀉肝湯。四劑而愈。

一男子便毒已潰。而痛不止。小便秘滯。此肝火未解也。以小柴胡加黃柏知母芎歸。痛止便利。更以托裏當歸湯。而瘡歛。若毒未解而痛不止者。須用活命飲。

春元凌待之虛。而服尅伐藥。幾致危殆。用托裏健脾藥而愈。秀才王文遠。因勞苦之後。患此。服小柴胡湯。及表症散後。用托裏藥。膿成針之。而旬日愈。又胡判官膿清脈弱。以大補藥已愈。因新婚而復發。自用連翹清毒藥。致瀉利不止。竟至不救。可見此症屬不足者多矣。非補不可。大凡便毒。

屬肝經。初起堅硬。肝主筋故也。五七日後赤軟。膿成故也。若尚堅硬。乃元氣不能腐化。往往人見堅硬。只欲內消。反服攻散藥。多致虛虛之禍。前此治者。卽其驗也。

魏玉橫治宋復華兄。因勞頓患左拘腫硬。漸如鵝卵。或與發散轉甚。已半月。足冷過膝。面赤手亦冷。惡寒。夜熱。口苦。食懈。脉之弦數。曰。此肝虛火甚也。與生地。杞子。炒參。麥冬。丹皮。萸仁。歸身。紅花。間入川楝。川連。羚羊。牛蒡。數劑。寒熱退。又十劑。其腫硬及諸症漸愈。惟餘小塊如豆。大未消。彼以要務奔走勞碌。復腫。數日大如李。其色赤而軟。已成膿。再與前藥。卽自潰而愈。此症俗名一石米瘡。言百日後可愈。

也。卽遇先輩如立齋。其治法或未能如是。余非能有過古人。第知爲肝腎病。則不禱入他藥耳。

薛立齋治一婦人。素清苦。因鬱怒。患前症。或用散毒寒涼之藥。反晡熱內熱。自汗盜汗。月經不行。口乾咽燥。此鬱氣傷脾。因藥復損。先以當歸湯數劑。後兼逍遙散五十餘劑而愈。

陳自明治一男子。患便毒堅硬。與神仙太乙丹一粒。卽服之。去後二次。痛止不日而消。方見
蠱門

薛立齋治一男子。患此未作膿。小便秘澇。以八珍三劑少愈。以小柴胡湯加澤瀉山梔木通二劑而消。

一男子患此症腫痛發寒熱以荆防敗毒散二劑而止以雙解散二劑而愈

一男子患此症膿未成覺大痛服消毒托裏內疎藥不應診之脈洪大毒尚在以仙方活命飲一劑痛止又一劑而消

一男子患此症腫痛日晡發熱以小柴胡湯加靑皮花粉四劑痛止熱退以神効瓜蒌散四劑而消

一男子患此症腫而不潰以參芪歸朮白芷皂角刺柴胡甘草節數服而潰以八珍湯加柴胡數劑而愈

一男子患此症潰而腫不消且不斂診之脈浮而濇以豆豉餅炙之更以十全大補湯月餘而愈

一男子患此症。潰而痛不止。諸藥不應。診之。脈大。按之則數。乃毒未解也。以仙方活命飲而止。又二劑而斂。

一男子患此症。服尅伐之藥。以求內消。致瀉利不食。以二神丸先止其瀉。以十全大補倍加白朮茯苓數劑而消。大抵此症多患於勞役之人。亦有內蘊熱毒而生者。須辨虛實。及成膿否。不可妄投藥餌。常見治此症者。槩用大黃之類。下之以求內消。或膿成令膿從大便出。鮮有見其痊也。人多欲內消者。益恐收口之難也。若補養血氣。不旬日而收矣。何難之有。若膿既成。豈有可消之理。如再用尅伐之劑。反爲難治。

一男子不慎房勞患此腫痛以雙解散一服通之其痛卽止更以補中益氣湯數劑而膿針之以八珍湯加五味子麥冬柴胡三十餘劑而愈大抵便癰者血疝也俗呼爲便毒言于不便處腫毒故爲便癰也乃足厥陰肝之經絡及衝任督脉亦屬肝之旁絡且氣血流通之道今壅而腫痛此則熱毒所致宜先疎導其滯更以托裏之劑此臨症制宜之法也

一老婦患此症腫痛膿尙未成小便瀉肝脈數以加減龍胆瀉肝湯加山梔黃柏四劑而削

張德俊灸便毒親曾取効云屢以灸他人皆驗以細草或軟

第...卷之三
三三
三節至指盡處爲則。不量指甲集斷。卻將此草于手腕橫紋量起。引草向臂。當中草盡處。卽是穴。麥粒大灸三壯。腫散痛止卽時安。
百乙方

繆仲淳親試治便毒甚驗。棉地榆四兩。白酒三椀。煎一椀空。心服。雖腫者亦愈。加穿山甲同患處者三片。炒引經更妙。
廣筆記
又方。棉地榆四兩。粉甘草一兩。金銀花一兩。白芷三錢。皂角刺二錢五分。水煎服。

黃履素曰。余家有女流患便癰。兩拘腫痛。不能起。瘍醫用敗毒藥十餘帖。以圍藥逼之出膿。腫痛愈甚。予查薛氏外科

樞要此症皆因鬱怒傷肝得之。治用加味歸脾湯。加味道遙散間服。遂依用之不三劑腫痛減半。六劑而起。

孫文垣治吳翁年七十有三。偶墜馬。左脇作痛。隨治而愈。後半年忽左胯腫痛。憎寒作熱。諸治罔效。或作疝氣。投荔枝大小茴香川棟橘核之類。痛不可忍。至欲引繩自絕。診之六脉浮而洪數。左尺尤其。驗痛處紅腫如匏。按之烙手。此便毒也。非因近色而得。蓋胯屬厥陰肝經。肝爲血海。乃昔時墜馬。惡血消之未盡。畜於經絡。化而爲膿。年高氣虛。又爲香燥剋伐。故痛且劇。今其色青中隱黑。膿成久矣。乃令外科針之。出青黑膿五六椀。此俗名一石米瘡也。乃用托

裏十宣散。又加參芪三錢。後加至五錢。一日兩進。兩月而愈。

腿癰

薛立齋治一男子。年逾二十。稟弱。左腿外側患毒。三月方潰。膿水清稀。肌肉不生。以十全大補湯加牛膝。二十餘劑。漸愈。更以豆豉餅炙之。月餘而痊。

滁州于侍御髀甲患毒。痛甚。服消毒藥。其勢未減。卽以槐花酒一服。其症大去。再以托裏消毒而愈。

丁蘭年二十餘。股內患毒。日久欲求內消。診其脈滑數。知膿

已成且氣血虛不潰遂刺之膿出作痛以八珍湯治之少
可但膿水清稀更以十全大補湯加炮薑附子五分數劑
漸愈仍服十全大補湯三十餘劑而痊

一僧患股內腫一塊不痛不潰治以托藥二十餘劑膿成刺
之作痛謂腫而不潰潰而反痛此氣血虛甚也宜峻補之
彼云痛無補法曰正氣不足不可不補補之則氣化而痛
邪自除遂以參耆歸地白朮治之兩月而平

一男子腿內患癰漫腫作痛四肢厥逆咽喉閉塞發寒熱諸
治不効乃邪鬱筋絡而然也用五香連翹湯一劑諸症少
退又服之大便行二次諸症悉退而愈

薛立齋治一男子先腿痛後四肢皆痛遊走不定至夜益甚服除敗毒之劑不應其脉滑甚兼溼痰濁血爲患以二陳湯加蒼朮羌活桃仁紅花牛膝草烏治之而愈凡溼痰溼熱及死血流注關節非辛溫之劑開發腠理流通隧道使氣行血和焉能得愈。

上舍李道甫腿患瘡作痛少食作嘔惡寒此痛傷胃氣用六君子湯加當歸四劑疼痛少止飲食加進又以十宣散加白朮茯苓陳皮數劑膿成針而出之又以前散去防風白芷數劑而痊。

一老人腿患癱自潰忽發昏瞶脉細而微此氣血虛極也以

大補之劑而甦

一男子患腿痛而不焮腫大小便利調和用托裏榮衛湯數劑而消

一男子內股患毒腫硬痛甚不作膿隔蒜灸五十餘壯勢退七八以仙方活命飲四劑而膿成用十宣散六劑膿潰而愈凡瘡或大痛或不痛麻木灸最良

一男子腿內側患癰未作膿而腫痛以內托黃芪柴胡二劑少愈又二劑而消

一男子腿外側患癰漫腫大痛以托裏黃芪酒煎湯二劑少可更以托裏散數劑潰之而愈

一婦人腿癱久而不愈，瘡口紫陷，膿水清稀，以爲虛，彼不信，乃服攻毒之劑，虛症蜂起，復求治，令灸以附子餅，服十全大補湯百餘劑而愈。凡瘡腫膿清不斂者，再或陷下，皆氣血虛極也，最宜大補。否則成敗症，若更患他症，尤難治療。男子腿癱內潰，針之膿出四五碗，惡寒畏食，診脈如絲，此陽氣微也。以四君子湯加炮附子一錢，服之寒少止。又四劑而止。以六君子湯加桂，數劑飲食頓進。乃以十全大補湯及附子餅兩月而愈。

一男子患腿癱，兼筋攣痛，脈弦緊，用五積散加黃柏、柴胡、蒼朮治之而痊。

一男子腿痛兼筋攣骨痛脉弦緊。以大防風湯二劑。攣少愈。又二劑而腫消。但內一處尙作痛。脉不緊。此寒邪已去。乃所滯瘀濁之物。欲作膿。故痛不止。用托裏藥數劑。腫發起。脉滑數。乃膿已成矣。針之。用十全大補湯月餘而安。

一男子右腿赤腫焮痛。脉沈數。用當歸拈痛湯。四肢反痛。乃溼毒壅遏。又況下部藥難達。非藥不對症也。遂砭患處。去毒血。仍用前藥一劑。頓減。又四劑而消。

丹溪診東陽李兄子。年逾三十。形瘦膚厚。連得憂患。又因作勞過於色。忽足腿外側廉上。紅腫其大如栗。一醫問其大府堅實。與承氣湯兩帖不効。又一醫教以大黃硃砂生粉。

草麒麟竭，又二三帖，半月後召視之曰：脈實，大事去矣。後果歿。

馬銘鞠治江都尹子九歲患腿癰，治彌月勢漸盛，按之堅如石，幸兒氣厚，可內消，用牛膝米仁地榆生地牛蒡銀花連翹甘草。初劑加利藥微利之，卽稍寬。後兩劑加汗藥微汗之，勢益寬。至數劑取穿山甲末五錢半入煎，半調藥送下。兒善飲，令一醉，自此頓消。半月地下行矣。初一醫欲開刀，遇馬中止。凡外科宜以開刀爲戒。

廣筆記

薛立齋治一男子患腿癰，膿已成，針之出二椀許，飲以托裏藥一劑，大發熱，更以聖愈湯二劑而止，翌日惡寒不食，脈

細如絲以人參一兩熟附子三片薑棗煎再服而愈但少食不寐更與大補黃芪湯而平。

一男子腿腫發熱畏寒以補中益氣湯治之彼以爲緩乃服芩連等藥熱愈甚復請治與人參養榮湯二十餘劑而潰更以參芪歸朮炙草肉桂又月餘而斂夫火之爲病當分虛實芩連苦寒能瀉心肺有餘之火若老弱或飲食勞倦而發者此爲不足當以甘溫之劑治之未嘗有實熱而畏寒虛熱而喜寒者

琇按二語却未然

此其驗也

陸封公養質患腿癰醫用忍冬花角刺連翹白芷貝母花粉陳皮乳香沒藥治之不效仲淳卽前方加棉地榆炙甘草

紫花地丁服三四劑愈。

臙瘡

附爛
腿

薛立齋治一婦人患臙瘡因步履勞動復惡寒發熱倦怠懶食而瘡出血此元氣虛而不能攝血歸經也用補中益氣湯而愈

陶九成曰辛酉夏余足瘍發於外臙初甚微其後浸淫涉秋徂冬不良于行凡敷膏濯之劑嘗試略盡痛痒襍作大妨應酬一日友人俞和父過見怪其蹒跚舉以告之和父笑曰吾能三日已此疾法當先以淡蘆水滌瘡口浥乾次用

局方駐車丸研極細。加乳香少許乾糝之。無不立效。如其說用之。數日良愈。蓋駐車丸本治血痢滯下。而此瘡亦由氣血凝滯所成也。齊東野語

張子和治小渠袁三。因被盜受驚。仆傷其兩脇。外賺作瘡。數年不已。膿水常涓涓然。但飲泠則瘡間泠水浸淫而出。延為濕瘡。張曰。爾中焦當有綠水二三升。涎數掬。袁曰。何也。曰。當被盜時。感驚氣入腹。驚則胆傷。足少陽經也。兼兩外賺皆少陽之部。此胆之甲木受邪。甲木色青。當有綠水。少陽在中焦如漚。既伏驚涎在中焦。飲泠水咽。為驚涎所阻。水隨經而旁入瘡中。故飲水則瘡中水出。乃上涌寒痰。汗

如流水。次下綠水果二三升。一夕而痲乾矣。

薛立齋治一室女年十七。腿外臙忽腫起一紅點。作痒搔破。日日鮮血如注。及飛出小蟲甚多。審其由。每先寒熱兩耳。下或結核。蓋外臙耳下。俱屬胆經。胆爲肝之腑。肝主風熱。生蟲。血得風而妄行。肝火旺而血出。其肝胆陰陽俱虛矣。凡病虛則補其母。用六味丸滋腎水以生肝木。四物加柴胡。山梔。鈎藤。生肝血以抑風熱而痊。

陳湖陸懋誠。素因陰虛。過飲入房。發熱腿痛似臙瘡。用發表之劑。兩腿腫黯。熱氣如霧。欲發痲。脉皆洪數。兩尺尤大。此屬足三陰虛。酒濕所乘。元氣損而邪益甚耳。用十全大補

加山藥山萸附子。一劑脉症頓退。去附子又二劑全愈。

李絳記武元衡相國在西川且苦脛瘡。焮痛不可堪。百醫無效。及到京城呼供奉石礫等數人療治無益。有廳吏上此方。用之便瘥。其方云。療多年惡瘡。百方不差。或痛焮走注不已者。並爛搗馬齒莧傳上。不過三兩度愈。李絳兵部手集

章宇泰傳治賺瘡方。六郎乳母試之神效。松香一兩。輕粉三錢。乳香五錢。細茶五錢。四味共打成膏。先將葱頭花椒煎湯熏洗淨。用布攤膏厚貼患處。以絹縛定。黃水流盡。爛肉

生肌。廣筆記

陳儀部年逾五十。兩賺生瘡。日久不愈。飲食失節。或勞苦。或

服滲利消毒之劑愈甚，脾脈大而無力，此脾虛而無溼熱也。以補中益氣湯數劑少愈，更以六君子湯加蒼朮升麻神麴治之而愈。嘗治下部生瘡，焮痛或發寒熱，或腳氣腫痛，以人參敗毒散加檳榔蘇木蒼朮黃柏並効。久不愈者，以四生散治之。愈後以補腎丸補之，庶不再發矣。

王洪緒治馬悠也，右足背連小腿轉彎處，初因湯毒而成爛腿，三十餘年，其腫如斗，孔可容拳，有時出血，以布團填塞，否則空痛，時年七十有四，令以老蟾破腹，身刺數孔，以肚襍填患孔，蟾身覆之，早晚煎葱椒湯溫洗一次，以蟾易貼，用醒消丸早晚二服，三日後取地丁大力鮮草搗爛填孔。

外貼烏金膏。日服醒消丸。其四圍硬塊出水處。以嫩膏加五味散敷。其發痒者。以白花膏貼。內有硬塊如石者。以生商陸搗爛塗孔內。出血時先以參三七末糝之。然後填藥。如此二十餘日。腫退痒止。塊平黑肉漸紅活。孔亦收淺。止以草填。日以五寶散糝。仍貼烏金膏。因老人精神不衰。飲食不減。始終不用補而收功。

蔣仲芳治胡明甫。年五十餘。患臙瘡三載。公皮瘙痒微腫。色紫黑。用膏藥蓋之。則流水。鞋襪盡濕。去膏藥。卽又燥烈。痒痛難忍。此溼熱下流也。人但知燥濕清熱解毒。而不知濕熱之原。從脾家下陷耳。遂用補中益氣湯。升舉其氣。更加

黃栢清熱、蒼朮燥濕、茯苓澤瀉利水、蓋治濕不利小便、非其治也。外用陳石灰調側栢汁、以燥溼散瘀清熱、稍加火酒為從治、敷之、明日瘡乾、數日而愈。外治法妙

脫疽

謂疔生于足指、或足消而自脫、故名。亦有發于手指者、名炷節疔、重者腐指節、輕者筋彎。

一男子足指患脫疽、焮痛、色赤發熱、隔蒜灸之、更以人參敗毒散、去桔梗加金銀花、白芷、大黃、痛止。又十宣散去桔梗、官桂、加花粉、數劑而痊。

一男子足指患脫疽、色紫不痛、隔蒜灸五十餘壯、尙不知痛。又明灸百壯始痛。更投仙方活命飲四劑、乃以托裏藥潰。

而愈。

心法中韓判官症同灸同乃以敗毒散加銀花白芷而愈矣。

一男子足指不大痛色赤而腫令隔蒜灸至痛止以人參敗

毒散去桔梗加金銀花白芷大黃而潰更加以仙方活命

飲而痊。症形勢雖小其惡甚大須隔蒜灸之不痛者宜

用灸之庶得少殺其毒蓋因膏粱厚味酒麵炙燻積毒所

致或不慎房勞腎水枯竭或服丹石補藥致有先渴而後

患者有先患而後渴者皆腎水涸不能制火故也初發而

色黑者不治赤者水未涸尚可若失解其毒以致肉死色

黑者急斬去之緩則黑延上足必死此患不同腫潰惟隔

蒜灸有效亦有色作痛而自潰者元氣未脫易治夫至陰

之下。血氣難到。毒不易腐。藥力又不易達。况所用皆攻痛之藥。未免先於腸胃。又不能攻敵其毒。故隔蒜灸。并割去。最爲良法。故孫真人云。在指則截。在肉則割。卽此意也。

一男子腳背患此症。赤腫作痛。令隔蒜灸三十餘壯。痛止。以仙方活命飲四劑而潰。以托裏消毒藥而愈。

一男子足指患此症。色赤。焮痛作渴。隔蒜灸數壯。服仙方活命飲三劑而潰。更服托裏藥。及加減八味丸。潰脫而愈。

一男子足指患此症。色黑不痛。令明灸三十餘壯而痛。喜飲食如常。謂急割去。速服補劑。彼不信。延上遂致不救。

一男子腳背患此症。色黯而不腫痛。煩躁大渴。尺脉大而澁。

此精氣已絕不治。後果然。

楊太僕年逾四十，左足大指赤腫焮痛，此脾經積毒下注而然。乃脫疽也。喜色赤而痛。以人參敗毒散去人參桔梗，加銀花白芷大黃二劑。更以瓜萋銀花甘草節四劑頓退。再以十宣散去桔梗加銀花防已數劑而愈。

一膏梁人年逾五十患此症，色紫黑腳焮痛，孫真人云脫疽之症急斬去之。毒延腹必不治。色黑不痛者亦不治。喜其飲食如故。動息自甯。爲瘡瘍善症也。尙可治。遂以連翹消毒散六劑。更以銀花甘草節瓜萋二十餘劑。患指潰脫。再以芎歸地連翹銀花白芷二十餘劑而愈。

續名醫類案卷三十三
一芻蕘左足指患一泡。麻木色赤。次日指黑。五日足黑。冷不知疼痛。脉沈細。此脾胃受毒所致。以飛龍奪命丹一服。翌日令割去。足上死黑肉。割後骨始痛。可救。遂以十全大補湯治之而愈。蓋黑肉乃毒氣之盛。而拒截營氣所致。況至陰之下。氣血難達。經云風淫木疾。卽此是也。向若攻伐之。則邪氣愈盛。乘虛上侵。必不救。

海山驕淫益無度。強并民居田宅。婦女竟占山東之半陸。宣子者。山東名醫也。有富室妾。足小指生瘡。狀類細米瘡頭。早白根如熟棗。臍膈挈挈欲墜。聞平湖名。延之視曰。此粟米瘡也。與人面瘡等。七日毒上升。遍體腐爛。成黑水。死矣。

君欲生之。當急斷其指。斷之愈。海山亦生是瘡。屬宣子視。宣子仍前言。海山大怒欲殺之。楚人丁維章以外科有名。出入禁內。海山邀之至。告以宣子語。且曰。公視我瘡無恙。吾必殺之。維章熟視曰。殺我可也。何尤宣子。今已過三日。毒上升矣。公欲活耶。斷膝尚可。海山瞋目曰。其然。三問。應聲如響。海山喟然曰。我命在公矣。顧左右取截刀。伸足曰。斬。左右戰慄。海怒罵使斬。遂斷一腿。維章手提海山髮。倚柱坐海山面。黃氣絕。維章曰。可速召前醫者。宣子至。視其地。一腿尙自起。跳躍黑血淋漓。命取人參一斤。濃煎灌其口。少頃海山甦。顧其足曰。嗟乎。刖足刑已重矣。何辜而刖。

膝幸公治我。我自今後庶幾可以無後患。閱四十九日而右膝毒發。復生人面瘡。醫曰不可再活矣。海山不數日死。凡所奪民家產皆散去。其兄乃乞食如初。

多骨疽

薛立齋治舉人于廷器。腿患流注。年餘出腐骨少許。午前畏寒。午後發熱。口乾唾痰。小便頻數。以爲足三陰虧損。朝用補中益氣湯。夕用六味地黃丸料。加歸耆五味。各三十餘劑。外炙豆豉餅。諸症漸愈。又以十全大補之類。喜其慎疾而愈。

薛立齋治一儒者患附骨疽失于調補瘡口不斂日出清膿少許已而常出三腐骨其脉但數而無邪此氣血虛瘡結膿管而不能愈。經以烏金膏日服十全大補湯而愈。

上舍王廷璋患前症三年未愈肢體消瘦飲食難化手足並冷大便不通手足陰冷此陽氣虛寒用補中益氣湯八味丸及灸其患處而愈。

一男子臂患流注出腐骨三塊尚不斂發熱作渴脉浮大而濇乃氣血俱損須多服生氣血之劑庶可保全彼惑於火尙未盡仍用涼藥內服外敷幾危始求治其形甚瘁其脉愈虛先以六君子湯加芎歸月餘飲食漸進以八珍湯加

肉桂三十餘劑瘡色乃赤更以十全大補湯外以附子餅
炙之僅年而痊醫林集要云骨疽乃流注之敗症也如用
涼藥則內傷其脾外冰其血脾主肌肉脾氣受傷飲食必
減肌肉不生血爲脈絡血受冰則氣血不旺而愈滯宜用
理脾健脾則肉自生而氣自運行矣又有白虎飛留連周
期或展轉數歲冷毒朽骨出盡自愈若附骨腐者可痊正
骨腐則爲終身廢疾矣有毒自手足或頭面腫起或兼疼
痛上至頸項骨節去處如瘍癰貫珠此風溼流注之症也
宜以加減小續命湯及獨活寄生湯治之有兩膝腫痛起
或至遍身骨節疼痛者此風溼流注之症也各歷節風宜用附子

八物湯治之。又有結核在項腋。或兩乳傍。或兩胯軟肉處。名曰瘰癧。癰屬冷症也。又有小兒宿痰失道。致結核于頸項。臂膊胸背之處。亦冷症也。俱用執藥敷貼。已上諸症。皆緣于腎。腎主骨。腎虛則骨冷而為患也。所謂骨疽。皆起于腎。亦以其根于此也。故用大附子以補腎氣。腎熱則骨有生氣。而疽不附骨矣。聖書云。患腫潰久不時出。細骨用桐油調蜜陀僧如膏。絹攤貼妙。

附骨疽

王肯堂治一人患附骨疽。膿熟不能洩。潰而入腹。精神昏憤。粥藥不入。醫無所措。診之脉細如蛛絲。氣息奄奄。曰無傷。

也。用針刺其腹。膿大洩。然皆清稀。若蟹吐沫。在法爲透膜。不治用參。芪。附子。加厥陰行經之藥。大劑飲之。又服八味丸。食大進。米升餘。肉數嚙。旬日而平。所可治者。潰瘍之脈。決實者死。細微者生。病脈相合。故可治也。刺腹者。膿不洩。必內攻。按之。知其瘡深。卽刺無害。所以不透膜。八味補腎。腎氣旺而上升。胃口開而納食。凡洩膿旣多。刀圭之藥。其何能濟。遷延遲久。且有他患。故進開胃之藥。多食肉以補之。肌乃速生。此治潰瘍之大法。

一男子腿根環跳穴患痛。徹骨外皮如故。脈數而滯滑。此附骨疽。膿將成也。用托裏藥六劑。腫起作痛。脈滑數。其膿已

成針之出。腕許。更加補劑。月餘而瘳。

一男子患附骨疽。腫硬發熱。骨痛筋攣。脈數而沉。用當歸拈痛湯而愈。

張景岳治一人。年三十餘。素多勞。忽患環跳酸痛。數月後大股漸腫。曰此附骨也。當速治。與活命飲二帖。未效。而腫益甚。因混投清火解毒。遂致嘔惡發熱。飲食不進。勢甚危。復求治。與參芪內托散。大加炮薑。數劑而嘔止。食進。其腫軟。熟知其膿成。針之膿不多。復與九味異功煎。遂大潰。且瓣。瓣出膿。潰者五六處。腿肉盡去。止存皮骨矣。潰後復嘔。發熱不食。以十全大補湯。丸味異功散。相間與之。熱漸退。食

漸進。然足筋短縮。但可豎膝仰臥。左右挨緊。毫不能動。動則痛極。自分已成廢人。凡用十全大補三十餘劑。人參三斤。乃肉生筋舒如故。

一人年近三旬。素不節慾。忽環跳穴酸痛月餘。張曰。此最可畏。恐生癰毒。不信。或謂筋骨痛常事耳。不過風熱使然。與散風清火藥。至半年後。果微腫復求治。曰。速用托補。以救根本。尚不遲也。又不信。謀之瘍醫。曰。豈有腫瘍未潰遽可溫補耶。復用清火消毒之劑。及大潰而危。再延視。則脉症俱敗。悔無及矣。

一膏梁子年三旬。素耽酒色。亦患前症。令早服藥。執拗不從。

及腫而膿成。令速針之。不肯偏信。庸流敷以苦寒。解毒之藥。不知膿已成。猶何毒之可解。但有愈久愈深。直待自潰。元氣盡去。不可收拾耳。

立齋治地官孟鄉環跳穴患疽。內服外敷。皆敗毒寒劑。因痛極刺之。膿瘀大瀉。瘡口開張。其色紫黯。右關脉浮大。此胃氣復傷。不能榮于患處也。以豆豉餅六。君子加藿香砂仁炮羌。數劑。由是胃氣醒。而飲食進。患處暖而肌肉漸生。再以十全大補湯而愈。

大君都承慶患附骨疽。內痛如錐。外色不變。勢不可消。喜其未用寒削。止因痛傷胃氣。而不思飲食。用六君子湯治之。

飲食少進。更以十全大補。二十餘劑而膿成。針去。仍以大補湯倍用參芪歸朮。加麥冬五味遠志貝母。數服膿漸止。而瘡亦愈。

一儒者左腿微腫。肉色如故。飲食少思。此真氣虛而溫邪內襲也。蓋諸氣皆秉于胃。法當助胃壯氣。遂用六君子加藿香木香當歸。數劑飲食漸進。更以十全大補。元氣復而愈。

一儒者兩腿腫痛。肉色不變。惡寒發熱。飲食少思。肢體倦怠。脾氣不足。濕痰下注也。以補中益氣加半夏茯苓白芍。二劑。寒熱退而腫痛消。又十餘劑。脾胃壯而形體健。

一男子因負重。飲食失節。胸間作痛。誤認爲瘡毒。服大黃等

藥右腿股腫肉色如故頭痛惡寒喘渴發熱脈洪大而無力此勞傷元氣藥損胃氣而然耳用補中益氣湯四劑又用十全大補湯數劑喜其年少而愈

薛立齋治一婦人患附骨疽久而不斂致腿細軟脈來遲緩卽以十全大補湯加牛膝杜仲及附子餅炙之兩月餘而愈凡膿潰之後脈滯遲緩者易愈以其有胃氣故也脈來細而沉時直者裏虛欲變症也若煩痛尙未痊也洪實粗散者難療以其正氣虛而邪氣實也

一婦人環跳穴作痛肉色不變脈緊數此附骨疽也膿未成用內托黃芪酒煎湯加青皮龍胆草山梔數劑而消

一婦人患附骨疽，久不愈，膿水不絕，皮膚瘙癢，四肢痿軟，以爲虛欲補之，彼惑爲風疾，遂服祛風藥，竟致不起。陳無擇云：人身有皮毛、血脉、筋、膜、肌肉、骨髓，以成其形。內則有心、肝、脾、肺、腎以主之。若隨情妄用，喜怒勞逸，致內藏精血虛耗，使皮、血、筋、骨、肉痿弱無力以運動，故致痿躄狀。與柔風脚氣相類。柔風脚氣皆外所因，痿則內藏不足所致也。

山西曹主簿，年逾四十，夏間患附骨疽，服托裏藥而愈。至秋飲食少思，痰氣壅盛，口舌生瘡，用八味丸治之而愈。

一老人腿患附骨疽，腫硬，大按方痛，口乾脉弱，腫聚不潰，飲食少思，謂腫下而堅者發于筋骨，皮色不變者發于骨髓。

遂以參芪等藥托之三十餘劑膿雖熟不穿。謂藥力雖達。必須針刺。不聽。至旬日方刺之。涌出清膿五六椀許。然衰老之人。氣血不足。養毒又久。竟不治。大抵瘡疽旬日不退。宜托之。有膿刺之。有腐肉取之。虛則補之。此十全之功也。王上舍患附骨疽。畏針不開。臂膝通潰。脈數發渴。煩躁時嗽。飲食少思。齊氏曰。瘡瘍煩躁。時嗽腹痛渴甚。或瀉利無度。此惡症也。膿出之後。若脈洪數難治。微瀦遲緩易治。遂刺之。膿出四五椀許。卽服大劑參芪歸朮。翌日脈稍斂。更以八珍湯加五味麥冬肉桂白斂。三十餘劑。脈緩膿稠。三月而愈。

王洪緒治附骨疽方。用白芥子搗粉。酒釀調塗。或以大戟甘
遂二末。白蜜調敷。內服陽和湯。每日一劑。四五日可消。消
後。或服子龍丸。或服小金丹。以杜後患。大忌開刀。開則成
縮腳損疾。